

NAZ.
III

U

BIBLIOTECA NAZ.
Vittorio Emanuele III

XLIII

D

38

NAPOLI

XLIII

D

38









2

BENEDICTI BAHRII
PRO
PACE EXSULANTE
ORATIO.

Cui una cum aliis accessit
dissertatio

DE
VIRTUTE PARANDA.



LUGDUNI BATAVORUM,
Ex Officina IOANNIS MAIRE,
c15 15 c XLVI. 10

MACGILLIVRAI

OF THE

COLLEGE OF THE BISHOP

OF THE BISHOP



LIBRARY OF THE BISHOP

OF THE BISHOP

OF THE BISHOP

Reverendissimo Celsissimoque

PRINCIPI AC DOMINO

DOMINO

JOANNI,

Episcopo Lubecensi, Haredi Norwvegia,

Duci Sleswici, Holsatia, &c.



Ostquam relictā patria, Reverendissime Princeps, Domine Clementissime, in hanc urbem veni, illud capere cogitare, qua ratione efficerem, ne illustri tua gratia & liberalitate omnino viderer indignus. Quam quidem ad rem à cæteris omnibus destitutus, nihil mihi reliquum esse intelligo præter cultus & devoti animi significationem. Equidem si propter meliorum literarum amorem, quem graviora studia nunquam potuerunt excludere, omnes illos observantia quadam revereri me debere sentiam, quotquot illorum

vel studiis dediti sunt ipsi, vel cultoribus impense favent; quanto magis in eo admirari ista oportet, quem patriæ meæ contigit habere Patrem. Etenim in utroque antecellere alios, ornamentum esse judicas maxime illustre, & necessarium Sanctissimæ dignitatis præsidium. Profecto quanta sit tua benignitas & propensio ad Sapientiæ studia adjuvanda, illi aliquando loquentur, quorum industriam & sagaces curas excitare atque alere voluisti. Sed parum videbatur, munificentiae gloriam consequi, nisi ipsemet literarum studia magno ardore discendi arripere: idque in ista ætate, tanta perversitate opinionum, & difficillimis temporibus. Quod quidem studium eò est laudabilius, quò major illius molestia suscipienda est, postquam à gravioribus rebus cognoscendis propter ætatem ægrius plerumque abstinere cæperimus. Equidem nihil æqualem, quam ut tanti Principis exemplum secuti rectius consilia caperent, aut prudentius suggererent, qui suis vel aliorum commodis optime velint consulere.

Sed

5

Sed omnibus fere temporibus cum illis
conflictandum est, qui rerum longe ma-
ximum præ se ferentes studium, linguas
contemnunt; quod in illis nihil aut parum
insit utilitatis. Sicuti autem vehementer
dolet bonus quisque & harum rerum intel-
ligens, complures hoc errore duci, & cum
sibi tum aliis etiam sua consuetudine nocere;
ita maximam inde capit voluptatem,
quod videat quorundam, & in his
Principum virorum animos perversis illis
opinionibus non corrumpi. Illud vero
quis satis prædicabit, Reverendissime
Præsul, quod istos labores sustineas, non
linguarum illectus dulcedine, sed Ecclesia-
sticæ potissimum antiquitatis cognoscen-
dæ cupiditate incensus, tanta quidem,
ut nihil, quod eo spectet, prætermitten-
dum putes. Scilicet sanctissimæ dignitati
inprimis convenire censes, postquam in-
ter bellicos tumultus subditis de incolumi-
tate, quantum vicina mala patiuntur,
prospectum; reliquas curas in eam rem
convertere, cujus quantum damni afferat
ignoratio, tantas utilitates promittat no-

ritia. Neque enim, ut de Religione & pietate Christianorum recte sentiamus, secundum Sacra volumina aliud quicquam plus adjumenti nobis afferre videtur, quam eorum scripta, qui propius absunt à temporibus Apostolorum, & salutaris prudentia locupletare possunt veritatis & pietatis amantes. Quod si studia illa ad se quoque pertinere vellent, qui publici emolumenti non minus sunt cupidi, quam dignitatem & auctoritatem valent plurimum; major aliquanto spes affulgeret, futurum aliquando, ut sua universæ Ecclesiæ rediret tranquillitas, & singulis optata securitas. Sed alienum videtur laudum tuarum decus illustrare velle, quod nonnisi à clarissimo quoque fieri fas est. Mihi illud satis esse debet, si qua ratione efficiam, ut memoriam tot beneficiorum, quæ laudabilis tua benignitas in me contulit, religiose conservare credam. Etenim cum discendi amore adductus ad illos etiam proficisci decreveram, qui literarum gloria ubique florent, ad tuam curam pertinere putabas, providere, ne qua indigentia destitueret conatus

7

tus meos, aut sumtuum magnitudo pater-
nis facultatibus majus, quam par esset,
detrimentum afferret. Posteris tempori-
bus tantum abfuit, ut liberalitatis tuæ fon-
tes exarescerent, ut in hunc usque diem,
quo animo sis erga studia mea, intelligere
mihi contingat; & per omnem vitam,
quæ quotannis ad me redeant, expectare
jubeas. Certe eò magis illud prædican-
dum est, quò minus propter loci distan-
tiam & diversas occupationes officii quic-
quam Principi optime merito præstare
licet. Ista omnia cum diligentius consi-
derarem, quacunque tandem ratione il-
lud fieri posset, enitendum putavi, ut
mearum rerum aliquid Celsissimo nomi-
ni tuo nuncuparetur. Etsi vero tanti non
faciebam ingenii mei labores, ut dignos
existimarem, quibus Illustres oculi adhi-
berentur, effecerunt tamen amicorum ju-
dicia, ut quæ de Virtute paranda ante bien-
nium, & quod excurrit, edideram, ali-
quot Orationibus locupletata denuò pro-
dirent in lucem. Quorum postulatis hoc
minus repugnare libuit, quod studium &
obser-

observantiam meam erga celsissimam tuam
 dignitatem declarandi occasionem mihi
 viderer consecutus. Quamvis autem parum
 huic rei convenire existimentur, quæ ad
 Scholas pertinent; tamen, nisi fallor, &
 in illis quædam reperiuntur, à quibus non
 plane abhorreant, qui omnem bene viven-
 di disciplinam sibi curæ esse debere judica-
 verint. Ne dicam, Illustrissimos quosque
 illud cum Sole commune habere, ut quem-
 admodum humilioribus locis radios suos
 hic minime subtrahit, ita & illi ad exigua
 sese interdum demittere haud graventur.
 Quæ vero pro Pace sunt dicta, ne à quo-
 quam sit aliena, minus verentur: non tam
 freta dicentis auctoritate, quam Exsulis
 illius, ad quem revocandum pertinent,
 desiderio; quod in omnium animis jam
 diu excitat communis patriæ calamitas, &
 nisi moderata succurrant consilia, immi-
 nentis exitii metus. Tibi igitur Clementis-
 sime Princeps non improbari hoc studium
 confido: qui, quod maxime debui, Illu-
 strissimum nomen tuum absens colere at-
 que venerari alia ratione non poteram;
 præci-

9

præcipue his temporibus, quibus ad majora nihil otii mihi est reliquum. Deum nostrum supplex oro, ut pacem & tranquillitatem universæ Germaniæ reddat propitius; itaque gubernet omnium animos, ut tot hominum vota ne velint impedire; te vero patriæ meæ quam diutissime servet incolumem & felicem: qui ut illustrem gratiam, quam hætenus erga me licet immeritum expertus fui egregiam, clemens conserves, humili prece contendo. Stralefundi Idib. Martii clō Id c XLV.

CELSISSIMAE ET SANCTISSIMAE
DIGNITATIS TUAE

Humilis ac devotus Cultor

BENEDICTUS BARRIUS.

Ad Clarissimum Virum

BENEDICTUM BAHRIUM,

Cum aliquot Orationes, & de Virtute Paranda
Dissertationem publice ederet.



*Q*uia præcipua est recte sentire, deinde
Quæ sentias, posse eleganter eloqui.
Sed nos quisquiliis plerumq; obtrudimus
Orbi,

*Nugas canoras, & sonos evanidos.
Florida succinctæ vendunt uti fæta puellæ,
Odora paullum, sed voluptatem brevem.
Aut nos cordatos sensus corrumpimus ultro
Orationis fœculentæ sordibus.
Quam diversa tua est facundia, candidæ Bahri,
Densata rebus, dictione splendida!
Non hic ingenii turgentia commata vani,
Non mimicæ non futes ar, utiæ;
Sed sermo comptusque & adequans pondera rerum,
Qualis venusto celebris ætæo Fagus
Non liquidas duntaxat aquas, sed divitis auri
Ramenta ducit, bisque ditat accolas.*

VINCENTIUS FABRICIUS I. V. L.
& Reip. Dantiscanæ Syndicus.

BENE-

BENEDICTI BAHRII

P R O

PACE EXSULANTE

O R A T I O

Publice habita in Schola Stralsundienſi,
cum Ampliſſimi Senatus nomine Pro-
rectorem muneri ſuo præſe-

ret. 111. Id. Maji

clō 15 c XLV.

*Magnifici Dn. Conſules, Ampliſſimi Curatores, Reve-
rendi, Conſultiſſimi, Experientiſſimi Doctores; Ec-
cleſiarum Paſtores vigilantiffimi, Senatores pruden-
tiſſimi, aliorumque ordinum quotquot conveniſtis,
Doctiſſimi, Spectatiſſimique Viri, Patroni, Fauto-
res & amici honoratiſſimi.*



Ta comparatum eſſe cum rebus hu-
manis, ut plerique maxima quæq; vi-
tia ſiſis objiciant ſecuris, eaque cala-
mitoſiſſima omnium exiſtiment tem-
pora, quibus ipſi vivant, neminem
veſtrum dubitare arbitror. Etenim
fortuna & infelicitas hominum animis ita dominan-
tur, ut quid rectum pravumque ſit, perverso judi-
cio inde cognoscatur, & optima conſilia pro peſſi-

mis habeantur, si successu careant; quæ vero feliciter evenerunt, ita suis tribuantur auctoribus, ac si præclara quæque cogitaverint: cum non minus ab honestate remota fuerit agendi libido, quam à prudentia decernendi ratio. Neque vero hanc esse hominum consuetudinem, mirum cuiquam videri debet. Sicuti enim pro amore, quo nos completimur, ea præ cæteris sensu percipimus, quæ prospera nobis aut adversa eveniunt, seposita illarum rerum cura, quæ ad alios pertinent; ita etiam quæ nostris temporibus accidunt, tanquam æquales, universi quam maxime sentimus. Ideoque vel propter jucundiora impensius gaudemus, vel propter graviora altius gemitum ducimus. Quanquam nescio, qui fiat, ut adversa omnia tenacius conserventur hominum memoria, quam prospera. Ista omnia recte ne fiant an secus, nostrum nunc non est disquirere; neque, si quid horum perperam fiat, ab altiori sapientia remedium petere. Illud certum, si quandoquam querendi fuit mortalibus necessitas vel occasio, nobis, qui in hæc tempora reservati sumus, minime illam deesse. Ne quid dicam de reliquis universi orbis partibus, quæ terra marique nobis innotuerunt: quis quæso in Europa vel angulus, quem non infestent bella atque discordiæ, eæque vel civiles vel externæ? quibus quæ mala adhæreant, nemo nostrum ignorare potest, nisi qui cum bellis, & quidem civilibus, nati sunt atque educati. Hi enim sicuti pacis & otii nunquam perceperunt commoda, ita bellorum & tumultuum adversitates facilius ferunt: quippe qui hanc virtutem ex consuetudine

dine infelicitè agendi & ignorantia alienæ prosperitatis consequuntur. Ego quidem, cui his temporibus ex hoc loco quædam erant dicenda, malebam, pacis otia laudari, ejusque studia commendari posse, quam querelas propter bellorum frequentiam effundi. Quia vero istud vel justissimi numinis ira, vel bella gerentium libido, aut, si quæ est, necessitas nobis invidet; & de pace aut bello aliquid dicendum, propter circumfusum armorum strepitum vel otii desideria; pro pace in exilium acta causam dicere constitui: non quod in judicio versari me, aut clientis adversariam hac oratione reprimi posse putarem; sed quod illud negotium homine Christiano & pacis amante non indignum fore arbitrarer. Quod ipsum si minus ita præstare liceat, ut quamprimum revocetur, illud effecisse satis erit, ne sua culpa tam diu Christiano orbe exsulare credatur. Vos autem Viri omnium ordinum honoratissimi magnopere rogo, ut, quibus desideriis exsulem nostrum cupiatis restitui, eadem benevolentia pro illo verba facientem audiat. Qui pro illis laborant, quos multorum suffragia propter virtutis invidiam & fastidium extorres esse voluerunt, id sibi negotii dari credunt, ut singulis ob oculos ponant, quæ & quanta Reip. commoda una cum illis ejecta; quæ sperari queant, si quamprimum restituantur: tum quæ calamitates & damna illata ab his, quorum malevolentia & odio fuit cedendum: denique ut objecta crimina & causæ, quæ aliquampræ se ferunt speciem, diluantur. Pacem cum Bellona ita committere, ut illius, sicubi floreat,

commoditates; hujus vero, quæ consequantur mala, exponantur, non ita fortassis est necessarium. Initio quidem bellandi cupiditas jucunditate aliqua afficere homines videtur, ubi pacis diuturnitas tædium aliquod attulerit, aut, sicuti fieri solet, novarum rerum studium & expectationem: ast ubi nulla neque mora neque lassitudo illud effecerit, ut discordiæ & bella sopiantur; tum demum amissum agnoscunt bonum: tum apparet, quanto satius fuerit, vel iniquam pacem bello anteferre. Etenim rebus vel omnino non turbatis, vel celeriter tranquillatis, omnia florent, templa sanctorum & piorum hominum laudibus, quas Deo cantant, perstrepunt; sacri coetus frequentes celebrantur, & tranquille agitur æternarum rerum cura; sua securitate gaudent civitates & Resp. sine tumultu reguntur, optimarum artium & disciplinarum studia coluntur: ipsa denique natura lætatur quasi, se non impediri, quo minus frugum ubertate, copia & utilitate, hominibus declaret conditoris benignitatem. Contra ea, quid usquam malorum esse potest, quod bella non adferant? Diruntur ædificia, quæ in sacros usus crexerat majorum pietas; antistitum & sacerdotum stipendia, quæ illorum liberalitas pro æternæ salutis cura dependi voluit, ad perniciem humani generis convertuntur; pro psalmis & laudibus omnia querelis & ejulatibus resonant: lugent civitates, tantum non squallore obsitæ; oppida olim florentissima ita jacent prostrata, ut inter ruinas & cadavera vix veterem agnoscere liceat formam: artes liberales, earumque studia, quibus animus excultus non minus

alii

aliis auxilio, quam sibi presidio esse potest, una cum matre sua exterminantur; succedit ferocia ingeniorum, quam inducit bellorum lascivia. Ipsa vero omnium nostrum parens natura moerore afficitur, non tantum quod sæpissime sua beneficia contumeliose rejiciantur & improbe conculcentur, sed etiam, quicquid metallorum, mineralium aliarumque rerum produxerat in usus humanos, ita corrumpatur, abusu hominum & nocendi studio, ut dubium pene sit, utrum divina benignitas majora suppeditet malitiæ instrumenta, quam egestatis solatia. Sed ista omnia quosdam tantum afficiunt, & quidem illos, qui à bellicis negotiis remoti in urbana tranquillitate vitam degere consueverunt; minime vero quibus in bello maxima ætatis pars transacta: idque eo minus, quo proclivius illis esse videtur rem suam ex alterius calamitatibus augere, & ex aliena miseria æternam nominis consequi famam. Ego verò cur ita cum vulgo sentiendum sit, nihil habeo causæ. Ne quid enim dicam de metu; qui, si præstantissimi Imperatores à devictis metuantur, malus est diviturnitatis custos; si ipsi metuant, acerrimus tranquillitatis hostis; agite consideremus eorum fortunam, quibus quidem ista ratione metus tantum damni dedisse haud videtur, quantum æqualium invidia, & ab iis derivatum in illos Principes odium, quorum commodis, securitati & gloriæ militaverant; vel nimia felicitatis & virtutis apud suos opinio. Alcibiades Atheniensium præstantissimus partem felicitati suæ virtutem addiderat, Vir omnibus temporibus & locis maxime idoneus, ita quidem; ut nihil

ei neque natura neque ingenium aut industria negarent. Sed non minus periculi ipsi quam hostibus afferebat nimia fortunæ indulgentia, & singularis bellandi prudentia: quæ cum tanta in eo essent, ut nihil non efficere posse crederetur; in maximam civium suorum invidiam incidit, postquam classe in Asiam profectus minus ex sententia rem gesserat. Nam propter ingenii & virtutis opinionem, quam tot victoriæ confirmaverant, negligentia illius tribuebant, aut malitiæ, si quid minus prospere gestum. Accessit metus & amor, cum non minus diligeretur propter adauctam Reip. gloriam, quam metueretur, ne istis rebus elatus dominatum concupisceret. Sed quam instabilis sit ista conjunctio, suo exemplo comprobavit: cum, de quibus bene erat meritis, vitæ illius tam diu sunt insidiati, donec violata amicitia telorum multitudine confossus occumberet. Datame, duce Regis Persarum, quis unquam inter Barbaros scientia rei militaris clarior, in consiliis capiendis sagacior, virtute præstantior, & felicitate superior? Sæpe nondum ad hostem credebatur pervenisse, & erant bella jam confecta; celeritate vincebat, quibus copiis erat inferior: quæ ab amicis in bello perfide non minus quam malitiose interdum erant cogitata, ad suam salutem, qua erat prudentia, convertebat. Sed præcipuum laboris & virtutis præmium fuit aulicorum invidia: qui cum illum unum pluris quam se omnes fieri viderent, id agendum existimabant, ut suo consensu & instinctu Artaxerxes adductus de præstantissimo duce opprimendo cogitaret. Plus valuit omnium re-
gionum

gionum moribus male feriatorum falsum crimen, quam unius innocentia & virtus. Mittebatur exercitus centum & septuaginta millium præter levis armaturæ milites, restitit feliciter Datames ne vigesima quidem militum parte adjutus. Vnum igitur illud restabat, ut cujus virtutem & prudentiam tanta multitudo superare non poterat, simulata amicitia periret: quod ipsum ut successu non careret, ita Rex intentus fuit unius cædi, ut provincias suas vexari, expugnari castella, & magnas agi prædas pateretur, modo esset, qui simulata adversus Regem inimicitia illum perimeret, qui omnes consilio & virtute, neminem perfidia vicerat. Prætermitto nunc exempla Magni Pompeii, Iulii Cæsaris, aliorumque belli ducum; quibus fortuna ita videtur indulgisse, ut majores in pœnas servaret. Nostra memoria formidabiles fuerunt universæ Germaniæ insignes duo imperatores; sed quæ alia fuit fors utriusque, quam ut alter, quæ illius erat felicitas, Bellicosissimo Regi in prælio succumberet; alter, quod perduellis esset judicatus, ab iis tantum non mactaretur, quibus toties superbo imperio metum incusserat. Usque adeo certum est; maximo malo esse belli Ducibus, quæ præ cæteris magnopere expetenda illis vulgo creduntur. Hos igitur si non raro humanarum rerum imbecillitas & fortunæ varietas affligit, quid quæso sentiendum de cæteris, qui bellicis negotiis occupantur? nisi quis putet, meliori illos loco esse, quod graviter cadere nequeant. Verum quid attinet pluribus hæc disserere, cum nemo cui sensus inest, majora pacis quam belli commoda

-51011 C esse

esse unquam negaverit. Ad causas deinde accedendum est, quapropter minime expedire videatur, pacem esse. Harum vero quanta seges! quam ingeniosa gens humana ad illas excogitandas, ne quid desit, quod perdendi necessitatem videatur afferre. Hinc, si qua vel armorum fiducia vel felicitatis spes, tot bella quot Principum litigia & odia: cum ista non nisi ultima tuendæ salutis remedia esse oporteret, tum demum adhibenda, postquam nulla ratione alia id effici potuerit, ut cives conservarentur & inimicorum prohiberentur maleficia & injuriæ. Sed unde tantum boni, ut quæ sancta & casta esse debeant, multorum temeritate & libidine non pervulgentur? Quorundam tantus est furor, ut capitali odio dissidentes ipsi cadere haud vereantur, modo sua ruina, quos velint, prosternant: Quosdam poenitet, tardius bellorum causas vel in speciem tales reperisse: id quod populo Romano aliquoties accidisse, memoriæ prodiderunt, qui Reip. eorum fuere amicissimi. Sed nisi fallor, omnes belli causas conquerere ultra ingenii humani vires non injuria quis putet, subnascentibus quotidie aliis atque aliis: quasdam tamen afferre non alienum erit. Propter Religionem jamdudum bella gerere placuit; vel ut Pagani idolorum cultu profligato vi coacti Christianam amplectantur; vel ut perperam sentientium animis error, uti jactatur, armis adhibitis evellatur; vel denique, ut eorum resistatur libidini, qui omni crudelitate dissidentes, licet innoxios, persecuti, animorum libertatem atque corporum securitatem eripere haud verentur. Fac, pietatis studio incensos bellandi mole-

molestiam minime fugere quosdam Christianorum Principes; quamvis omnino persuasum habeam, aliud illos sæpiissime agere, aliud velle videri. Etenim qui locorum commoditatibus adducti longinquas expeditiones susceperunt, idque propter religionem facere se jactitabant; quis dubitet, quod eventus docuit, lucri potius & prædæ quam pietatis causa profectos esse; religionem vero ideo consiliis suis obtendisse, ut simplicium animos ad pericula subeunda pertraherent, & avaritiam, ambitiosam augendæ potentia cupiditatem, & crudelissimam tot hominum mactationem falso titulo occultarent? Verum sit in illis præcipuum Religionis amplificandæ studium, ideoque fana Deorum gentilium una cum suis antistitibus & cultoribus evertant; ut in locum supersticiosæ idololatriæ genuinus Dei succedat cultus, & in amplissimas regiones indigenis orbatas novi homines tanquam Ecclesiarum coloniae deducantur? Quis tandem ejusmodi propagandæ Religionis rationem illos docuit? Profecto Servator noster non isto pacto hominum saluti ut consulere-tur præcepit; longe alia remedia adhibuit, & Apostolos adhibere docuit. Salutari enim opus erat doctrina, ut homines ab errore ad veritatem reducerentur; miraculis divinis, quæ fidem conciliarent dictis, & in animis hominum veritatis opinionem; vitæ denique innocentia, ne mores & vivendi consuetudo à præceptis dissiderent. His armis instructos dimisit non tantum Apostolos, cum in terris versaretur, sed etiam mundo eos reliquit, vitæ, doctrinæ & miraculorum non minus testes incorruptos,

quam assiduos præcones. His rebus effectum, ut erroribus exentis, tenebris discussis, superstitione profligata, & impietate dissipata, animi hominum, radiis divinæ gratiæ, quæ piis laboribus deesse non poterat, illustrati, ad veritatem, lucem, veram fidem & pietatem converterentur. Priscos Ecclesiæ Doctores aliter faciendum existimasse, nuspiam, quæ nobis reliqua sunt, eorum monumenta docent. Quod si Hipponensium ille antistes Augustinus nemendacium quidem dicendum statuatur ob salvandum proximi animum ab æterna damnatione, quid de illis pronuntiaturum fuisse dicemus, qui facinus Christiano nomini maxime contrarium ausi sunt, ut Christianorum numerum augerent; & cruenta inierunt consilia, ut illustri appellarentur cognomento. Quamquam fortasse non multum quis repugnet, quo minus hoc tribuatur illis, qui tantum sanguinis ubique fuderunt. Scimus quidem, priscam Ecclesiam sanguine rigatam quam maxime crevisse, verum non alieno, sed suo; non ut Christiani fierent, qui nondum essent, sed qui erant, ne deficerent. Viderint illi, qui consilia à decretis Servatoris alienissima suggerunt, aut consensu vel studio adjuvant: alienam conscientiam licet fallant, suam certe nunquam decipient, multo minus illum fugient, qui summa justitia & æquitate orbem judicabit. Is certe maximo eorum malo tandem vindicabit exulantis Pacis injuriam, quam præ cæteris universæ Christianorum civitati tanquam fidum & bonum civem commendaverat. Accedimus ad eos, qui Religionis causâ bellum illis inferunt, qui eundem Deum fatentur,
ab eo

ab eodem Salvatore nomen gerunt, eodem Baptismo initiantur; sed in quibusdam dissentiunt, ita quidem, ut nimia potestatis insolentiam averfentur, vel superstitiones rituum quorundam fugiant, vel pro veris habere nequeant, quæ fidei puritati videantur adversari. Centum amplius anni sunt, quando Ecclesiæ malis remedia adhiberi sunt cœpta; his vero opus fuisse ne isti quidem diffitentur, qui cum illis, qui adversus dissentientes bella gerebant, in rebus fidei eandem tenuere sententiam. Res quidem antea sæpius tentata, sed sequiore successu: nisi quod Waldensium cœtus plane exterminari nequiverit. Vbi vero animi hominum proniores aliquanto exstiterunt ad ea repudianda, quæ saluti suæ officerent, & ad ea amplectenda, quæ ad cultus incorrupti puritatem pertinere crederent; tantum bellorum Christiano orbi incubuit, ut neque dum incendium illud sit testinctum. Sed & tum apparuit non minus consiliorum vanitas, quam eventus infelicitas. Etenim verum esse, quod priscis & proximis post Apostolorum tempora seculis Ecclesia declaravit, nostra etiam secula confirmaverunt; ferrum, flammæ, publicationem bonorum, exsilia, proscriptiones, nihil valere in Religionis negotio; eaque ratione citius animam extrahi corporibus, quam opiniones religiosas hominum evelli animis: quin irritare ista omnia potius morbum, qui talis putatur, menti in hærentem; quam sanare. Cumque armis defendere, justum putaretur, quod armis petebatur, utrinque cruenta fuere consilia. Alteris persuasum erat, coelum mereri, qui suo periculo dissentientes vel

ejiceret, vel prorsus deleret: alteris, futurum, ut
gloriæ suæ post hanc vitam non parum accederet,
si posthabitis uxore; liberis, facultatibus, dignita-
tibus, periculis denique, & omni acerbitate fortiter
adversus hostes pro libertate sentiendi & opinionum
suarum veritate decertarent. Hinc discordiæ, se-
ditiones & bella civilia in Galliis & Germania: a-
vulsæ ab Hispanorum imperio integræ provinciæ,
neque dum in potestatem redactæ. Mutua odia, quæ
tum concepta in principum animis, hæreditate qua-
si ad posteros derivata adhuc gliscunt. Huc scilicet
spectabant præpostera eorum consilia, qui Ecclesiæ
curam ad se pertinere gloriabantur, & suum esse
providere, dictitabant, ne quid Resp. Ecclesiastica
detrimenti caperet. Sane ad evertendam publicæ
rei tam profanæ quam sacræ salutem commodior
non poterat excogitari ratio, quam qua illi Ecclesiæ
commodis consultum ire volebant videri. Erant in-
ter gentiles variæ Philosophorum sectæ, nemo ta-
men eorum, quod sciam, diversa sequentibus tam
implacabile unquam indixit odium, ut bello dissen-
tientes persequeretur. Amicam sibi fatebatur prin-
ceps Philosophorum veritatem, neque tamen pro-
pterea inimicos appellabat Socratem & Platonem,
licet ad reprehendendas aliorum sententias maxime
proclivis. Cicero Academicus, vel, si mavis, nulli se-
ctæ addictus, familiariter cum Torquato Epicureo
vivebat; Lucillius Epicureus Senecæ Stoico arctissi-
ma amicitia erat conjunctus; qui tanti etiam faciebat
Epicurum, ut præclaras illius sententias epistolis suis
interfereret, & lubens fateretur, se in castra illius in-
terdum

rerum transire, non tanquam perfugam, sed tanquam exploratorem. Et si vero horum consuetudo neque leges nobis ferat, neque præcepta tradat, quid in vita sequendum sit, aut fugiendum; illud tamen constat, gentiles æquo animo talisse diversam de Summo Bono tenentes sententiam, cum dissensum hunc omnium arbitrarentur gravissimum. Ecquis vero præter Servatorem, Apostolos, & antiquæ Ecclesiæ prudentissimos Doctores veram, quod hoc negotium attinet, viam monstrare, & suo exemplo informare nos potest? Cum plurimi eorum, qui hætenus operam dederant Servatori nostro, offensi ejus sermone deficerent, ne quidem illos retinuit; tantum abest, ut paratissimis ad obsequium Angelorum legionibus abuteretur ad eos persequendos. Cum eidem per civitates suas iter Hierosolymam versus facienti ex Samaritanis quidam nollent ulla in re commodare, idque more suo, propter perpetua cum Iudeis dissidia; discipuli vero, ut hanc inhumanitatem igne cælitus ulcisci liceret, magnopere rogarent; vehementer illos objurgavit, tanquam nescios, mansuetudinis & pacis Magistrum esse quem sequerentur; se enim in mundo adesse, non ut perderet, sed ut servaret. Neque aliter affectus fuit erga Petrum, cum educto gladio Malchi aurem intumultu præcideret. Quæ omnia si homines isti dissimulare velint tanquam nullo pacto ad se pertinentia; est enim usitatum humanæ naturæ, ut sicubi in sacris decretis & exemplis falso interpretandis ingenio abuti nequeat, tanquam aliena illa repudiet; quomodo apertius illorum sive libidinem sive impruden-

prudentiam cohibere potuit, quam cum adversaretur sub aliena persona eorum voluntati, qui zizania de tritico putabant evellenda? Quam fidem ea in re Apostoli præstiterint Domino suo, Acta eorum testantur, quæ Lucas memoriæ posterorum prodidit. Neque aliter unquam in prisca Ecclesia actum esse reperimus; aut in dissidentes, Schismaticos vel Hæreticos sævitum, quin reprehenderent illud modestioris ingenii viri. Prætermisiss multorum testimoniis unus atque alter sufficiat, & in his Princeps Augustinus; cujus verba quin adducam, intermittere non possum. Is cum Manichæos compellat, Illi, inquit, sæviant in vos, qui nesciunt, quo cum labore verum inveniatur: & quam difficile caveantur errores. Illi in vos sæviant, qui nesciunt, quam rarum & arduum sit, carnalia phantasmata piæ mentis serenitate superare. Illi in vos sæviant, qui nesciunt, quanta difficultate sanetur oculus interioris hominis, ut possit intueri Solem suum. Illi in vos sæviant, qui nesciunt, quantis gemitibus & suspiriis fiat, ut ex quantulacunque parte possit intelligi Deus. Postremo illi in vos sæviant, qui nullo tali errore decepti sunt, quali vos deceptos vident. Ego autem sævire in vos omnino non possum, quos sicut me ipsum illo tempore, ita nunc debeo sustinere, & tanta patientia vobiscum agere, quanta mecum egerunt proximi mei, cum in vestro dogmate rabiosus & cæcus errarem. Arrianos omni tempore pro Hæreticis fuisse habitos, ignorare non possumus; tanta tamen modestia de illis pronunciat Salvianus, ut, cum existimet errores illos non tam malitiæ quam ignorantie imputandos esse, scire

scire quenquam neget, qualiter propter falsæ opinionis errorem in die iudicii puniendi sint, nisi iudicem. Sane meliori illos loco esse arbitratur quam Catholicos, qui scientes & prudentes facere haud verentur, quæ omittenda noverint; quod ignosci aliquatenus ignorantia possit, contemptus vero non mereatur veniam. Ita quidem sanctissimi viri; quorum auctoritas, miror, cur ita parum valeat apud complures, precipue illos, qui sibi solis hæc studia vindicare conantur. Sint Hæretici quos persequuntur; quanquam mallem istud potius considerari, quod ex Augustino in causam retulit Canonici juris Collector; interdum, qui foras mittitur, intus esse. Verum sint, uti dixi, Hæretici, quos tales esse volunt; num propterea flammis exurendi? ferro perdendi? bona eorum publicanda? in exilium mittendi liberi? Fallor, aut non magnam à summo iudice inibunt gratiam, qui, quod sedula institutione & salutari doctrina, si quis error obreperet; vitæ innocentia, Christiana mansuetudine ac verborum modestia corrigere deberent, cruciatibus & persecutionum acerbitate exterminare prorsus satagunt: quibus obfirmari potius animos quam frangi compertum est. Pluribus hæc differerem, nisi loci & temporis ratio me prohiberet: & omnino de illis vere dici posse crederem, quod Bernhardus, cum ad Eugenium Papam scriberet, Vides, ait, omnem Ecclesiasticum zelum fervere sola pro dignitate tuenda: honori totum datur, sanctitati nihil aut parum. Hinc ista mala, quæ in hunc usque diem nos premunt, in Ecclesiam illata. Sive igitur avaritiæ studio ducti, aut ambitionis; sive incon-

fiderato zelo impediunt , quo minus tot bellorum
 moleſtiis tandem exſolvamur , immerito ſane pacem
 propter iſtas cauſſas exſulare quis ambigat ? Reſtat
 ut de illis dicamus , qui , ut liberum Religionis , uti vo-
 cant , negotium in urbe aut regione ſua tueantur ;
 hoſtes , à quibus eo nomine infeſtantur , repellunt .
 Sane ſi quod bellum Religioſum ulla ratione juſtum
 fit , hoc ipſum tale videri poſſet . Quid enim juſtius ,
 quam à ſe ſuorumque cervicibus armis defendere a-
 liorum injuriam & maleſcia ? præcipue ſi nullis præ-
 cibus , neque ſuis neque amicorum , ſecuritatem impe-
 trare , vel pecunia redimere liceat . Qui non defen-
 dit vel obſiſtit injuriæ , ſi poteſt , tam eſſe illum in vi-
 tio pronunciat Tullius , quam ſi parentes aut amicos
 aut patriam deſerat . Verum ſi omnino non indigeat
 Religio armis & ferro ad ſui tutelam , non injuria quis
 dubitaverit de juſtitia bellorum , quæ quacun-
 que ratione propter Religionem geruntur . Etenim gravior
 Deo cultus eſſe nequit , quam ſi vera fide & ſpe Deo
 adhærentes , ea quæ recta ſunt faciant , & quæ prava
 ſunt , omittant ; unde Iacobus puram & immacula-
 tam Religionem eſſe affirmat , pietatem erga orphanos
 & viduas (quibus omnia veræ fidei opera ſine dubio
 innuit) exercere , & immaculatum ſe ipſum ſervare à
 mundo . Certe ut verus Chriſtianus , quæ ſibi ſunt
 propria , amittat , nemo efficere poteſt : quid igitur
 opus eſt armis defendere , quod eripi nequit ?
 At , inquiet aliquis , cito deſinent eſſe in terris veri
 Chriſtiani , poſtquam libere & ſecure non licet ſaluta-
 ria dogmata ſine labe hominum animis inſtillare .
 Etſi enim illis , qui ea jam perceperunt , perſecutorum
 odia

odia nihil noceant, cæteri tamen tanquam rudes rerum divinarum facile ad errores impelli & in devia seduci possunt : quod ne fiat, liberum exercitium ita est conservandum, ut qui contra quicquam audeant, armis, si aliter non licet, arceantur. Fateor, si quid afferri queat, ne bella pro Religione suscepta Servatoris nostri decretis adversari videantur, hoc unicum esse. Verum humanum potius hunc crederem metum; qui, ejusmodi bella ut justa sint, efficere nequit. Quin haud difficulter ademerit illum antiquorum Christianorum consuetudo; qui in persecutionibus nihil præter fugam licere sibi putabant : alii, quorum alacrior erat ad pœnas propter Christum subeundas animus, ultro cervices offerebant carnifici. Neque est, quod quis existimet, viribus illos & armatorum copiis destitutos non potuisse persecutorum multitudini resistere; animum vero minime illis defuisse. Etenim aperte illud negat Tertullianus, & Christianos maluisse vindices occultos agere affirmat, quam hostes apertos, etsi vis numerorum & copiarum minime defuerit. Thebæa legio, quod inprimis memorabile, ex Christianis militibus collecta, hætenus obsequebatur Imperatori Maximiano, quamdiu adversus hostem pugnabatur : post ubi sacra Diis falsis facere illos, idque cum recusarent, initio decimum quemque, deinde omnes interfici jusserat, arma abjecerunt; quod nefas esset, arma contra ferre, quos non nisi patientia munitos esse oporteret. Neque vero, quod metuebatur, propterea Christianorum multitudo decrevit; sed quam maxime ista patientia eorum Religio invaluit, ita quidem, ut ex sanguine

cæſorum ſemper pullularet nova Eccleſia. Equidem quod omnes contemnerent mundanarum rerum gloriam & ſplendorem præ amore veræ Religionis, qui Chriſtum fatebantur Deum & Servatorem ſuum; idque factis declararent, quod verbis profitebantur: non dubito quin major Chriſtianorum numerus eo tempore fuerit, quam poſtea, ubi univerſo pene orbe in Eccleſiam intruſo, id Chriſtianorum non pauci eſſe cœperunt, quod antea erant Pagani. Quæ licet ita ſeſe habeant, omnino tamen Magiſtratus eſt officium etiam Ethnici, quanto magis Chriſtiani, ut civium ſuorum ſalutem tueatur. Unde quoties licitum armata manu reſiſtere illi, qui perniciem Reipub. ſine cauſſa molitur, roties etiam cives & ſubditos defendere fas eſt; ubi propter Religionem ipsis imminet pericula. Verum, niſi fallor, hoc eſt bella illata propulſare non tam propter Religionem, quam propter ſalutem publicam. Multa enim exiſtunt, quapropter bellum inferatur; quæ non tam ipſa defenduntur, quam incolumitas civium, cujus turbandæ neque cauſſam iſta afferunt ſatis idoneam, neque neceſſitatem. Verum quod in aliis fieri ſolet, neque in hoc negotio prætermittitur. Efficax res eſt ad perſuadendum Religio; huic omnia deberi exiſtitant; idque eo magis, quod metus ſit, ne æterna ſalus amittatur, ſi quid illi decedat. Quod ubi animadverſunt ſagaciores, ſimpliciorum animos prætextu Religionis ſæpe ad ſe rapiunt, ut eorum ope adjuți, tanquam rem omnium preciſioſiſſimam vel propagaturi vel deſenſuri, opes, dignitates & potentiam adaugent. Quo ingenio plurimos fuiſſe legimus, qui
voca-

vocabulo Religionis, quam omnibus actionibus suis semper prætexebant, ad ambitionem & inexplebilem propagandi imperii cupiditatem mira calliditate sunt abusi. Et his quidem de causis plerumque bella geri solent propter Religionem, cujus appellatione & prætextu simplicioribus animis non raro illuditur. Quod si indelibeat transire ad alias, quæ Respub. inter sese, vel alias cum aliis, Reges cum Regibus & Principibus vel cum subditis suis committunt? tanta est earum multitudo, ut ne recensendis quidem illis sufficiat ingenium aut otium. Neque etiam id fieri nunc est necesse; cum, summam interdum bella gerendi necessitatem hominibus incumbere propter hominum contumaciam & injuriæ inferendæ cupiditatem, ne exsul quidem noster, pro quo dicimus, diffiteatur. Qui quidem ita est affectus erga omnes, ut exsulandi molestiam haud recuset, modo paullo post eò honestius restituatur. Unde intempestivum, sui amorem odit in illis, à quibus ita revocatur, ut vixdum ad portas admissus, è vestigio in diuturnum remittatur exsilium. Neque enim ighorat, hanc rationem redeundi in gratiam nihil esse aliud, quàm scintillas cineribus obducere, ut pro extinctis habeantur; interea vero spacium facere, & samenta colligere, ut erumpens flamma correptis lignis majore ambitu liberius vagetur. Quod ipsum ne fiat, suo damno & fugiendi acerbitate civium majorem & diuturniorem incolumitatem redimere haud gravatur; si quidem interea, qui arma sumunt, tam salutariter utantur, quam didicerint iis uti gloriose. Verum quoties absque hoc est, quis neget toties immèrito Pacem exsulare?

fulare. Aliis potentia vicini usque adeo est invisa, ut quocunque modo ipsi detrahendū censeant; unde dubio metu impulsī certum in periculum se suosque committunt: Et licet feliciter rem gerant, tamen nihil aliud afferunt nisi devictis servitutem & suis detrimentum; ne dicam, quantis sumptibus conservandum, quod aliis est ereptum. Contra, si impares sese videant, ad infausta deveniunt auxilia, pertractis in societatem quosunque licet: accedit deinde foederum necessitas, quæ invitos ad bella impellit; vel suscipienda, vel diutius, quam velint, gerenda; donec prostrata jaceant omnia. Ita dum aliorum potentiam student imminuere, vitam sibi reddunt inquietam & suorum turbant tranquillitatem. Alius nimio amplificandi imperii studio ductus omnia bello miscet, ut sublatis aut in potestatem reductis, quotquot cupiditati suæ adversentur, solus propter potentiam sit formidabilis. Alius propter negatum matrimonium bella gerit; stultus sane vel crudelis, quod gladio ita pectus aperire velle videatur, ut amorem instillet; aut levem contumeliam non nisi humano sanguine eluat. Alius novarum rerum studio veterem dominum aversatur, felicius ætatem se acturum ratus, si nemini vel alii pareat, quasi tanti referat, quis imperium administret, modo publicis commodis consulatur. Alii sedium mutandarum avidi fertiliores agros petunt, ac si satius sit periculosa adire, quam tutatenere. Alius non ante existimat arma ponenda, quam poenas dederint, qui adversus majestatem, quod plerumque in bellis civilibus evenire solet, deliquerint: cum delicta illa sæpe non à voluntate delinquentium

quentium proficiscantur, sed vel à ducum libidine, vel malevolorum interpretatione, vel externo bello, quod vicina plerumque involvit. Et si vel maxime quicquam peractum, quod à civium & subditorum officio putatur alienum; nonne melius est ignoscendo tandem aliquando sibi conciliare eorum benevolentiam, quam diuturna implacabilitate animos magis magisque irritare? Ita quidem judicabat præstantissimus ille Atheniensium Thrasylbulus. Cum enim Lacedæmonii per triginta Tyrannos urbem captam regerent, erepta libertate, Thrasylbulus autem patriam civitatem non minus prudenter quam fortiter tyrannide liberasset, legem tulit, ne quis antea actarum rerum accusaretur, neque multaretur; quod videret novas inde discordias orituras, quæ civium salutem, quam unice restituere laborabat, impedirent. Neque vero legem illam oblivionis ferendam tantum curavit, sed etiam, ut valeret, effecit. Atheniensium hanc rationem ut Romani post interfectum Cæsarem imitarentur, & inimiciis, contentionibus, injuriis, bellis, cædibus, exsiliis atque proscriptionibus perpetua oblivione sepultis, ad pristinam pacem & concordiam redirent, gravissima oratione in Senatu differebat Cicero; turpe esse dictitans, à qua urbe Majores ad constituendam Remp. leges accipere non essent dignati, illius exemplum in tranquillando civili tumultu à posteris contemni. Verum ut irrita essent, quæ paullo ante persuaserat, funesta effecit Antonii oratio; qui Concordiæ amorem simulabat, donec spe potentiæ jamdudum illectus Cæsaris cadavere ad nova bella excitanda abuti liceret. Quæ res tantam perniciem

ciem attulit Reip. Romanæ, ut non ante cessarent bella, quam deletis non tantum illis, qui libertatis se se profitebantur patronos, sed etiam ipsis factionum principibus, arma in Augustum cederent. Cui hoc facilius fuit omnes imperii partes complecti, quod discordiis civilibus fessæ nihil æque ac pacem anhelarent. Nobis vero, quo minus ex aliis faciamus periculum, quid tandem obstat, nisi quod sapere malimus ad hominum perniciem, quam ad tuendam incolunitatem? Liceat quæso Pacem exfulantem data quasi fide publica hoc loco adducere, Christianos qui inter se digladiantur, ita compellantem: Quo vobis mentes, qui à mansuetissimo duce & auctore nomen geritis? Me commendabat tanquam fidum ac bonum civem, cum è mundo discederet, & innoxiam ferre non potestis. Aut relinquendus erat nobilis titulus, aut concordia exprimenda Christi doctrina. Itane de vobis ille meritis, ut salutaris præcepti ne minima quidem esset auctoritas? Tantine criminis ego rea, pro qua ad deprecandum nihil valeant neque lachrymæ neque suspiria? Quousque perferetis civium querelas, piorum luctum, & desertarum regionum gemitus? Homines estis, & humanitatem exuitis, commune societatis vinculum. Tanta accedat cura & parentum sollicitudo necesse est, ut vel unicus adolescat filius; & nihil pudet conjuratione facta in vestram ipsorum conspirare perniciem. Ratione estis præditi & robore muniti, ut consiliis & auxiliis minuatis humanas necessitates; Sed nulla est verecundia tam crudeliter convertendi in mutuum exitium providentiæ munera. Christiani estis, quibus turpissimum est
non

non posse servare concordiam. Hostes vestri nominis averſamini, quasi Christiani sitis, qui tam cupide bella geritis. Est quidem cur vobis gratias agam, quod tandem post longissimas deliberationes eo res deducta, ut de me reducenda comitia habeantur. Verum periculum esse videtur, ne in limine retenta, aditu ad interiores ædes prorsus excludatur. Nolo tamen male ominari, nisi fortassis vestra perversitas meam contumeliam conjunctam esse velit cum ludibrio Summi Numinis: Cujus reverentia usque adeo animis vestris excussa videtur, ut quod in templis petitur, in curiis oppugnetur; & à quo ignosci vobis velitis, illius impediatis clementiam. Neque vero tam queror illatam mihi injuriam, quam vestram, qui ejicitis, miseriam. Mihi consuetudo exsilii calamitatem reddidit leviozem, vobis extrema quæque victoribus non minus quam victis imminent, nisi mitius mecum agatur. Cogitate, quanta mala secum bella ferant, quantas calamitates & damna; me vero nocentem nemo arguet, nisi quem animi sui vitia perdunt & abusus rei per se bonæ. Cogitate, qui innocentiam in cunis ferme relinquitis, & celeritatem nocendi pro virtute habetis; quod minus proclive sit arma ponere, quam sumere. Cogitate denique, quam difficile in bello sit studium sanctimonix; cujus qui est expers, pro clementia Iudicis, quam falso sperat, vindictæ sentiet acerbiter, quam in vita deprecatus est. Quod si illi, qui sibi vivere videntur, remotiores aliquanto ab illis negotiis, quæ frequentes peccandi occasiones suppeditant; nihilo secius ultro fateantur oporteat, præcipitem esse vitæ viam qua feruntur;

E

nunc

nunc saxis asperam, nunc sentibus obductam, nunc gurgitibus intercisam vel torrentibus rapidam, ut laborandum, hærendum, & cum magna cadendi sollicitudine gradiendum sit: Quanto impeditior hæc via sine dubio est illis, quibus voluptas est humanum sanguinem fundere, gloriam ex alterius miseriis comparare, suamque securitatem & licentiam alienis periculis vel servitute munire. Quomodo inimicis benigne facient, qui amicis etiam damna inferunt, ut illis tanto expeditius noceant? Quomodo ignoscent, qui levissimam contumeliam non nisi diris modis ulciscendam putant? Quale quæso erit justitiæ studium, ubi nemini suum relinquitur? Quomodo alienis abstinebit, qui inter rapinas vivit. Qualis integritas esse poterit, ubi doli & fraudes pro felicitate & prudentia habentur, si successu non careant? qualis innocentia, ubi ad perniciem & exitium alterius omnia convertuntur studia atque cogitationes? denique qualis pietas, ubi tot ac tanta impietatis exempla & vestigia? Equidem non ignoro eadem vos mecum fateri, qui discordiis & bello estis implicati; sed invitos ad bellum vos pertractos asseveratis. O homines, larvam detrahite animis vestris, & reperietis iram, avaritiam, ambitionem, suspiciones multorum bellorum existisse causas. At cavendum erat, ne ira conditorem vestrum deluderetis. Quid enim rogatis ut depellat, quod ipsimet vobis accersitis? Tantum abest profecto ut, quæ agitis, ille ignoret; ut ne cogitationes quidem vestras celare eum queatis. Sicuti magna pars profectus est velle proficere, & magna pars virtutis odisse vitia; ita etiam magna pars pacis est

est odisse bella & pacem velle ex animo. Vestris
quæso tandem consulite commodis, vestræ saluti, &
ne æterna, quod maximum est periculum, felicitate
excidatis, satagite. Vestram à vobis deprecor,
incolumitatem, dum ut me restituatis, contendo.
Si quem exsulare necesse est, adversariam meam,
tanquam seditiosum civem & omnis tranquillitatis
turbatorem ejicite. Quod si aliud mihi non est re-
liquum, versibus saltem querulis ut ferociam illius
prosequar, permittite.

Heu nimium Bellona ferox atrocibus ausis
Dudum Europæos horrenda cæde cruentat
Campos; infestis signis odiisque perenni
Servatis studio fusus cruor imbuunt arma:
Dulcibus & priscos cultores exigit arvis
Dedignata modum bellandi sæva libido.
Usque calent sceptris Belgarum excita su-
perbis

Arma virum; lituoque vagas stridente per-
undas,

Æstuat armiferis constratū classibus equor.
Præcipitem Rhodanum tumido committit
Ibero

Bellica tepestas. Ruit in sua dāna Britannus
Longæ pertæsus felicia tempora pacis.

Incaluit Boreas gelidi septemque Triones;

Armorūq; citat sua plaustra referta Bootes:
Nec minus, infandum! nebulosus inhorruit
Auster.

Vultum mæsta jacet sibi post sua fata super-
stes,

Monstrorum domitrix quondam Germa-
nia tellus;

Lentaque spectanti luget sibi funera duci:

Dum fera cōmotas agitat discordia mētes,

Tristiaq; optatam conturbant arma quietē.

Tantum civili nunquam fatiata cruore

Bellandi rabies potuit suadere malorum.

Ita quidem Exsul noster, si pro se dicere posset.
Mihi vero etsi longinquo, liceat quæso, quicquid
orationis est reliquum, ad vos convertere, quot-
quot ab Imperatore, Regibus, Principibus & Re-
buspub. ad pacem faciendam convenistis, Legati.
Neque enim aliunde impetrari potest, ut civitati
sua reddatur, cujus causa fuit dicta; neque præter
vota & preces à nobis quicquam proficisci, qui per
literarum & sapientiæ studia ætatem transigere in-
stituimus. Quinque & viginti amplius nume-
ramus annos, postquam Germania nostra funesto
fato impelli, & in sese arma expedire cœpit; tanto
quidem ardore, ut imperium non minus præsidia
stabilitatis, quam ornamenta dignitatis tandem a-
missurum videretur. Interea quoties devicti sunt
adver-

adversarii aut negotium compositum, toties ex pro-
fligatorum ruinis & pace facta, nova renata sunt bel-
la; quod potentes amici dolerent prostratorum in-
felicitatem, aut excludi se gravius ferrent, qui post
bellorum molestias ad se quoque pertinere volebant
otii jucunditatem. Hinc suspiciones & discordiæ;
quibus facile est occupare hominum mentes timidi-
tate, imprudentia & ambitione jam antea infectas.
Alii securitati suæ metuebant ab illis, quorum præ-
sidio deberent esse tuti; alii credebant dignitatem
minui ab his, quorum benevolentia & consensu
muniri illam oporteret: adeoque & cives nullum
imperii esse modum. Magistratibus, & Magistratus
cives suos plus justo libertati studere arbitrabantur.
Utique igitur ad arma capienda incitati, ne aliis im-
perii titulo servitutem afferre liceret, alii vero, ne li-
bertatis tuendæ desiderium præ se ferentes intolera-
bile occultarent contumaciâ. Scissa proinde Resp.
in partes, earumq; studia conquiri cæpta sunt; utrinq;
vero dum bella gererentur acerrime, singulos ce-
pit publicæ tranquillitatis oblivio. Est enim usitatum
in rebus humanis; ut turbata Rep. ea tantum quæra-
mus, neglecta populi salutē, quæ in rem nostram
fore videntur, & imprudenter nimis arbitremur;
nostram nobis ab aliis sejunctâ esse posse fortunam.
Successit perennis in patriam calamitas, cum neque
victi quiescere possent, neque victoribus securos es-
se liceret; & in armorum societatem pertraherentur
externa regna, ut quod suis quisque non posset; a-
lienis opibus tueretur aut recuperaret. Nihil deni-
que malorum superest, quod ex hoc fonte non re-
dun-

dundaverit. Squalent sine colonis agri, & abactis populando jumentis inter fulcos relinquitur aratrum; ferro & igni vastantur regiones, fumantque passim incensa tecta. Omnibus ante portas fere bellum est; plurimos etiam intra moenia vexat, & in ipsas domos persequitur. Deserta loca infelices habitant aves, quibus non aliunde cibum petendi facta est potestas nisi ex immani caesorum strage. Maria etiam inquietantur; tanquam ad mortem nimis angusta sit terra, ne caedibus & sanguine ullus in orbe locus relinquatur vacuus. Ex his omnibus tanta oritur morum degenerantium pravitas, ut in exilium actis optimarum artium studiis, disjecta pietate, iustitia & probitate, ultra etiam quam duratura sit hæc bellandi ratio, barbaries & improbitas ne orbem obsideat, metuendum sit. Toties licet respirandi tempus concessum videatur; in diversa deductis exercitibus; tamen non nisi in poenam renascimur; neque quicquid interea succrevit, alienis unguibus infestatur, instar Tityi cujusdam, sed suis dentibus viscera crodit misera Germania, eorumque, quos ad tristes epulas invitavit periculi metus & sui defendendi cura. Ita quidem in nos viri sumus, in nostram ipsorum armati perniciem; & quod extremum est; ipsi excitavimus tot ac tam graves procellas, ex quibus non nisi vestra opera, Viri eminentissimi, ad incolumitatem pervenire nos posse speramus. Magna vis est unum & idem sentientis Senatus; & eo animo vos convenisse credimus, qui à quietis consiliis non abhorrens rationem sequi malit, quam fortunam; quæ sicuti plerumque fallax, ita neminem

magis decipit, quam qui incertos casus parum reputat. Quid igitur obstat, quo minus optata pace tandem fruamur? Publica vox est, quæ intra hos parietes emittitur, ex tot gemitibus ac suspiriis conflata. Liceat igitur vestris auspiciis, ad quæ omnem salutis spem convertimus, pacatam expectare senectutem, quorquor inter bellicos tumultus educati sumus, aut civilibus turbis implicati mediam exegimus ætatem. Quid juvat armis & castris dissidere, quos conjungere debet sanctissimi nominis memoria & commune periculum, quod à Christiani nominis hoste imminet? Satis datum est dolori, satis suspicioni, satis civilibus dissidiis, quæ ne in odia erumpant internecina, ejusvis est providere. Sive victor sit exercitus, sive cladibus acceptis, adversarii terreatur virtute, utrumque de otio cogitare oportet. Alteri enim certa pax tutior esse debet, quam sperata victoria, alterum belli satietas & fusus suorum sanguis ad quietam impellere debet consilia: neque justa sunt arma, quæ ideo capiuntur, ut ad internecionem potius pugnetur, quam ut in pace tandem vivatur. Non indignamur moram, neque tempus à vobis duci præter causam querimus; modo ne frustrentur desideria nostra, & dum omnes Remp. salvam cupimus, partim studiis, partim consiliis à communi utilitate aberretur. Grave est, hominem homini in periculo non succurrere; quanto gravius est, ad quorum fidem turbata regna spe tranquillandi confugiunt, ab illis committi, ut neque suo neque alieno sanguini parcatur. Vitam enim eripuisse creditur, qui, ne servaretur, mora effecit & negligentia.

tia. Excitate tandem, excitate afflictam Germaniam;
& ne salutaria consilia quorundam perversitate, aut
nimia solitudine, aut ulciscendi studio, si qua of-
fense memoria est reliqua, superentur, prohibete.
Quod si tam diu bella gerere libeat, donec altera
pars victa manum dederit; non pacem nobis dabit
ista victoria, insolens quippe & rectis consiliis ini-
mica, sed servitutem: quæ quanto gravior est ere-
ctis animis, eo celerius ad asserendam libertatem
vel inermes impellit. Quæ vero vita eorum, quos
ita angit timoris cruciatus, ut, quia semper habent
quos metuant, sine armatorum præsidio tuti esse
non possint, & securitatem suam mercenariorum
fide & robore metiantur potius, quam subditorum
caritate? Nihil fortasse neque ad concordiam ap-
tius, neque ad fidam & diuturnam pacem firmitus,
quam si bella civilia omnium salute ante restinguant
prudentes viri, quam devicti oblatas condiciones
accipere cogantur. Ista enim raro temperat æqui-
tas, & non semel fuere infelices, qui victoriæ mo-
dum, animi iracundia maluerunt definire, quam Rei-
pub. salute. Jure videtur Germania delecta, in
qua sicuti civilis belli suæ vicinis etiam regnis
molesti fuerunt excitati, ita in eadem aliquando de-
tumescent. Quam felicitatem vestra cura, diligen-
tia, opera & consiliis, Christiano orbi, satis diu in-
voluntarium ruenti interitum, eventuram esse, ani-
mus vester confidere jubet, qui dudum ad bene spe-
randum signa quasi sustulistis. Quo quidem studio
nihil vel ad dignitatem amplius, vel ad famam & o-
mnium temporum notitiam illustrius, vel ad totius
impe-

imperii emolumentum salutarius esse aut excogitari potest. Est aliquid, amplissima spolia detrahere hostibus, trophæa statuere, quibus locis feliciter pugnatum, ponere statuas, & in scriptis eruditorum bellicæ virtutis relinquere famam. Verum quis ignorat, multis modis illam deteri cum devictorum calamitate, & posterorum ægritudine, qui majorum clades sibi exprobrari gravissime ferunt; tum æqualium & suorum invidia. Quæ quidem tanta erat in Alexandro M. ut res gestas Philippi patris obtereret, ne immodico æstimatori sui minus liceret, quæ gesserat ipse, celebrare. Quinetiam quæcunque feliciter in bello geruntur, ea ne Imperatorum sint propria, militum virtus efficit, locorum opportunitas, auxilia sociorum, & postquam in concursu res à consilio abit ad vires vimque pugnantium, maximam partem quasi jure suo fortuna sibi vindicat. Qua de caussa Clytus Alexandro omnia ad se referenti, alieno sanguine partam gloriam intercipi responderebat, quod Trophæis Regum nomina tantum inscriberentur. At vestra, quæ nunc agitis consilia, vestra merita & beneficia, quæ nobis parari credimus, nulla ratione sui memoriam labefactari aut maculari patiuntur. Non ad cædes ista spectant & sanguinem fundendum, non ad ferrum & flammam, insidias & fraudes, non ad gentium everisionem aut agrorum vastationem; sed ad pacis & otii vias aperiendas, ad salutem civium, ad cohibendam armorum licentiam, ad revocandam fidem, ad securitatem singulorum, & reficienda omnia, quæ bellorum disjecit iniquitas. Illud agitur, ut in tranquillitatis

tatis studium reflectantur animi bellis assueti, & honestis ac firmis pactionibus dirimantur cruenta negotia. Non facile cessat flamma, quamdiu reliquum est quod corripiat, nisi hominum labore restinguatur; neque fluctus subsidunt ventis agitati, quamdiu per plana vagari atque terras inundare licet, nisi val-
la exstructa & moles oppositæ impetum cohibeant aquarum. Eadem est armorum consuetudo, consideratius illa interdum capiuntur initio, quam gerantur postea; addit enim aliquid temeritati felicitas, furori ultio, & audaciæ pericula. Nunquam sua sponte excidunt tractantium manibus, postquam nimia diuturnitate & ardore incaluerunt; nisi quieta tandem interveniant consilia, quibus incendia belli restinguantur, & omnis mali obstruantur fontes. Quæ felicitas quanto jucundior est acerbissimis illis calamitatibus, quæ ex bellis oriuntur, tanto gratior vestra, unde illam speramus, erit memoria, in omnævum sine dubio permanens: quippe non æri incisa, non lapidibus insculpta, neque in solis literarum monumentis conservata, sed in animis hominum penitus abdita. Hi enim posteros, ad quos uti periculi & turbarum, ita etiam securæ tranquillitatis venit hæreditas, vestri beneficii nunquam patientur immemores. Vicerat Timoleon Siculorum Tyrannos, ceperat qui adjutum illos erant profecti, maximas Carthaginensium fugaverat copias; nihil horum effecit, ut conditor urbium illius Insulæ existimaretur, nisi postquam inter incolas eam constituisset concordiam, ut non minus illi, quibus bello sua essent erepta, quam quibus aliquid acceperat, omnes
sine

sine querela discederent : & moenibus reparatis , fanis-
nisque reſectis civitatibus leges libertatemque red-
didisset ; tota denique insula tantum conciliaſſet o-
tium , ut priſtinæ calamitatis facile obliviſcerentur .
Longe melius de patria ſua meritis eſt Hamilcar ,
cum inſtino bello composito tantam Africanis red-
deret tranquillitatem , ut nullum in ea bellum vide-
retur multis annis fuiſſe ; quam poſtea , cum glorioſe
potius quam pro ſalute patriæ arma ſumturus , adhi-
bitis ſacris & jurejurando , puero Hannibali perpetuum
erga Romanos inculcaret odium . Hunc ſane
& ſuis cum quibus ſteterat , & hoſtibus adverſus quos
pugnaverat , æque fuiſſe inviſum , nihil eſt mirum .
Ita enim adverſarios odiſſe didicerat , ut grave ſibi
eſſe confirmaret , quicquid de pace & amicitia cum
illis cogitaretur : quæ res tandem effecit , ut ſponte
quidem dimitteret animam , odium vero non niſi cum
illa . Quid renovem memoriam Romanorum , quo-
rum in urbe Janus erat , belli index ſi apertus ; pacis
ſi clauſus foret ? Tanto celebratiora ſunt apud illos
clauſi illius tempora , quanto rarius evenit bellicoſæ
nationi pacatos circum omnes habere populos . Ne-
que hoc beneficio Numa tantum & Octavius fuere
illuſtres , qui , pace terra marique parta & finitimorum
animis amicitia , ſocietate ac ſœderibus junctis , Ja-
num claudēbant ; ſed & T. Manlii conſulatum ea-
dem tranquillitas maxime reddidit celebrem . Idem
vobis contingat necceſſe eſt , qui ut orbi noſtro pax re-
ſtituatur , magnopere elaboratis . Non tantum ad vos
pertinebit iſta gloria & inſtauratæ tranquillitatis fama ,
ſed omnes illos , qui quoquo modo cūnent , eadem

ætas nominis immortalitate donabit. Diversa forte consilia suggerunt, qui antequam oblivionis laudem consequantur, omnia excutere satagunt; & se veritatem plus prodesse dicunt, quam inanem clementiæ speciem, si qua offensiæ opinio est reliqua; quod nihil perniciosius videatur quam improbis hoc pacto relinquere, unde nequitia & neglecti officii exempla petant atque præsidia. Verum si ita agere libuerit, quis tandem futurus est omnium turbarum finis? quæ major imprudentia, quam dum, quod veremur, ita cavemus, ut quod mansuetudine & clementia adhibita evitare possumus, noxia severitate & periculosa mora ultro attrahamus. Quotusquisque dum alieni mali vindex esse voluit, sui detrimenti & eorum, quibus salutem debet, improvidus existit auctor! Numquid tandem digna sunt præcia, propter quæ tot classes, tot exercitus, tot tamque egregii amittuntur duces? Qui aliena appetimus, sæpe de nostris dimicare cogimur: & quicumque tandem futurus sit omnium eventus, plerumque damna, fastidia, fraus intestina, domesticorum insidia, & in rabiem conversa fortunæ sive mora sive indulgentia opprimere nos solent. Quanto jucundior res est vindicta, tanto majorem afferre solet perniciem; neque unquam terminos illa reperit, intra quos consistat. Delictum videtur, quicquid nos offendat, etiam præter illius voluntatem, quem poena dignum judicamus. Paretur licet ultio, & arma expendantur ad puniendum; injuriam sibi fieri putabit is, qui pro fonte habetur, & vindictæ sentit dolorem: nihil igitur intermitteret, quo minus injuriam
 (ita

(ita enim interpretatur, quicquid poenæ habuit nomen) vel propulset vel data occasione vindicet. Eo animo si omni tempore esse velimus omnes, quis tandem imperabit aut parebit, nisi qui vel prudenter dissimulando pudore afficiat alienam superbiam aut offensam, vel salutariter ignoscendo & ferendo alterius superet iniquitatem? Sin secus; nunquam erunt feriæ apud forum, vel non nisi cum periculo, si per disceptationem decertare libeat; aut sero expectanda est armorum quies, si nihil præter vim & bella litibus finem imponere debeat. Sed meliora speramus, pro eo quem erga Christianum orbem gerere vos non dubitamus, animo. Et proinde, quod unum possumus, qui inter Musas delitescimus innocentes ac taciti, vestram opem secundum Deum imploramus. Succurrite tandem turbatis rebus, & fatalem illam bellorum infelicitatem, quæ regna, regiones atque urbes involvit, à nobis declinate; tot ac tantas calamitates, quæ nos obruerunt, consolamini; quæ imminet, prohibete. Fessam recreate patriam & sub onere gementem; quæ nisi mature fulciatur quiete, viribus destituta non tantum ipsa concidat necesse est, sed eadem ruina, quicquid cohæret, in eandem trahat perniciem. Salutaribus consiliis imbuite eorum, quibus hanc operam debetis, animos; ut de revocanda pace, fide, concordia & pietate sint solliciti. Reducite salutari opera probitatis & pulcherrimarum artium studia, quæ jam diu in exsilium egit bellorum iniquitas. Orbi denique, si non universo, saltem Christiano, terra marique tranquillitatem reddite,

46 ORATIO I. PRO PACE EXSULANTE.

otium & securitatem ; quæ una ratio pristini doloris
minuet acerbiter. Ita fiet, ut cum exquisitissimis
vestris laudibus ad seram usque posteritatem vigeat.
floreatque illustre nominis vestri decus , & nunquam
intermoritura fama.

BENE-

D E

ARTIBUS IN SCHOLA
TRADENDIS ORATIO.*Publice habita in Schola Stralesundensi,
cum Rectoris munus susciperet.*

XVII. Kal. Octobr.

C L O C X L I I I .



Vicquid universo terrarum orbe conspicitur, suis fundamentis niti animadvertimus; usque adeo, ut sicubi ista evertantur, corruat necesse sit, quicquid super illis est exstructum. Neque vero id evenit in his tantum, quæ ob oculos sunt posita; cujusmodi sunt cælum & corpora cœlestia, terra, regiones, urbes & reliqua omnia, quæ vel conditoris nutu producta, vel hominum voluntate facta cernuntur; sed etiam in illis omnibus, in quibus homines ita versantur, ut stultè quicquam vel sapienter egisse merito dici queant. Quorum alterum quia vituperationem, alterum vero laudem meretur: haud puto quemquam fore ab humanitate ita remotum, quin malit prudentem quam stultorum numero haberi. Nisi cupis opinio ad illam spem traducta est, ut quæcumque velit, temeritate & malitia facilius, quam honestis consiliis

& virtute se posse consequi arbitretur. Vita autem ut sapienter transigatur, nihil æque necessarium videtur, quam recta & proba primæ ætatis atque adolescentiæ institutio. Ista enim si talis fuerit, qualis esse debet; ad rectæ rationis normam exacta; adhibitis in consilium illis, non qui in umbra inani quadam persuasione oblanguerunt, averfati civilis vitæ consuetudinem & molestias; sed qui eximia eruditione rerumque agendarum perspicacia præ cæteris multum valuerunt; nihil dubitandum, quin optimos in Ecclesia & Repub. earumque omnibus partibus exspectare liceat. Quæ cum ita sint, haud abs re futurum putavi, si de illa ex hoc loco verba facerem: quippe quod omnium proxime illud munus contingat, ad quod, Deo, uti spes est, gubernante non minus, quam vestra omnium, ad quos ea cura spectat, voluntate admoveri mihi contigit. Neque vero est, quod quis ita de me suspicetur, ac si arroganter aut temere existimem, ea me allaturum, quæ parum aliis sint cognita; aut ista omnia quæ huc pertinere possint. Etenim ingenue fateor, nihil esse causæ, cur dissentendum putem à præstantissimis hujus & superioris seculi viris, quorum sententiam de erudienda juventute, vel coram exquirere licuit, vel in egregiis monumentis, quæ nobis reliquerunt, perspicere. De omnibus vero quæ huc spectant, neque temporis ratio dicere permittit; neque disciplinarum ambitus, qui latissime patet. Præcipuis igitur in aliud tempus reservatis, aut doctiorum ingenio relictis, de iis potissimum sermonem instituere decrevi, quibus linguam erudiri, judicandi

dicandi facultatem adjuvari, & dicendi peritiam acquiri credimus; quæ omnia Grammaticæ artis, Logicæ & Rhetoricæ ambitu comprehenduntur. Quod ipsum antequam facere incipiam, à vobis magnopere contendo, Viri omnium ordinum honoratissimi, ut qua voluntate vestra hunc locum conscendi, eandem ad me audiendum benevolentiam adhibeatis. Sermonis cura in homine est præcipua, ut non tantum quæ ab aliis dicuntur, recte intelligat, sed etiam animi sui sensa per verba & voces commode explicare possit. Cum enim ab ipso vivendi exordio societate quadam contineamur, quam conservari hominum interest, ne ferarum instar passim vagantes alii aliis tanquam præda objiciantur; facile apparet, vincula esse hujus societatis ad conciliandos homines inter se satis idonea. Quæ etsi non unius sint generis, quandoquidem alii imperium habeant commune, alii ejusdem sint civitatis, alii mercatura & navigationibus jungantur, alii familiaritate, affinitatibus aut consanguinitate: primas tamen partes sibi vindicare videtur linguæ usus & oratio; absque qua esset, vix quicquam reperiretur, quod hominem ab animantibus brutis discriminaret. Erat quidem illa una eademque omnibus omnino mortalibus; sed quæ semper est hominum supra se emergendi cupiditas, temperare sibi non poterant, quin superba ædificandi ratione summum conditorem adversus sese irritarent. Quo factum, ut quos extincti nuper humani generis memoria non deterrebat, linguarum varietate impediti cœpto desisterent. Existere postea migrantibus hinc inde Nationibus aliæ

atque aliæ ; partim etiam pro seculorum libidine ita mutatae , ut nulla ratione pristinis habitatoribus intelligi possent. Usque adeo linguæ nunquam minus metuendum est , ne tot mutationibus sit obnoxia, nisi postquam peritiorum scriptis illigata certæ cujusdam gentis esse desiit. Id quod inprimis accidit , non tantum Hebræo sermoni aliisque in Oriente , qui ore totius populi terebantur , sed etiam Græco & Latino. Quia vero his linguis tot ac tantæ res perscriptæ ad nos pervenerunt, multis retro seculis à prudentissimis viris judicatum est , omnino dandam esse operam , ne amitterentur : præcipuè vero Latina, quod per complures Nationes diffusa multarum rerum facilitatem conciliaret. Ad hanc igitur licet , quæ nunc dicturi sumus, pleraque spectare videantur : ejusmodi tamen crunt , ut facili negotio ad quarumvis notitiam comparandam accommodari queant. Sicuti enim nihil magis confundit puerorum animos, quam eodem tempore duas tresve linguas præter vernaculam ex æquo docere ; & protinus studia & labores eorum in plura distrahere , quam quibus capiendis apti sunt ; ita persuasum nobis esse debet, qui in una lingua multum profecerit, illum non parum adjuvari ad cognoscendas alias : quod jam antea intellexerit, quænam sint illa , ad quæ in hoc negotio diligenter attendere oporteat. Fieri quidem non potest , quin Latina lingua non secus atque aliæ, quæ jam diu ab usu populorum exterminatae sunt , difficilius addiscatur , quam quibus certæ Nationes utuntur : unde etiam , quæ in his à peregrinantibus aliisve servatur ratio, si ad illam referre quis velit , non parum

parum aberraverit. Istæ enim ex consuetudine eorum, quibuscum vivitur, cognosci possunt, usque domestico addiscuntur; quamvis neque hoc ignorem, qui accuratius illas pernoscere cupiat, ei præceptis & observationibus opus esse, etiam in illa, quam cum lacte materno imbibit. Ast Latina lingua non nisi ex monumentis veterum, in quibus conservata est, peti debet. Quod quia longe difficillimum, succurrere nobis voluit peritiorum cura & industria, eamque difficultatem, quæ multos detertere poterat, pro viribus minuire. Hinc igitur nata est ars illa Grammatica, quam qui è Scholis remove, aut puerorum manibus excutere velit; idem mihi facere videtur, ac si quis Thesca filo Ariadnes erepto perpetuo oberrare in labyrintho coëgisset. Quam vero utilis illa & necessaria est tironibus, tam impedit etiam nisi recte tradatur. Principio prudens erudiendæ juventutis Magister id sollicitus esse debet, ut pueri recte legant, & suis quæque sonis literæ enuncientur. Etenim si in ista re primis annis peccatum, vix dici potest, quam difficillime adultiori ætate vitia ista corrigan- tur. Neque vero nunc laboro de Veterum Latinorum accurata pronuntiatione; à qua quantum recessimus, videre licet; si, quæ apud Ciceronem & Fabium de seculi sui consuetudine legimus, cum nostra comparentur. Sufficit si doctiorum in patria nostra morem sequuti; quarundam Nationum asperam obscuritatem, blandientem molitiâ & perversos sonos vitemus; idque sedulo detur opera, ut quod in catulis laudat Tullius, sonus sit dulcis; literæ neque; expressæ neque; oppressæ; ne aut obscurum sit

aut putidum nimis : sine contentione vox nec languens nec canora. Quod ut perficiatur , etſi non poſtulem Magiſtrum multa eruditione clarum ; illud tamen conſtat , neque indoctum & agreſtem ad hoc idoneum eſſe. Proximum eſt , ut ſcriptioni etiam aliqua impendatur cura : Qui enim eruditionis ſuæ argumentum eſſe arbitrantur ſordes literarum , quas pingunt ; non immerito pro ridiculis habendi ſunt , ne quid gravius dicam ; certe quibuſdam accidere ſolet , contra quam de ſe ipſimet ſentiunt , ut tam docti ſint , quam ſcribendi artis periti . Illud non dubito , quin venuſte ſcribere malint , quam ſordibus inquinare chartas , niſi voluntatem facultas deſtituat. Quare qui propter publicam curam quam gerunt , magnopere ſtudent , ut Scholis ab hujus artis Magiſtris proſpectum ſit , laude aliqua dignos eſſe judico : quæ etſi minima ſit in cæteris aliis , magnum tamen inde ornamentum eruditioni accedit . Iam propius aliquantq , quæ ſint Artis Grammaticæ , intueamur neceſſe eſt . Sicuti qui plane illam exterminari cupiunt , egregie falluntur ; ita etiam ab illius tractatoribus haud raro peccatur : præcipue vero illis , qui præceptorum regularūq ; obſcuritate & multitudine impediunt potius quam adjuvant . Omnium rerum quæ artificio quodam comparantur , & ad perfectionem aliquam tendunt , ea eſt indoles ; ut poſtquam natura dederit initium , ſagax prudentiorum obſervatio artem efficeret . Medicina olim fuit paucarum herbarum ſcientia , quam creſcentibus morbis & ipſam creſcere erat neceſſum . Non deſuit hominum ingenium neque ſuis commodis neque alienæ ſaluti : videbant

debant alia salubria, alia insalubria; & longius progressi, quod sæpius aliorum errore decepti parum, essent felices, aut sua imprudentia minus cauti; illud paullatim animadverterunt, hominum & morborum non magis habendam esse rationem, quam coeli, temporum & remediorum. Quibus omnibus in unum quasi collatis, ars existere cæpit, cum antea per vaga remedia cuivis experimenta agere esset libitum. Ars nautica quomodo tandem sit effecta, sive ad vastissimas naves ædificandas, sive ad cursum in loca nunquam visa dirigendum, forte nos lateret; nisi quanta fuerit Americanorum in hoc negotio ruditas, nobis innotuisset. Est enim ita comparatum, ut quæ à nobis remotiora sunt aliquanto, eorum plerique ignoremus initia. Illos sane quis crederet arbores radicibus hærentes in navigia potuisse convertere absque ullo ferri & chalybis usu, ita ut ignis esset pro securi, & concha pro dolabra: nisi eorum monumentis certiores facti essemus, qui Barbarorum conspecta ruditate non minus eorum admirati sunt sagacitatem quam laboris tolerantiam? Etenim ubi natura hominum animis desiderium instillavit earum rerum, quibus carere nullo modo se posse putant, aut non sine maximo incommodo; nihil prætermittunt cum ad necessitates sublevandas, tum ad comparandas utilitates. Animadvertebantur in aquis providentiæ munera, quæ suo quasi coelo relinquere insolens judicabatur; ultra vivebant, qui ratione præditi, & homines hominum aditu prohiberi, à natura videbatur alienum. Nihil igitur impedire tandem potuit, quo minus in mari aut fluminibus via sterneretur. Majorum

rum inventis posterius multum addidere, quæ rudia nimium, in melius mutaverunt; donec tandem observationes in artem conclusæ navigandi viam non minus reddiderunt planam, quam expeditum naves ædificandi modum. Neque dissimilis est ratio aliarum artium, quorum effecta animo potius cernuntur, quam oculis. Tenuè admodum apud Romanos historiæ scribendæ fuit initium, uti Antonius apud Ciceronem pluribus differit: Annales conservabant memoriam publicam opera Pontificis Maximi, eorumque tabulæ domi proponebantur; ut populo esset cognoscendi potestas. Successerunt alii, qui & ipsi relicto ornatu, modo intelligeretur quid dicerent, unam dicendi laudem putarent esse brevitatem & veritatem. Animadversæ paullatim sunt virtutes, quibus alii alios antecellerent: sive in rebus ipsis elucerent illæ, ordine temporum, regionum descriptionibus, consiliis, actis & eventu consignando: sive in verbis & orationis genere. Tandem præclari viri aliorum inventis ita utendum esse putarunt, ut & ipsi aliquid adderent, quod in Majoribus frustra quæsitum, in suis scriptis posterius admirarentur. Illis historiæ legibus, ne quid falsi dicere audeant Scriptores, ne quid veri non audeant, ullamque vel gratiæ vel simultatis afferant suspensionem, multæ aliæ acceperunt; quod illud agendum crederetur, ut non tantum veri cognoscendi studio lectores incitarentur, sed etiam scribendi caperentur modo & dicendi venustate. Ista itaque omnia principio admodum rudia ita erudiri cæperunt, ut posteaquam à prudentioribus perspectum, quæ à quoquam laudabiliter aut inf-

infelicitè facta, eorum ars aliqua institueretur. Cæterum quæ eodē modo primum sunt inventa, cur dubitemus quin pari ratione postea percipiantur & tradantur? Optimus sane futurus est artifex, qui præcepta ita cōbiberit, ut ad ea potissimum respiciat, quæ quondam dispersa & dissipata, artibus tandem conclusa sunt. Inter opifices qui artem proficitur, discipulum non ad præcepta semper attentum esse postulat, rarissime adhibito eorum, quæ præcipit, exercitio. Quin potius id agit, ut, quem suscepit erudiendum, paucis admonitus operas aliorum intuens, ea efficere discat, quæ iussus est: omnino ita fieri debere ratus, ut ubi præcepta quædam dederit, artis peritia labore & industria comparetur. Postea vero tantum abest, ut præceptis non amplius opus esse existimet; ut ipse etiam, si artis perficiendæ sit cupidus, apud alios artifices exquirat, quæ similitudine quadam cum arte sua conveniant: aut præstantissimos viros adeat, quos Mathematicis disciplinis excultos, plurimarum artium fundamenta accuratius perspexisse cognoverit, ut ex eorum sermone atque consuetudine ea hauriat, quæ sibi ex usu esse queant. In Arte Grammatica vel rectè percipienda vel commode tradenda, ut eo revocetur unde huc declinavit oratio, non existimandum est aliter fieri debere. Quapropter illud cognitum esse oportet, Veteres Latinos non secundum hanc artem formasse linguam suam, sed ejus præcepta ex his, quæ apud auctores diligenti & accurata lectione sunt observata, ab eruditis concinnata esse; ac proinde facultatem ex auctoribus petendam esse præcipue: ab arte vero, præter pauca quædam, quæ inde pro-

promi necessum est, hoc in primis expectandum, ut nos doceat, quænam operosa diligentia in legendis auctoribus animadvertere conveniat. Secus qui fecerint, aut alia ratione ad hujus linguæ notitiam perveniri posse putaverint; illis profecto idem eveniet, quod non tantum de sui sæculi hominibus vere dicit Joannes Ludovicus Vives, sed hodieque plurimis evenire videmus, qui pro Grammaticis sese venditant, ut bene loquantur secundum canones, male secundum consuetudinem Veterum; cum tamen illa sit hujus sermonis magistra, ita quidem, ut quoties ab ea recessum, tot fere existerent Latinæ linguæ, quot sunt Nationes, in quibus ea discitur. Cum enim unaqueque errore aut discendi ignavia ad Vernaculæ genium Latinam accommodari posse putaret, modo regulas quasdam teneret ex Grammaticis libellis depromptas, aut vocabulorum aliquem numerum; factum est, ut ejusmodi linguam sibi formaret, quæ alteri cuiuspiam genti parum intelligeretur. Unde tot obscuritatibus ipsæ etiam disciplinæ atque artes involutæ, ut sæculo amplius in illis tollendis doctissimi quique laborarint, & adhuc laborent. Neque vero illis assentior, qui præceptis neglectis complures formulas colligunt, quibus si abundant, satis se instructos esse autumant. Etenim ut nihil dicam de usu formularum, qui sine norma aliqua constare nequit, quæ nihil aliud est quam artis particula; quid quæso audebunt, ubi destituti aut incerti, quo sermone res quæpiam exprimenda sit, obmutescunt? Frustra plane à memoria auxilium petent, cum succurrere illa omni tempore nequeat. Quin & illud fieri videmus, ut
modo

modo optime loquantur, modo non nisi meros sollocismos effutiant. Quod plerumque illis accidere solet, qui postquam integras historias aut sententias, quas memoria tenaciter sunt complexi, ex optimis auctoribus in scriptis suis aut sermonibus interseruerunt; prorsus languent, ubi à semetipsis petere quædam necesse habeant; desperatis ingenii viribus, quod linguæ indolem nondum satis perspexit. Felices igitur tandiu, quam alieno labore diserti, orationes conficiunt non multum dissimiles humano corpori, cuius aliæ partes sanguine & rubore suffusæ iusta habitudine gaudent; aliæ pinguedine nimia intumescunt; aliæ vero macilentæ admodum vix ossa tegunt. Sed inquit aliquis: quo igitur modo Grammaticam doceri jubes? Respondere quæso liceat Verbis Ioannis Casellii, Viri de studiis literarum optime meriti: Vim universæ hujus artis, inquit, in inflexione dictionum consistere arbitror: in qua puerum ita exerceri velim, ut sit exercitissimò promptior; præceptionibus vero & regulis oneretur quam paucissimis, statimque deducatur ad intelligendos Latinos Scriptores. Ita quidem Vir harum rerum intelligentissimus. Neque verò intercalibellus Grammaticus ab oculis puerorum removendus est: sed omni studio laborandum, ut quæ summi Viri verbis modo diximus, probe per noscant, adjuti cum dexteritate Magistrorum, tum exemplis ad hanc rem maxime idoneis. Quod si tantus adolescens in Lingua Latina progressus fecerit, ut vi vocabulorū & significatione percepta aut aliunde exquisita, pleraque auctorum intelligere incipiat, præter illa quæ non nisi antiquitatis & historiarum

fabularumque notitia adhibita cognoscuntur; tum demum ut accuratius Grammaticam perdiscat, anniti decet. Id verò non tam fieri debet percipiendis, quotquot sunt, Grammaticorum præceptis, quam eorum scriptis legendis; qui ab omnibus Latinæ linguæ judicantur peritissimi. Primum volutandi, quorum sermo eruditus probatur, & imperitis planus est; ideoque ad intelligendum sunt faciliores, & primæ ætatum ingeniis magis accommodati. Deinde ad illos veniendum, qui neque affectata obscuritate impediunt & ubique indigeant interpretis, neque nimium faciles nihil relinquunt lectoris ingenio: Hoc enim mavult interdum suo acumine delectari, quam primo statim intuitu omnia capere. Ciceroni vero ut quisque est simillimus; ita maxime meretur, quem adolescentes legant & pro Magistro habeant linguæ formandæ satis idoneo. Etsi vero Tullium & simillimos Latinæ linguæ artifices cæteris longe anteferendos existimo, adductus cum Fabii aliorumque Veterum, tum doctiorum quorundam nostri & superioris seculi auctoritate, etiam eorum qui diversam dicendi viam sunt ingressi; non tamen propterea, omnia quæ apud illos occurrunt, imitanda videntur: quandoquidem Demosthenem non minus Cicero, quam Homerum Horatius nonnunquam dormitasse arbitretur. Multa exciderunt summis Viris aliud agentibus, quæ postea nollent, sed revocare non licebat; multa, ut erat quisque linguæ augendæ cupidus, protulerunt, quæ ut alii probarent, efficere non potuerunt, quare quæ dixerunt quidem, sed non persuaserunt, tanquam parum consecrata habentur. In his ea numeramus,

quæ

quæ semel fortassis atque iterum leguntur cum ejusdem rei frequens sit mentio; aut quæ sæpius apud unum lecta in cæteris habent neminem, qui ad usum eorum consentire voluerit. Minus quidem peccat, fateor, qui illis verbis utitur, quibus summi auctores usi sunt; multum tamen refert eorum usu delectari, quæ à consuetudine non sunt aliena: & hanc sicuti in vivendo consensus efficit bonorum, ita in sermone consensus eruditorum. His addere postremo licet, qui utilitatis multum afferre quidem possunt, sed in quibus imitandis major esse debet cautio. Alii enim etiam ante Constantinum M. vel nimio sui amore ducti, aut novitatis cupiditate impulsæ variis viriis dicendi genus corruerunt, rerumque pondera minutissimis, uti Fabius loquitur, fregerunt sententiis: alii obsoletorum tenaces maluerunt sermone uti, quo olim locuti fuerant homines, quam quo loquebantur cum populo eruditi; alii modo artis vocabula in sermone interseruerunt, modo quæ regionibus quibusdam usitata à communi lingua abhorrebant; id quod Livio accidisse memorant, qui Patavinitatem in eo reprehendunt. In his omnibus ita versandum, ut quicquid inde petitur (at quam plurima possunt!) ad Nepotis, Cæsaris, Tullii, Terentii, Vellesi aliorumque his similium normam & rationem sit exactum. Dum in his opera collocatur, ita se gerere quemvis oportet, ac si ipsemet Grammaticum in colligendis observationibus juvare aliquando velit. Summa cura omnia sunt perscrutanda, quid singulæ voces significant, quomodo cum aliis cohæreant, quibus vinculis colligentur. Et quia non omni tem-

pore æque fida est memoria, sæpeque reddere gravatur, quod recte quis credat depositum: non recusat colligendi laborem adolescens discendi cupidus, vitata tamen confusione. Cujus rei etsi varia ab aliis suppeditantur consilia, optime tamen fecerit, qui quæ aliquando in rem suam fore existimet, in eum referat locum, unde postea petiturum sese, confidat. Ita sane memoria nihilo secius habet, quod agat, & in promptu erit, unde possit sublevari, sicubi defecerit. Lentum quidem videtur negotium, & occupasse hos labores aliorum industria magnis voluminibus; quorum curam elaboratam & accommodatam maxime ad cujusvis usus aspernari remeritatis esset vel arrogantiae. Verum ut nihil dicam, quanto rectius ejusmodi thesauris uti noverit, qui & ipse aliquandiu ad colligendum adhibuerit manus, & ex suis indicibus sapere malit quam alienis; longe diligentius versabitur in auctoribus cognoscendis, qui passim inesse ratus, quod sibi ad utilitates suas servet, nihil secura lectione transcurrer, sed introspiciet singula, & quantum quæque habeant virtutis, indagare enitetur. Illud vero, quo nihil neque ad felicitatem sermonis aptius, neque ad dignitatem gravius; ut omnia membra suis quasi articulis connectantur, recto ordine & apta junctura, quicquid est verborum, cohæreat; quæ huic non conveniant, in illum transferantur locum, quo maxime congruant; totus loquendi complexus, qui imprimis virtutes aut vitia ostendit, talis sit, ut quemadmodum in structura lapidum, omnis indecora vitetur enormitas; & ut paucis dicam, Linguae idoles
ita

ita sit cognita, ut quicquid cum in suo tum in aliorum sermone ab illa abhorreat, aurium pene & oculorum perspiciat iudicio, etiamsi cur ita sentiat, non exactam semper possit reddere rationem. Illud, inquam, numquis consequi poterit sine diligentibus & considerata auctorum lectione, & qua neglecta nihil ista proderit, operosa observatione? Occupare vero hanc industriam ita decet, ut non tam solliciti simus de Grammaticis quibusdam regulis aliisque ad artem hanc componendam pertinentibus, quam de orationis facultate ad veterum similitudinem paranda: quandoquidem qui secus fecerint, aut præcepta magis assidue ante oculos habent, quam exempla; id efficient, ut, quod jam Fabii temporibus quibusdam evenisse videtur, Grammaticæ potius quam Latine loquantur. His studiis dum dediti sunt adolescentes, admiscendi etiam sunt, qui de Grammatica Arte scripserunt, præcipue veteres, qui multa nos docent, quæ, absque his esset, plane nos laterent. Quibus si ex recentioribus addere quis velit, quæ non ita dudum Polyhistor ille Vossius de Arte Grammatica edidit, aut Thomas Linacensis Anglus ante centum amplius annos de emendata structura Latini sermonis, opere precium, quod spondere ausim, fecisse se videbit. Equidem sicuti Hispanorum Doctissimus Linacrum vere ait multa Latine Linguae mysteria ostendisse, ita non satis mirari possum, huius viri libellum ab usu adolescentum remotum inter rejiculas chartas pene obsolescere. Minime vero metuendum est, ne plurimum temporis in his consumatur. Satis est ejusmodi adolescentibus,

bus, quos ad hæc studia idoneos putamus, annus aut
semestre spacium; quò exacto non tantum gaudebunt
alieno iudicio confirmari, quæ suo ingenio & assidua
diligentia eruerint; sed etiam ad illa quæ neglecta
sunt, adjuti aliorum industria, animum advertent;
multoque rectius eorum vel monitis vel exemplo e-
docti videbunt, quo pacto legendis Latinorum scri-
ptis operam impendere debeant; idque ideo, ut non
tantum, quæ ab illis sunt scripta, animò cognoscant,
aut sensu percipiant; sed etiam ad eorum similitudi-
nem dicendi & scribendi facultatem consequantur.
Magnopere cavendum, ne in eorum errorem induca-
mur, qui ex Scholis dimissi, Grammatices amorẽ,
& usum lectionis, probro sibi ducunt: longe aliter
senserunt, quorum admiramur summam eruditio-
nem; sed securi nimium aut arrogantes, qui nostra
nihil interesse putamus, quibus viis ad tantam glo-
riam euecti, vel nobis otiosis accidere posse, quod
non nisi maximo labore illi consecuti sunt. Profecto
non Scholarum temporibus, sed vitæ spacio ista stu-
dia terminarunt; tantumque abesse rati ut graviori-
bus minus vacare liceret, ut animi rebus levioribus
relaxati, ad ista redirent alacriores. Ista vero quæ
hactenus diximus, ita sunt accipienda, ut nihil pro-
hibeat, quo minus puer, quem leviora Grammatices
studia adhuc detinent, nonnihil etiam Latine balbu-
tire incipiat: modo Magistrum sit nactus, qui quam
artem alios docere velit, ipsemet prius didicerit.
Difficillime enim sordes & maculæ, quibus tenera
ætate sermo est inquinatus, postea eluuntur. Quæ
mala si caveri non possint, & in eum Magistrum puer
inci-

incidat, cujus opera multa discat, quæ satius sit igno-
 rare; Pythagorico silentio annos illum aliquot trans-
 igere melius iudico, quam perversa loquacitate lin-
 guam corrumpere, & paulo post sese atque alios de-
 discendi fatigare molestia. Unde Timotheus quidam
 clarus in arte tibiarum duplo majorem exigebat mer-
 cedem ab illis, quos alius instituisset, quam qui ru-
 des traderentur; quod existimaret, æque difficilem
 esse dedocendi laborem, quam docendi. Quæstuo-
 sum esse quibusdam captatoribus non nego, pueros fi-
 dei suæ commissos ita assuefacere, ut extemporalis
 garrulitas nec expectata cogitatio sibi lucrum & im-
 peritis parentibus inane gaudium afferat. Cum enim
 nihil illis æque jucundum, quam filios celeriter au-
 dire aliena lingua loquentes, nihil mirum eorum
 credulitatem ita in fraudes patere. Neque deest
 quod huic rei obtendatur, In promptu sunt dicta;
 qui nunquam male, nunquam bene, à teneris assue-
 scere multum; quæ convellere, stultum esse, quod
 vulgi auctoritate & consuetudine sint corroborata.
 Verum sicuti in illis quæ per se neque bona sunt, ne-
 que mala, multorum relicto consensu ab humanita-
 tis usu quadamtenus recedere arrogantis est; ita in-
 sapientes merito judicantur, qui populum (est autem
 suus cuique ordinis vulgus) pro maximo habent Ma-
 gistro, præcipue in illis, quæ si recte fiant, magnas
 pariunt utilitates; si secus, multa incommoda; ne
 dicam, quam noxia præcepta sumus habituri, si con-
 suetudo ex eo, quod plures faciant, nomen acci-
 piat. Exercitationis magna quidem vis est ad di-
 cendi facultatem, sed si intelligantur quæ exerceri de-

debeant; neque intempestiva loquacitas, quod Fabius metuit, inverecundam afferat frontem, consuetudinem pessime dicendi, & malorum exercitationem. Quorum nisi habita fuerit ratio, fallit multos quod audierunt, dicendo homines, ut dicant, efficere; cum & illud vere dicatur, ut perverse dicant homines, perverse dicendo facillime consequi. Ad Grammaticam artem quia Poëtica vulgo refertur, de illa etiam hic disserere non alienum videri potest. Sed si omnia huc congerere vellem, in immensum excresceret oratio; quare illud dixisse sufficiat: parum prudenter agere illos, qui versibus scribendis operam navant, cum ubique adhuc hæcant, si quid soluta Oratione præferendum sit, & si vel maxime in hac præstare quid possint, frustra esse nihilo secius, nisi legendis lectissimorum Poëtarum scriptis animum excoluerint. Quod ubi factum fuerit, neque natura abhorreat, neque ad diversa studia rapiantur curæ & cogitationes, tum in arte hac repertare aliquid licebit. Vehementer enim fallitur, qui ad versus scribendos idoneum sese existimat, modo verba hinc inde correpta in numeros & quidem satis celeriter cogere queat; longe aliter iudicabit, qui hac laude non tantum suis temporibus claruerunt, sed ad posteros etiam transmiserunt nominis famam. Cum quereretur aliquando Euripides, quod eo triduo non ultra tres versus maximo labore impenso extundere potuisset, gloriabatur Alcestis, qui Tragicorum numero habebatur, se centum perfacile scripsisse: Cui Euripides, sed hoc interest, inquit, quod tui in triduum tantummodo, mei vero in omne tempus

pus sufficient. Ita quidem gravissimus scriptor dissentiebat ab illis, qui magno numero versus effundunt. Licet vero multarum rerum cognitione instructum esse, & honestarum artium principia imbibisse oporteat, qui hanc artem cum aliqua laude exercere velit; quod quidem ab adolescentibus requirere à ratione alienum esset: magnam tamen utilitatem illis adfert Poëtarum interpretatio, si illam præciserit doctrina de ratione carminum & syllabarum quantitate; si conjuncta sit frequens admonitio, quomodo in scriptis Poëtarum versari deceat, quid inde expectare, quænam eruere, ad hominum mores cognoscendos, ad prudentiam augendam, ad virtutem denique & probitatem multum facientia. Neque omittenda est versus scriptionum exercitatio, ita tamen ut qui velut afflatu quodam huc rapiuntur, præ cæteris adjuventur; & potior habeatur ratio earum rerum, ex quibus major utilitas sperari queat. Si enim in illis nimium elaboremus ad quæ capienda adolescentum ætas nondum satis apta, vel propter imperitiam eorum, quæ jam cognita esse debent, vel propter ingenium quod ad alia studia est proclivius; fieri non potest, quin parum frugifera sit opera nostra, & aliud agendo negligantur interea, quæ minori labore, fructu autem maximo perfici possint. Quoniam de Arte Grammatica dixi, nunc de ea dicam, quam plurimi veterum Rationalem Philosophiæ partem appellabant, nos vero Logicam appellamus. Erga hanc non eodem modo omnes fuere affecti. Epicurei illam plane removerunt, retenta naturali & Morali, secuti hac in parte Magistrum suum; qui nullam

in ea vim esse existimabat, nec ad melius vivendum, nec ad commodius differendum. Cyrenaici, quorum sectæ originem dederat Aristippus, sola Morali contenti, una cum Naturali eam rejecerunt. Aristochius, Zenonis auditor, non tantum supervacuum esse, sed adversari etiam Morali Philosophiæ contendebat. Stoici judicandi vias diligenter persecuti, inveniendi partem totam neglexerunt: Utriusque vero Princeps Aristoteles existit, ut videtur Tullio, qui in utraque summam inesse utilitatem affirmat. Sicuti vero in quamplurimis aliis evenire videmus, ut unde adminicula expectantur in Vita humana, ea sæpissime hominum vitio multorum malorum sint causæ; ita & huic arti contigit. Quæ cum non immerito de se promittere queat eruendæ veritatis aut perspicendæ facilitatem, in eos non raro incidebat cultores, à quibus male habita nil nisi spinosas contentiones peperit, & uberrimam quæstionum messem. Alii suis sese compungebant acuminibus, & multa complicabant ad ostentandas ingenii vires, quæ postea ne ipsi quidem explicare possent; partim suis delectati studiis ridebant alios, tanquam soli omnis sapientiæ custodes; neque melioribus tantum erant impedimento, sed & vires suas tenuissime concisas ipsa subtilitate cōsumebant; quosdam reperire licuit in disputando mire callidos, ita ut ad irretiendos alios neminē crederent sese magis idoneos; à quo negotio ad graviora deductis idem evenit, quod parvis animalibus; quæ in angustiis mobilia, in campo facile obreruntur. Neque vero Veteres tantum, de quibus modo dixi, à se invicem dissi-

diffidebant, aut parum utiliter ingenio abutebantur: sed etiam qui postea vixerunt, hujus artis amatores mutuis diffidiis alii adversus alios exarserunt. Aristoteles tanquam princeps, qui præcepta in ordinem redegerat, delectus est, in quo interpretando cum Græci & Arabes, tum Latini, ingenium & industriam occuparent; neque vero omnibus inter se convenire poterat de sententia ipsius. Postquam illis seculis, quæ propius aliquanto à nobis distant, barbaries orbi incubuerat; gliscere cœperunt studia partium, unoquoque impium existimante, nisi mordicus defenderet, quæ à Magistro acceperat. Aliud etiam accessit malum, linguarum imperitia: quarum auxilium cum desperarent homines rerum curam potissimum præ se ferentes; confugiendum erat ad distinctiones & divisiones; & harum quo majorem quis poterat exstruere molem, eo sagacior ingenio se præditum esse putabat. Multitudo igitur distinctionum adhibebatur, ubi vocula Græca aut Latina recte intellecta omnem difficultatem poterat removerè. Certe hinc contigit, ut nulla pene ars plus sordium & squalloris contraheret, quam hæc ipsa, de qua nunc verba facimus, sordide nimis à cultoribus suis contrectata. Laborarunt quidem proximis temporibus Viri ad hanc rem satis idonei, ut huic malo mederentur; neque omnino frustra videntur operam posuisse, modo optima eorum consilia locum inveniant. Ad Scholasticam quod attinet juventutem, huc enim potissimum mea nunc spectat oratio, sicuti illis minime assentior, qui ex Scholis hanc artem ejiciunt, aut tanquam noxiam & rixarum genitricem plane

omittunt; ita nec eorum judicia probare possum, qui nimium in ea adolescentibus plene inculcanda laborant. Certum est, Logicā non esse partem quandam Philosophiæ, sed instrumentum, ideoque in rebus versari, non ut earum notitiam suppeditet, sed modum ac rationem conjungendi ea, quæ separari minime debent, & disjungendi quæ sibi mutuo adversantur, eliciendi denique ex antea cognitis, quæ erant minus nota. Id vero absque rerum aliqua cognitione velle præstare, idem esset, ac si cæmentarius artem suam alios docere aggrederetur, neque lapidibus adhibitis neque calce. Solet animus noster in contemplando primum res ipsas circumspicere cujusmodi sint, deinde id agere, ut quæ inter se conjuncta sunt, intellectus minime dividat, aut jungat ea, quæ propter repugnantiam aliquam, copulari nequeant; denique ubi experientia & usu edoctus perspexit, unius rei cognitionem viam esse ad cognoscenda alia, ratiocinatione ita utitur, ut ejus adminiculo magis magisque se perficiat. Nihil horum à Logica expectari debet, sed hoc solum, quo pacto facilius illud fieri queat, ubi in rebus indagandis studii quicquam collocari cœpit. Adolescentibus igitur satis est artis hujus vocabula explicari, exemplis ad hunc usum ex vita communi petitis, iisque minime obscuris, quid sint Synonyma & Paronyma, quid Prædicabilia, quid Prædicamenta: Quid Enunciatio, quam varia, & quæ illius affectiones. Vbi ad eam partem deventum est, quæ intellectui in argumentando succurit, in schematibus seu figuris Syllogismorum earumque modis ita exerceri debet

ado-

adolelcens, ut absque opera difficili dignoscat, quinam sint illi, quibus falsi nihil consequatur, modo vera sint, quæ fuerint præmissa. In ea parte, quæ ad inventionem pertinet, etiam exerceri nihil prohibet; cui adjici potest explicatio fallaciarum, pro captu ætatis. Et horum omnium ratio si interdum à discipulis exigatur in auctorum interpretatione, non parum conducet. Modo abhorreamus, quam potest fieri maxime, ab eorum moribus, qui in explicandis Veterum scriptis omnia Grammaticæ Logicæ & Rhetoricæ resolvendi scientiam professi; in illis, quæ cum amicitia & muneris ratio interdum requirit, tum arrogans libido non raro effundit, satis superque declarant, sese nullas artes minus didicisse, quam quarum Magistri volunt videri. Demonstrationis doctrina tantum abest ut adolescentibus declaranda videatur; ut non injuria quis existimet, rectius facere ex ipsis Magistris non paucos, si vel honeste hic inscitiam suam fateantur, vel accuratius demonstrandi artem addiscant. Omnino laterem lavat, qui ad hæc discenda aut docenda accedit, nisi ingenium elementorum Metricorum disciplina sit imbutum. Quod studium quoniam à plurimis hodie negligitur, nemo jure mirabitur, infelicius aliquanto in aliis nos versari, quæ hoc nituntur vel adjuvantur. Præ cæteris prudens Logicæ Artis Magister diligenter admonere debet discipulos suos, longe ampliorrem esse eam, quam ut hoc tempore perdiscatur; pleniorrem illius cognitionem alias parandam; quæ nunc doceantur, esse tantum minutas particulas: Argumentationum formulis minime abutendum esse.

ad contentiones & rixas, multo minus ad asseverandi in rebus parum intellectis temeritatem aut negandi audaciam; cum ea sit hujus artis indoles, ut ultro alliciat ad contendendi libidinem; præcipue si animi nondum expoliti sint illis disciplinis, quæ modestiam ingenerant. Denique minime existimandum; tum demum in aliis disciplinis recte illam adhiberi, si in pulverem usque omnia secentur, & in frusta potius quam in partes dividantur. Quæ ratio nescio quomodo plurimis ita arideat, ut optimam hanc esse methodum sibi persuadeant. Sane in Veterum scriptis, quos docendi & scribendi artifices fuisse minime est dubium, ne vestigia quidem apparent hujus rei, nisi quod Seneca in sui seculi Sophistis hunc morem reprehendit, eodemque vitio laborare affirmat nimiam divisionem & nullam. Satis multa de Logica Arte dixisse mihi videor, restat ut de illis dicatur, quæ ad Rhetoricam pertinent. Quod eo commodius fiet, postquam de Arte Grammatica & Logica quædam allata, quæ Rhetoricæ cum illis sunt communia. Neque in redarguendo Vulgi errore, nunc mihi laborandum est; qui eloquentiam multitudinem verborum & concitato sermonis cursu metiri solet; ideoque existimat; ubi puer præcepta quædam ex Rhetoricis libellis ita percepit, ut quot orationis sint partes, noverit; Causarum genera & tropos dignoscere; dictionum, sententiarum & Amplificationum figuras in aliis exemplis exprimere queat; hunc satis idoneum esse, qui ad hanc artem exercendam deducatur. Qui enim ita sentiunt, horum auctoritate non multum moveri arbitror, qui

qui plus aliquanto sapiunt. Etenim si, quod præ-
 clare Tullius ait, omnis-vis ratioque dicendi in eo-
 rum, qui audiunt, mentibus aut sedandis aut exci-
 tandis exprimenda est, profecto nisi prudentia mul-
 tarum rerum accedat, verborum volubilitas tamquam
 res inanis merito irridetur. Quin & hoc non inju-
 ria exigit ab Oratore Fabius, ut sit Vir bonus, & præ-
 ter dicendi eximiam facultatem, animi etiam Virtu-
 tibus excellat, publicarum & privatarum rerum ad-
 ministrationi accommodatus regere possit consiliiis
 urbes, fundare legibus, & judiciis emendare; quod,
 si qui armati sunt eloquentiæ viribus, omisso Virtutis
 & officii studio, rebus optimis abutantur ad suam
 libidinem & aliorum calamitatem: ita ut multa ma-
 la inde metui sit necesse, unde maxima commoda
 sperari in Repub. debeant. Quæ si vera sunt, uti
 verissima esse nullum est dubium, quam exiguus est
 eorum numerus, qui ut oratores esse velint, obsecran-
 di! quanta multitudo, qui non tantum rogandi, ut
 esse nolint, sed etiam omni studio impediendi, quo
 minus esse possint! Ne furori ministrentur arma, &
 ad hominum perniciem temeritati & improbitati
 suggerantur instrumenta. Tantum abest ut adolescen-
 tum ætas ad hæc studia matura existimari debeat.
 Sed de his commodior forte dicendi aliquando erit
 occasio, nunc ad adolescentes nostros revertimur:
 his namque licet incipientibus via opus est, sed ea
 plana ad ingrediendum & ad declarandum expedita,
 idque non ante, quam linguæ aliquam peritiam sibi
 paraverint. Oratoriæ enim artis ne rudimenta qui-
 dem satis commode tradi possunt, nisi postquam
 sermo

sermo à sordibus & impuritate, quibus inquinari solet, ita purgari coepit, ut Romanæ dictionis quædam similitudo in illo appareat. Suum est Grammatico, quod diligenter egerit oportet, antequam Rhetoris cura sit opus; ille nisi de vitiis in sermone cavendis fuerit sollicitus, hic de Virtutibus in Oratione adhibendis frustra erit occupatus. Non desunt, qui postquam pueri ultra prima elementa paullum sunt progressi, ad colorandum sermonem assuefaciendos esse existimant; tanquam primæ lineæ satis sint expressæ. Quod ipsum si ita intelligi volunt, ut adumbrandi partes Grammatico tribuant, colores vero addat Rhetor; neque nihil dixisse videntur, neque omnia. Est enim quod in discipulo à Grammatico discedente requirat Rhetor: quod etsi neglectum, refarcire possit, invitus tamen sibi personam imponi patitur, quam alterius fuerit sustinere. Verum sermonem rebus omnibus, personis, locis & temporibus optime accommodare, deinde efficere ut suis ornamentis decorus auditorem percellat, non tam ad diversas partes pertinere, quam unius artis distinctas esse particulas arbitror. Nisi quis ita censeat, pictorem solos inducere colores, adumbrandi peritiam aliis relinquere, aut aliunde quam ab arte sua petere. Sed ista subtilius excutere nunc non est necesse, neque fortassis multum interest in hoc negotio: modo nihil eorum negligatur, quæ didicisse conveniat. Aliud nisi fallor, quos memoravimus, intelligunt; quo nihil magis cum à Grammatico tum ab Oratore debet esse alienum. Non raro contingit, ut, sicuti ab imperitis gratia bene di-

Etis non refertur, ita vitioſæ orationes pravitate judiciorum laudentur. Qui ſua vel temeritate vel imperitia ſunt decepti, credulos in errorem inducunt; ſit inde conſuetudo, & imitandi ſtudio ad prava convertitur. Quod omnibus artificibus ſolenne, ut, quicquid deliquerint, ex arte factum contendant: idem & in Oratoria accedit. Ornamenta exiſtimamus, quæ orationem maxime ſœdant; quod paucis expediri poteſt, pluribus operoſe perficere, & communia vocabula averſati copioſa loquacitate omnia circumire nitimur. Hoc eſt illud, quod ſub coloris nomine obtruditur, artificium; quo quidem ad decolorandam orationem nihil excogitari poteſt efficacius, inprimis ſi accedat Metaphorarum ambitio, & affectata figurarum diligentia. Profecto qui ita ſentiunt, hydropicum pro ſano habere videntur, aut hominem plagis percuſſum aſpectu jucundior rem putare eo, quem non niſi ſuus & ſanus color reddit amabilem. Qui in eodem ſermone non minus linguæ Vocabulis utuntur, hos communiter admiramur tanquam variarum peritos; ſed prudentiores omnino judicaverint, imperitia vel tarditate eos impediri, quo minus quæ velint, vernacula, aut illa qua ceperint exprimant. Non aliter judicandum de illis, qui longas adhibent circuitiones, & à dicendi conſuetudine nimium remotis delectantur dictionibus: non eſt virtus illa ſed infirmitas; deſtituti enim propriis, inanitate verborum inſcitia opinionem minuere ſatagunt. Eſi, vèro omnem ubertatem & redundantiam ſterilitati præfero, quod vincere hanc difficilius ſit quam uſu iſtam deterere.

nolim tamen, quæ corrigenda sunt, longa consuetudine confirmari; aut, vitia fecunditatis specie decipere. Quia igitur sermonis proprietate & puritate, futuro Oratori nihil est utilius, magna hujus rei cura suscipienda est, antequam Rhetoricis præceptis adolescentium animus inficiatur. Quod ipsum si ita fuerit peractum, ut neque Grammaticus ambitiose occupaverit alienas partes, neque Rhetor suas omittere cogatur, tum demum libelli sunt deligendi, in quibus genera caussarum, orationis partes, tropi, & Orationis exornandæ modi, quas figuras vocamus, breviter explicantur: quæ omnia ita proponenda sunt, ut pluribus exemplis, iisque ex optimis quibusque auctoribus petitis illustrentur. De actione etiam admonendi sunt adolescentes, deque iis quæ memoriam adjuvare posse judicantur. Cujus laboris ut major esset utilitas, suadere non dubitarem, ut una atque altera Ciceronis oratio exponeretur, antequam ullo pacto ad Rhetorica præcepta accederetur. Certum est enim, artem interdum vix melius tradi posse, quam qua ratione primum diligenti observatione constructa est; quare nullo unquam tempore sive apud Græcos sive apud Latinos præstantiores existere Oratores, quam cum optima quæque in disertorum virorum orationibus à sagacibus & prudentibus ingeniis animadversa in artis formam redigi ceperunt. Præcepta ubi diligenter explicata, illud à discipulis exigi debet, ut quomodo eorum sit habita ratio, in orationibus ostendant. Neque tamen curiose nimis omnes Metaphoræ & Metonymiæ excutiendæ; aliter singulis fere vocibus ac phrasibus

sibus immorari opus foret : quandoquidem pleraque Latinorum verborum ex ea significatione, in qua nata sunt, decesserunt. Satis erit in præcipuis aliquid operæ collocare, & quæ sit in iis, quæ apud auctores occurrunt, translatae significationis ratio, ostendere; ubi & hoc moneri magnopere necessarium: illa quidem imitari nobis, nova autem ad eorum exempla formare non nisi ingenii & iudicii maturitate quadam accedente licere. Postea etiam progymnasmata quædam adolescentibus tradenda, ut in partibus quibusdam expoliendis exerceantur, & ingenium atque lingua ad dicendi facultatem præparentur. Suasorias igitur & laudatorias materias aggredi interdum convenit: sed diligenti cura videndum, ne declamandi licentia & inscitia eloquentiæ causas corrumpant; & præcipitata atque immatura studia omnem maturitatis spem, si qua forte est, plane adimant. Denique adolescentes, quoties occasio sese obtulerit, illud sedulo sunt admonendi, ista omnia introductionem potius esse, quam artem ipsam: hujus autem perfectam cognitionem ex Aristotelis, Ciceronis, Fabii Quintilianii aliorumque monumentis, quibus futurum Oratorem abunde instruunt, comparandam esse: neque existimandum, à quoquam plenius & perfectius, quæ quidem huc pertineant, esse perscripta; quod veteres illi ad perspicuendas orationum virtutes ac vitia satis essent sagaces ac prompti; partim etiam dicendi gloria ita florent, ut omnibus aliis facile præriperent palmam. Quod studium ut majore fructu suscipiatur, legendas potius esse optimorum quorumque Orationes & historias, quam

consenfendum in commentariis Rhetorum ; variarum rerum cognitionem acquirendam , præcipue civilium , earumque omnium , in quibus actiones hominum verſentur ; Virtutem , probitatem , modestiam & integritatem maxime omnium hic valere : ita quidem , ut ſi quis honeſtatis opinione & prudentiæ ac eloquentiæ viribus inſtructus ad dicendum prodeat , ipſa Virtus & integritas verba facere videantur : cum fieri nequeat , quin fidem habeamus illi , quem ad noſtras utilitates potius , quam ad ſua commoda omnes curas , actiones & ſtudia referre credimus . Et hæc quidem de Arte Grammatica , Logica & Rhetorica ex hoc loco dicenda eſſe exiſtimavi , ſed ita ut pluribus ea haud confirmarentur . Neque enim noſtrum quemquam fore arbitror , qui cur diverſa ſentiat , ſatis habeat cauſæ : niſi ex eorum ſit genere , qui à diſcipulorum & imperitorum iudicio pendere malunt , quam recta docentium ſequi auctoritatem . Ego quidem non dubito futurum , ut , qui hanc ſtudiorum viam , quam ipſa rerum ratio monſtrat , ingreſſus fuerit , aliquando intelligat , operam ſe minime perdidiffe ; ſiquidem inertia & voluptate procul habita , laborem & vigilias impendere haud recuſet . Qui enim compendia tanto ſtudio quærun , jacturam optimarum rerum & temporis tandem querelis proſequentur . Viderint illi , qui eruditionem ſibi aut aliis promittunt abſque labore & induſtria , quid efficiant . Vitia quæ contraxit tam publica quam privata inſtitutio , una cum illis videmus , ſed de remediis erat cogitandum , non qua ratione ignavia aleretur . Sane qui ex eorum diſciplina egreſſus eximiam eruditionem ſibi compa-

comparaverit, hæcenus videmus neminem. At, in-
 quiunt, inepti sunt plurimi qui eorum adhibent consi-
 lia, sed sua incitia & laboris fastidio impediunt.
 Non nego; sed in scholis publicis & Academiis idem
 non raro contingere sponte fateor. Neque unius in-
 dustria & prudentia omnibus sufficere potest, neque
 plurimi, quæ recta sunt, capiunt. Ea igitur consilia
 arripienda, quæ in tanta docentium ac discipulorum
 multitudine non omnino fructu suo careant; idque
 cogitandum, egregiæ voluntatis & ingenii adolescen-
 tibus, qui illis doctrinis, quibus puerilis ætas imper-
 tiri debet, eruditi, satis esse, si vel unus sit atque al-
 ter, quorum eruditione, consilio & opera adjuti mul-
 tum in studiis literarum proficere queant. Sed relin-
 quimus illos compendiatos, satis certi, nihil un-
 quam sine magno labore concessum esse mortalibus.
 Quod restat, Magnifici, Amplissimi, Reverendi,
 Consultissimi, Experientissimi, Clarissimi, Pruden-
 tissimi, Doctissimi Spectatissimique Viri, ad vos me
 convertio, & gratias ago quantas possum maximas,
 non tantum pro ista benevolentia, quam diligenti
 attentione erga me declarastis; sed etiam pro honori-
 fica illa ratione, qua muneri huic publico præficere
 me, quibus hæc cura incumbit, voluistis. Iucundum
 mihi fuit cognoscere, studia mea licet absentis & ne
 de facie quidem noti, ita vobis probari, ut qui ex A-
 cademia publice ad hanc functionem ante semestre
 spacium vocarer, dignum me judicaretis. Quod ip-
 sum si divinitus contigisse dicam, minime quicquam
 à veritate alienum dici arbitror. Etenim humana
 consilia, quæ intervenire oportuit, satis scio nulla

ratione corrupta esse, neque mea ipsius ambitione, neque favitorum gratia, neque spe privatae utilitatis, nisi quam publica continet. Quae quidem omnia eo majorem mihi ingenerant animi fiduciam & rei gerendae alacritatem, maxime si, quod à summo Numine sperare ausim, perennis aliqua vitae ac morum accedat innocentia. Caterum nihil mihi antiquius erit, quam ea cogitare & efficere, quae ad erudiendam juventutem vestram conducere possint. Hoc enim pacto vestrae expectationi non minus, quam conscientiae meae satisfacere me posse confido. Laudabilis profecto cura, quae non tantum suscipitur, ut hoste à mœnibus depulso civibus & incolis securis esse liceat; sed etiam ut pacis tempore, qualis illa inter armorum strepitus esse potest, optimarum rerum studia, & quae ad Scholas atque publicam institutionem sunt necessaria, non negligantur. Neque vero dubito, quae hactenus eo nomine egistis aut in posterum acturi sitis, quin feliciter eveniant. Contemta est provincia, quam suscipimus, quotquot laboribus Scholasticis vel omnem tribuimus aetatem, vel aliquam ejus partem; si carnificina potius est quam ludus; uti existimant, qui non tam discendi quam compescendi causa petulantissimos quosque huc detrudunt. Multorum etiam exposita est judiciis, & in his non raro eorum, qui nihil minus possunt quam de re literaria judicare. Ita vel aliter docendi consuetudo pro lege obtruditur; quam qui imitari recusat, meliora edoctus, insolentiae arguitur; quasi quae à plurimis fiunt, omnibus probentur, nec ipsi Magistri multa tolerant, quae invidiae metu non audent

dent corrigere. Quin & discennes interdum non tam parere se præcipientibus, quam imperare postulant quid fieri velint; vana persuasione impulsî, suo iudicio conservari aut amitti docentium auctoritatem. Quæ tamen omnia erectos animos & ad alia non plane ineptos ita movere non debent, ut ab eo negotio studia & curas prorsus avertant, aut pro juventutis salute quorundam reprehensionem pertimescant. Omnes ut docti & boni evadant, qui fidei nostræ committuntur, promittere non possumus, multo minus præstare; moribus ita corruptis, ut ipsa Virtus & solida eruditio res humanas impedire potius, quam adjuvare vulgo credantur. Operæ nos fecisse precium putabimus, si aliqui hinc prodeant, quorum prudentia & integritas Ecclesiæ & Reip. utilis esse queat; idque ut perficiatur, omni studio & animorum concordia enitemur; illud sedulo acturi, ut quorum cura nobis delegata est, neque ipsimet deesse sibi velint, nostris adjuti laboribus atque consiliis, vitæ integritate & modestia ad optima quæque contendant. Quod ipsum sicuti, quantum in me est, promittere possum, ita de doctissimis Viris, qui hujus laboris erunt socii, sperare non dubito.

BENE-

BENEDICTI BAHRII

D E

MODESTIA ET PROBI-
TATE DISCENTIUM
ORATIO.

*Publice habita in Schola Stralesundensi;
cum Ampl. Senatus nomine tertia curia
seu classis Moderatori munus suum
imponeret. VII. Id. Octobr.*

CLIO XLIII.

Magnifici, &c.

Ies non sunt ita multi, cum in
consecssu vestrum amplissimo ex
hoc loco verba mihi facienda es-
sent. Quo quidem tempore ut
de erudienda in Scholis juventute
artibusque tradendis dicerem, non
minus loci postulabat ratio, quam
istius muneris, cui publice præficiebar. Verum non
aliter illud præstare tum licebat, quam ut plurima
prætermitterentur, in quibus erudiendi studium &
cura versantur. Quis enim infinitas erudiendi ra-
tiones horæ spatio satis commodè explicare poterit?
quas modo temporum suggerunt momenta; modo
ingenia discentium requirunt; modo ita oportet
attem-

attemperare ; ut, quicquid etiam fieri velint (est enim consiliorum varietas) quorum voluntate res geritur , docentium non minus illi prædicent obsequium , quam juvenus gaudeat, ad sua commoda erudiendi labores esse accommodatos. Quin & illa, quæ meditatus eram, linguæ quadam celeritate erant festinanda ; ne tempus duceretur, & dicendi mora auribus vestris fastidium pareret. Quamvis autem, quæ disciplinarum ambitu continentur, eorum capita in aliud tempus reservari non incommode posse arbitrabar, ægre tamen abstinui à probitatis, modestiæ & Virtutis studio, quo minus de illo etiam pro tenuitate mea quædam afferrem. Etenim valde dissentio ab illis, qui pueros & adolescentes ad Philosophiam Practicam ita rejiciunt ; ut dum Latine & Græce discant, non ita frequenter de moribus in Scholis monendos esse existiment : aut si qua morum & pietatis mentio fiat ; hanc ad solas confessionum formulas tenendas, istos vero non nisi ad gestus quosdam, quorum in congressu hominum & consortio usus est, referant. Quorum quidem magnam esse necessitatem & utilitatem cum ad fidei capita percipiendam, tum ad jucundam & minus agrestem vitæ consuetudinem, nemo negaverit : sed qui his instructus animi probitatem & Dei cultum non negligere sibi videtur, errore ducitur longe perniciosissimo. Certe Ludus literarius non est ejusmodi officina, in qua os tantum discantis informetur, omisis illis, quæ ad animum, mores, vitam denique universam laudabiliter transigendam sint necessaria. Eruditi namque ut evadant, qui in Scholis vivunt, neq; ex æquo omnes

expetunt, neque ita fieri prorsus est necesse. Quis vero suos non velit esse quam optimos & beatissimos? nisi qui ita est affectus, ut pro iisdem habeaturpia & honesta, eaque demum optima iudicet, quæ ad solas opes & divitias aditum præparent. Quam iudicandi perversitatem bonus quisque non tantum averfatur, sed contra ad virtutem & probitatem omnia studia esse referenda, vel sua sponte fatetur; tum demum Respub. beatas fore ratus, cum prudentia, virtus & modestia eas regere incipiant, aut qui regant, illarum amore duci. Sed quæ spes esse poterit horum omnium, nisi à teneris unguiculis eorum cura suscipiatur, & nascenti malo dum recens est, neque radices altius egit, salutaria quærantur remedia? Frustra ab adultis exspectamus, quod in pueris est neglectum: usus enim & peccandi consuetudo, nisi tempestive obviam eatur, plerumque impediunt, quo minus præceptis & admonitionibus postea relinquantur locus. Ligna ubi carie exesa vigorem amiserunt, franguntur potius quam flectuntur: idem plerumque solet accidere adolescentibus, quorum ingenia postquam in pravum induruerunt, difficillime omnium corriguntur. Quare puerorum & adolescentium ætas minime videri debet tam infirma, quin quid rectum pravumque sit, cognoscere queat; tum vel maxime ad probitatem erudienda, cum simulandi artem nondum didicerit. Neque etiam dubito, quin præcipientibus interdum haud ita ægre sint obsequuturi, modo gravitas morum, indignandi ratio temperata, & vitæ sanctitas salutaribus monitis fidem concilient. Etenim hoc facto discipulus, nisi plane
sit

fit ex agrestium numero, eorumque qui omnem verecundiam ejurarunt, tandem aliquando animadvertet, Magistrum ita esse affectum, ut nec habeat vitia, nec ferat; idemque in aliis prudenter & modeste efficere satagat. In præsentia igitur, quando novus Collega ad suscipiendas Scholastici muneris partes constituitur, & pro consuetudine aliquid est dicendum: hoc argumenti genus deligere volui, plane persuasus, Viri omnium Ordinum honoratissimi, futurum, ut mihi de modestia & probitate adolescentum ac puerorum verba facturo benevolas aures accommodetis. Id quod pluribus, & prolixiori veneratione nunc rogarem, si vel levissima nuper dubitandi causa mihi à vobis esset relicta, aut verborum blanditiis capi vos arbitrarer. Quid sit modestia, & quam necessaria illa, cum in omnibus omnium ætatum & ordinum hominibus, tum in pueris & adolescentibus, non magnopere disquirendum puto. Ipsum namque vocabulum quid sibi velit, nemini obscurum esse potest, qui paullo propius originem illius, & significationem consideraverit, quam, cum nasceretur, nata est. Qui Moralis Philosophiæ præcepta tradurit, illis Modestia est Virtus, qua quis in mediocribus honoribus sic se gerit, sicuti decet & honestum est; ita ut neque ambitiose illos quærat, neque sordide nimis & humiliter aversetur: tantumque illis distat à Magnanimitate, quantum à Magnificentiâ Liberalitas. Quæ quidem virtus, quod ex Aristotele cognoscimus, apud Græcos nomine suo caruit: unde excessuum & defectuum nomina ei tribuebantur, cum *ἐπιλόπιμος* dicti, quibus mens tam-

generosa, ut honorum dulcedine non caperentur; *φιλόπιοι* qui honestā illos consequendi rationem non omiserunt. Stoici quam dicunt *δυσταξίας* & *δυναμείας*, utramque Modestiam appellare non dubitat Cicero. Etsi vero hoc nomine appellatur cum Virtus illa, quæ in honoribus expetendis versatur vel fugiendis; tum istæ quæ efficiunt, ut suis quæque locis agantur & dicantur, ratioque habeatur oportunitatis idoneorum, ad agendum temporum, non tamen propterea ampliore suam significationem amisit, quæ modum innuit in omnibus rebus: ne quid liceat impotentiae animi, temeritati, libidini aliisque vitiis, quæ transverfas agunt hominum mentes, ut vel dedita opera non videant, quid factu sit optimum; vel si maxime videant, appetitus in rebus fugiendis & expetendis rationi adversetur. Et hanc Virtutem, quæ tam late patet, ut nulla pars vitæ neque publicis neque privatis in rebus illa vacare possit, ubique adhiberi in vita humana, & Reipub. communisque salutis interest, & singulorum. Quod ipsum animadvertimus, si illa cogitatio animum subeat, immoderatas quorundam cupiditates plus damni & mali Rebuspub. attulisse, quam multorum spectata prudentia potuerit avertere. Magnus ille Pompejus, qui antiquitatis memoriam Virtute superasse publice dicebatur, quid effecit, ut post tot bella tam feliciter gesta, post tot hostes devictos, post tantam triumphorum gloriam in suam ipsius perniciem & Reipub. interitum esset superstes, nisi immoderata mentis agitatio? quæ tanta erat, ut æqualem dignitate conspiciere non posset. Hinc tot ac tanta mala in Remp.

Roma-

Romanam inuenta; hinc atrocissima bella, quæ cum civilia essent, triumphis carebant; hinc cruentissimus ille dies, qui Pharsaliæ campos civium sanguine commaculabat. Cujus calamitatis expers esse Roma potuisset, si modestius aliquanto Pompejus Sœcero suo didicisset invidere. Neque verò feliciter egit C. Julius Cæsar; qui majorem ferre non poterat, sicuti nec gener parem. Paulo enim postquam in urbem venerat, & immoderatus aliquanto imperare videretur; nihil erat reliquum, nisi ut multis vulnibus confossus Bruti aliorumque dextra periret. Romanæ etiam eloquentiæ parentem nihil aliud perdidit, quam immoderatus linguæ usus. Etenim nisi nobiles in Antonium orationes inviso & alieno titulo inscriptas, impatienter nimis profudisset, nunquam esset futurum, ut vel capite suo rostra, in quibus ante floruerat, cruentasset; vel Rempub. tam misere lacerasset funesta illa proscriptio. Utinam vero posteris temporibus idem malum Resp. & imperia non infestasset. Quomodo Ecclesiam afflixerit immodestia Pontificum, Patriarcharum, Episcoporum, aliorumque quibus cura sacrorum commissa; mallet oblivisci me posse, ne istarum rerum cogitatio dolore afficeret recordantis animum. Initio quidem, cum Christianum fieri nihil aliud esset, quam semetipsum, uti ait Tertullianus, de Seculo exhæredare; & opum divitiarumque cupiditates reprimeret illibatus amor. Servatoris & persecutio publica; minus laborabat Ecclesia illis vitiis, à quibus avaritia & ambitio præsidia petunt. Post ubi fraternum nomen una cum respicienda interire, aut vis illius pravitatis vitio deperdi co-

perit; plurimos Pace constituta fidelium cætui ag-
gregavit non Religionis amor, sed spes commodorum; Quæ facilius fuit sectari sanctissimum nomen professis, postquam Pagani, uti pauciores ita & odiosiores, eodem loco esse cœperunt, quo antea fuerant Christiani. Indignum proinde videbatur pristinos conservare mores, & sancte vivendi consuetudinem puram custodire conscientiam; Quod imbecillum hoc esse crederetur, qui viribus ad nocendum destituti non possunt non esse iunocentes. Idem igitur eveniebat illis, quod posteris Iacobi; qui Conditoris curam fastidientes ad instar vicinarum gentium Regem sibi expetebant, non minus in suam ipsorum perniciem, quam in contemptum Cælestis & Potentissimi Ducis, qui vel nutu securam præstare poterat tutelam. Recens erat apud eos qui nuper ad Ecclesiam accesserant, gentilium dignitatum & mundani splendoris memoria; omnes vero bonam mentem, ut susciperent vel retinerent, fieri propter multitudinem non poterat. Crescere itaque cœpit paullatim, cum opibus potentia, præcipue in illis, qui cæteris erudiendis præesse volebant; quæ res cum in ipsis Christianis desideria tantæ felicitatis, uti credebatur, excitavit; tum Paganos ad Christianorum Religionem amplectendam pellexit. Unde Prætextatus quidā Damaso antistiti ludens confirmabat, se protinus fore Christianum, si urbis futurus esset Episcopus. Cumque in eum locum deducta esset res Christiana, ut tantam vanitatem suspiceret imperita plebecula, fascinata jam publica pravitate & errore, suoque malo nimis credula; congestæ sunt in immensum divitiarum,

tiæ, & ad sanctissimi nominis reverentiam tantum, non plane abolendam adjumento fuit inconsiderata benignitas. Accessit Barbarorum tanquam repentina ferarum a'iqua multitudo, quorum impetu cum longe lateque laceraretur Occidentis imperium, multorum intererat in turbida, quod ajunt, aqua piscari. Omnia sibi tandem vindicavit ambitio & amplificandæ dignitatis studium; cui rei frustra deinde remedia adhibere conati sunt, qui tot annis dissenferant, Primatus fortean, quod multis usu venit, majori cupiditate, quam Antistitis odio. Sed & inter ipsos qui iisdem temporibus voluerunt in eadem sede summas tenere, quæ dissidia! quantum turbarum! Alii vehementius concupiscebant, alii invidebant acrius, alii periculose insidiabantur; nec desuere qui armis rem gerendam esse rati perire maluerunt, quam quibus nollent, imperium relinquere. Neque horum cupiditate & immodestia terminari potuit hoc malum, sed ad inferiores quosque Ecclesiarum Præfectos ista lues dimanavit, tamdiu horrida & invisa aliis, donec eadem audendi nacti fuerint occasionem. Quam vero inde ab ipsis incunabulis turbarunt Ecclesiam immoderati quorundam animi vel sparsis hæresibus vel sublata præter causam concordia, Veterum scripta nos docent. Quæ omnia tanto expeditius perficere poterunt ejusmodi indolis homines, quo magis, uti Cyprianus ait, modesti tacebant, timebantque conscii. Minus certe, quod non dubito, molestiarum ab omni ævo Ecclesiam infestasset, si immoderata cupiditas vinculum illud Christianæ societatis, caritatem non ita turpiter rupisset, & quod neque viribus præ-

staret

stari poterat, neque alia ratione parum frugifera, id prudentum virorum pertentasset modestia. Juxta igitur cum hac Virtute, qua procul habita, innumeræ calamitates Ecclesiam & Respub. opprimunt, quomodo Probitatis amor atque studium animis adolescentum ingenerari posse videatur, quæque illa impediant, inprimis consideratione dignum puto. Etsi enim non plane desperandum est, & illos ad frugem pervenire posse, quorum ingenia male agendi consuetudo & usu jam confirmata improbitas corrumpit; tamen plerisque hoc accidit, ut tales eorum sint animi, mores, vita dentque omnis, quales illos puerilis educatio reddidit, & adolescentiæ institutio. Cujus curâ quia multis simul incumbit, neque ad unum etiam pertinet vel culpa, si perperam; vel gloria, si prudenter hic actum. Equidem ea est hominum natura, ut unusquisque gloriam cum aliis sibi communem ad se solum rapiat; culpam vero cujus & ipse est particeps, omnem in alios conferre magnopere studeat. Hinc adolescentes, si quando ista est eorum felicitas, ut resipiscere post errores incipiant, quicquid primis annis neglectum aut aberratum, minime sua, sed vel parentum vel Præceptorum culpa factum videri volunt. Parentes quia affectu prohibentur, ne filios arguant ignaviæ, contumaciæ & improbitatis, Præceptorum hoc vitium esse contendunt. Neque hi quicquam malunt de se putari, quam nihil admisisse, quod sit reprehensione dignum. Sane si votis esset locus, optarem non tantum alios, qui erudiendi munus suscipiunt, sed & meipsum inprimis eum esse, cujus vita potius & mores teneram ætatem & lubricam

cam adolescentiam informarent, quam sermo & monita; cujus sanctitas improbitatem coerceret discen-
tium; cujus frugalitas & continentia luxum eorum reprimeret & cupiditates; cujus integritas & lingua fallere nescia dolos prohiberet, & mentiendi invercundiam; cujus labor & assiduitas ignaviam discuteret; cujus gravitas ferociore à licentia deterreret: denique qui quæ doceat præcipiendo, ita confirmaret faciendo, ne fides præceptis detraheretur, neu vita dirueret quæ verbis adstruuntur. Sed, quod sapienter ait Seneca, nontam bene agitur cum rebus mortalium, ut meliora pluribus placeant. Etenim: ne mea ipsius vitia dissimulê, si quibus sim obnoxius, aliter interdum fit à nobis, qui in Scholis vitam transigimus, & æque laboramus ut honeste vivatur, quam ut optime discatur. Alii sordida quadam vivendi ratione impedimus adolescentes, ne humanitati assuescant; tanquam civilitas à Scholis exsulare debeat, & animi quædam sit fiducia, loquendi invercundia, & morum immodestia. Alii tum demum de honestate, & officiis præcipimus, cum ex alterius Virtutis utilitates quasdam nobis comparari posse putamus. Alii indignandi frequentia id efficimus, ut ludibrio sit sæpius iterata objurgatio: quam morositatem & irasci consuetudinem non illepide quidam à nobis jocabatur inde contractam esse, quod toties legeretur primus Homeri versus: *Μῆνιν ἄειδ' Ὀδύσσευ*. Alii neque meliores reddere possumus pueros, cum ipsimet simus improbi, neque literatiores ipsi illiteratissimi; à discipulis interim requirentes officium, cum quæ Doctoris sunt, non præstemus. Alii virgas ita vibramus,

& ferula sævimus, ut multi à studendi proposito surgentur, & nihil minus consequamur, quam discipulorum obsequium. Profecto non memini me Rotterodamensem Erasimum iracundiorem usquam in scriptis suis deprehendisse, quam cum eam ob causam in nos invheretur. Plura etiam fortassis reperiet curiosus scrutator, cui non injucundum est, exquirere vitia, quibus Scholastici labores corrumpantur. Nos certe ingenuus candor adeo non destituit, ut vel vitia nostra celari velimus, vel quod usitatus, humana imbecillitate aut aliorum improbitate excusari. Neque vero est, cur parentes alique existiment, hinc sese nactos, quod suæ perversitati, stulto amorì & liberorum contumaciæ prætendant: Potius id agimus, ut emendandi studium in omnes partes sese diffundat; neque eodem animo & indole propter multitudinem omnes Magistri esse credantur. In Scholis non puto quemquam plus posse proficere, quàm qui omni studio enititur, ut à pueris & adolescentibus ametur: & hoc non tam indulgentia perficiendum putat, quam laboris assiduitate & erudiendi prudentia, qua eo magis opus est, quo altiores recessus, majoresque latebras habet juvenilis ætas. Ad fiduciam ita sunt assuefaciendi, ne in audaciam illa degeneret, quæ plus nocet quam subtimida modestia: ista enim ægre cohibetur adultioribus annis, quando pro generosa quadam animi virtute fallit; hæc vero accedente rerum peritia, & prudentum atque eruditorum contubernio in liberalem verecundiam paulatim desinit; quæ ad vitæ humanæ societatem est maxime idonea. Nihil proferendum, nisi quod

quod prodesse queat ; ne quid discatur , quod nescisse fuerit rectius. Non ante cesset declarandi industria , quam cognoscatur , probe percepisse auditores , quæ vel in auctorum interpretatione occurrunt , vel in sermone nostro ; neque propterea orationem sine causa sæpius interrumpi necesse est exquirendi frequentia. Vultus discipulorum ita potest componi , ut rerum , quas docentur , intellectu lætari ; vel obscuritate offendi sese ostendant : quod olim in Ecclesiasticis concionibus publice factum ex Augustino cognoscimus. Illud ostendendum , nihil maiorem nobis afferre iucunditatem , quam diligentiam & probitatem ; Quod obscurum esse nequit , si propter illa tenuioris fortunæ adolescentes , a quibus lucri quicquam sperare non licet , tanto prosequamur amore & benevolentia , ut commoda eorum vel nostris facultatibus , vel aliorum benignitate adjuvare studeamus. Propter neglectas operas tum imprimis indignandum , quando non tam ingenii imbecillitate , quam contumacia & affectata ignorantia peccatum intelligimus . In emendando acerbiter & contumeliam , quantum fieri potest , fugiendas esse non immerito censet Fabius. Tristis austeritas non minus est cavenda , quam dissoluta comitas : quandoquidem altera odium , altera contemptum pariat. Mentendi licentiam omni contentione auferre decet , ita quidem ut nunquam in vita vel mentiamur ipsimet , vel alium propter utilitates nostras mentiri velimus : rarius certe peccabit , cui religio est delicta inficiari. Mirum verò quantum prodest ad emendandos hominum animos , si , quando alienis pec-

catis nostra commoda adjuvari queant, his carere nos malle ostendamus, quam committere ut alius propter nostrum emolumentum perperam agat. Plurimus de honesto ac bono sermo sit, iterum ait Fabius; nam quo sæpius quis monuerit, hoc rarius castigabit. Videndum autem ne de illis Virtutibus sæpius verba faciamus, quæ ad nostra commoda potissimum pertinere credantur. Etenim qui de gratitudine & reverentia toties præcipit, ad suas utilitates & privatam auctoritatem referre ista putabitur; quamvis hanc conservari propter discipulorum studia magni interest, & illas minime negligi propter victum & cultum. Denique illæ opiniones teneris puerorum & adolescentum animis instillandæ, primum omnium maximumque esse, ut boni viri simus, idque voluntate inprimis constare; quam qui vera fide induerit, facile eum accipere illas artes, quæ virtutem docent ac pietatem: non ita multis opus esse ad vitæ honestæ beatæque institutionem; longam reddi hanc operam nostra ipsorum negligentia & repugnantia: volentibus non difficile esse meliora discere, ut mirum pene sit, malorum tantam esse multitudinem, cum facilius multo sit, & minus periculosum secundum virtutem vivere, quam libidini, avaritiæ, ambitioni & voluptatibus indulgere. Quia vero non satis est à Magistro probitatis & modestiæ rationem ubique haberi in vita, & adolescentum animos ad Virtutum studia salutaribus præceptis ita duci, ut ad vitam illis utendum esse doceantur, non ad ostentationem; disciplinæ etiam severitate mores discipulorum regendi sunt & poenæ interdum irrogandæ, ne
ignoscen-

ignoscendo malis boni etiam perdantur. Pessimum oportet ire omnia, ubi ista negligitur vel propter invidiam & odia quæ metuuntur, vel propter commoda, quæ, si remissius agatur, sperare liceat. Si quæ incunda est à discipulo gratia, malo ita mereri, ut eo demum tempore gratias mihi deberi sentiat, quo per ætatem bonum à malo discernere, & quæ in adolescentem profecta, de iis Vir factus recte judicare possit. Minime vero illud futurum, si quæ puerili ætati aut juvenili lasciviæ jucunda accidunt, ita fieri permittamus, ut quod ab adolescentibus primum mansuetudini nostræ tributum, deinde ubi ad maturam ætatem perventum, noxiæ indulgentiæ imputetur. Equidem virgas atque ferulas omne genus vellem è Scholis posse removeri, & illam coercendi rationem ubivis obtinere locum, modo hinc abesset: neque enim injucundius quicquam Præceptori accidere potest quam inter ejulatus & virgarum susurros officio fungi. Sed in tanta morum licentia & ingeniorum lascivia aliter fieri non potest, nisi prorsus amitti velimus illud, quod quoquo modo conservari debet. Verum prudentia quadam hic opus est, ne ultimum illud, quod quidem in Scholis adhiberi potest, remedium vilescat; & cædendi necessitas in puerorum ingenia ita transferatur, ut non nisi concisi emendentur. Permagni interest ita remunerari probos, & puniri delinquentes, ut hi literas odisse ne incipiant, antequam amare possint, istos vero securitas ne perdat. Animadvertat discipulus, ægerri-me omnium hoc emendandi modo Magistrum uti; non ut spe impunitatis prævaricari perseveret, sed pu-

dore victus, si quid in eo liberalis ingenii reliquum;
æque invitus delinquat; quam Magister puniat.
Quod ipsum ut efficiant; quibus adolescentum &
puerorum cura delegata est, cum serveritate mansue-
tudinem conjungant oportet; sine contumelia casti-
gent, & iram quam maxime prohibeant, si quando
ad pœnam est accedendum. Hoc enim si fecerint,
minime dubitandum, salutarẽ fore disciplinam; quip-
pe quod illi, qui puniuntur aut reprehenduntur, a-
nimadversiones non ad ejus qui punit aut reprehen-
dit, sed ad suas utilitates referri perspiciant. Sed
fac tales nos esse, qui in Scholis laboramus, qua-
les omnium maxime ipsi optamus; bonos, doctos &
prudentes, ab avaritia alienissimos, honestatis, Vir-
tutis, urbanitatis & modestiæ amantes, ad laborem
assiduos, vitam denique omnem ita transigere, ut
optimus quisque nos deligat, quorum consuetudine
fruat, & mores imitetur. Quid quæso dicemus
de domestica consuetudine & educatione, quid de
immoderata parentum indulgentia & præpostero er-
ga liberos amore. De aliquibus nunc loquor, quos
ubique reperiri, nemo qui rebus humanis interesse
coepit, puto, inficiabitur. Quicquid severitatis ad
disciplinam conservandam & compescendos impro-
borum animos in Scholis adhibetur, illi intempe-
stiva indulgentia domi relaxant; male suis consul-
tum existimantes, nisi amorem stulta quadam ratio-
ne ubique ostendant. Quæ omnia quantopere ad-
versentur legitimæ educationi, prudentiores intel-
ligunt parentes: qui quo impensius liberos suos dili-
gunt, eo diligentius amorem occultant, ne illi plus
justo

iusto sibi licere, & propter delicta minus meruen-
 dum existiment. Id quod eo acerbius accidit res
 humanas consideranti, quo minus ad publicam sa-
 lutem tuendam vel recuperandam inde habentur au-
 xilia unde exspectari fas esset. Certe in ea incidi-
 mustempora, ut quæ à majoribus liberaliter donata
 sunt, vel ad sublevandas necessitates publicas impen-
 dantur, (quod tolerabile esset, si præter illa nihil
 suppete. et ad avertenda incommoda) vel eorum in-
 ferviant cupiditatibus, ad quos cura potius pertinet,
 quam qui inde percipiantur fructus. Si quos præte-
 rea ad bene merendum impellit gloriæ cupiditas aut
 pietatis amor, raro admodum ad Ecclesiam & Remp.
 inde redundat aliqua utilitas. Et enim cum ipsi inge-
 nia discernere nequeant, aut non diu sint supersti-
 res; illis interdum relinquatur hujus rei cura, qui post-
 habitis emolumentis publicis ad sua suorumq; com-
 moda transferant laudabilem quorundam benigni-
 tatem. A cujus usu cum excludantur, quorum præ-
 ceteris spectata est probitas & industria, frustra sunt;
 qui ex iis agris sperant fructum, qui in spem longe-
 aliam colantur. Reliquum est igitur ut ab illis po-
 tissimum optima quæque nobis promittamus, quibus
 tantum est in re familiari, ut quo minus solidam
 consequantur cruditionem, nulla obstat egestas; eo
 vero sunt animo, ut quæ præstare possint, nulla igna-
 via aut aliarum rerum cupiditate adducti omittere
 velint. Verum quid tandem sperare licebit, si &
 hanc spem nobis præcidat quorundam noxia non-
 tantum indulgentia, sed & mollior liberorum cura.
 Quid efficiet Magister præceptis tolerantiae traden-
 dis,

dis, si ægre ferant parentes, quoties durius aliquanto puer recumbat? Numquid voluptates fugiet, cuius corpori ne quid grave sit, ultra modum providetur? Quarum rerum quæso desideria æquo animo is feret, cui ut omnia, quæ expetat, semper sint parata, tanto studio efficitur? At, inquit aliquis, parum ista conveniunt parentum & majorum dignitati, quam tueri filius minime potest, si quid illi cum pauperibus & egenis commune: Quod si necessitates quædam ingruant, abundat omnibus quibus levare istæ possint; acerbum vero videtur illis rebus assuescere tenerum adolescentem, quas ut unquam in vita sustineat aut suscipiat, fortassis minime futurum. His quidem ne respondeam, nulla ratione melius paternam posse conservari gloriam, quam qua primum parta est, neque celerius amitti, quam quoties ab ista receditur, Virtute scilicet, quæ summa in patientia rerum adversarum ponitur. Quotocunque vel ad vespertinum usque exploratum est sese felicem fore, nedum semper fortunam habiturum fautricem? Parum equidem suæ securitati consulere arbitror, qui non ante cogitat de propugnaculis exstruendis, de milite cogendo, de annona comparanda, quam cum hostis omnes obsideat aditus. Merito arguitur illius Medici imprudentia, cui non omni tempore ad depellendos morbos in promptu sunt remedia. Non aliter sese res habet in Vita humana; varios illa habet casus, quos nemo neque secure exspectat imminentes, neque præsentis forti excipit animo, nisi quem roboravit non infrequens adversa tolerandi exercitatio. Quæ sicuti ad omnem ætatem suo quodam modo

modo pertinet, ita nulla esse potest, si id agatur, ut nunquam corpus adolescentis afficiant, quæ sensibus parum accidunt jucunda. Quibus aliud videtur, plerumque malam à filiis suis tandem inire solent gratiam; cum, quoties conficiendum est cum fortuna parum prospera, vel victi manum turpiter dare, vel foediori fuga salutem petere cogantur. Ad vitia parentum & domesticorum deinde veniamus oportet; quorum intuitu depravati filii meliores esse non possunt illis, quorum consuetudinem imitari pietatem & obsequium esse judicant. Malunt quidem parentes videri non nisi optime consulere liberis suis, eosque ad virtutem & honestos labores condecifacere: Verum si ex illis, quæ sunt, præcepta concipiantur, & actiones pro exemplis habendæ; filios suos, contra quam Ascanium Aeneas, complures ita affari non injuria quis existimet:

**Disce puer fortunā ex me vanosq; labores;
Virtutem ex aliis.**

Ideoque toties licet Magister de integritate, virtute & modestia publice præcipiat, nihil proficiet, si doli, fraudes, avaritia, vitia omne genus, & immoderata vivendi ratio domi corrumpant, quæ in Scholis optimo consilio ad probitatem ingenerandam fuere tradita. Domestici enim & familiaris contubernii sicuti tanta vis est, ut probi parentis sedula cura & providentia non raro plus valeat ad corrigendam pueri indolem, quam improbi Magistri vitia, si cujus in disciplinam incidat, ad illam pervertendam;

N

ita

ita etiam parentum vitia & indulgentia lubricam
 ætatem quam maxime subruunt, quantumvis salu-
 berrimis aliorum monitis sit erudita & exemplis ful-
 ta. Egregie Satyricus, cum huic argumento inte-
 gram impenderet Satyram, maximamque teneræ æ-
 tati reverentiam deberi assereret, omnibus illis quæ
 dictu visque fœda, à liminibus prohibitis, intra
 quæ puer est;

Velocius, *inquit*, & citius nos

Corrumpunt vitiorum exempla domestica,
 magnis

Cum subeant animos auctoribus. unus &
 alter.

Forsitan hæc spernant juvenes, quibus arte
 benigna

Ex meliore luto finxit præcordia Titan;
 Sed reliquos fugienda patrū vestigia ducūt,
 Et mōstrata diu veteris trahit orbita culpæ.

Prudens & castissimus erudiendæ juventutis Magi-
 ster Fabius Quinctilianus maxima inde in Scholas
 mala derivari jam sua ætate conqueritur, quod ni-
 mia parentum indulgentia & domestica vitiorum
 exempla rectam educandi rationem evertant. Cujus
 verba recitare non alienum existimo; neque enim
 melius illa dici possunt, neque ad mores nostros ac-
 commodatius. Utinam, ait, liberorum nostrorum
 mores non ipsi perderemus. Infantiam statim deli-
 ciis

cūis solvimus ; mollis illa educatio , quam indulgentiam vocamus , nervos omnes & mentis & corporis frangit . Quid non adultus concupiscet , qui in purpuris puer repit ? Nondum prima verba exprimit , jam coccum intelligit , jam conchylium poscit . Ante palatum eorum , quam mores instituimus . Inlecticis crescunt ; si terram attigerint , è manibus utrinque sustentium pendent . Gaudemus si quid licentius dixerint ; Verba ne Alexandrinis quidem permittenda deliciis risu & osculo excipimus . Nec mirum : nos docuimus , ex nobis audierunt ; Convivia ebriosorum obscenis canticis strepunt , pudenda dictu spectantur . Fit ex his consuetudo , deinde natura : discunt hæc miseri , antequam sciant vitia esse . Inde soluti & fluentes non accipiunt è Scholis mala ista , sed in Scholas afferunt . Ita quidem Fabius . Quæ omnia aliaque quamplurima Scholas & Gymnasia tam invisa reddunt , diffitendum enim non est , ut optimi parentes horreant interdum eo mittere pueros , unde plus damni metuendum in vita , quam commodi expectandum in literis . Quorum equidem ratio prorsus improbanda non est , si quidem major debet esse cura , ut honeste vivatur , quam ut vel optime discatur . In turba enim , quæ plerumque nihil est aliud quam sentina vitiorum , teneram ætatem ad pejora exemplis duci , utinam falso jactaretur . Verum neque illud dissimulare possum , domesticos informatores interdum simulata virtute & doctrina , rudiatem & vitia sua occultare , donec fidem inveniunt apud viros harum rerum non satis intelligentes ; disciplinæ vero conservationem non magis securam in-

ter malos servos & impudicas ancillas ; ita ut domi quandoque nos opprimat, quod foris metuimus. Sed revertimur ad parentum educationem, & multorum vivendi consuetudinem, in qua juvenes enutritos sæpe ad pessima duci diximus. Non tam rudes & rationis expertes eos credo, quin meliora perspiciant ; sed quæ est natura hominum in vitia proclivis, non modo cum venia, sed etiam cum ratione peccare volunt videri : ideoque à fragilitate humana excusationem petunt, & spem impunitatis parum pie interdum confirmant summi numinis ad ignoscendum facilitate, falso persuasi, rerum suarum curam non permittere ut aliter vivatur ; quod, si veritatis semper sit habenda ratio, res familiaris videatur negligenda, quæ mendaciis & simulandi calliditate non raro augeatur ; si integritas servanda, multis commodis sint carituri, quæ dolis & decipiendi arte comparentur ; & ut paucis dicam, omnino credant, nihil utilitates suas plus impedire, quam pietatem & honestatem. Quæ quidem opinio ita pervagata est, surgentibus quotidie novis criminibus, nec veteribus repudiatis ; ut tanto prudentiores nos esse credamus, quanto simus peiores ; & qui contra vel hiscere audeat, novitatis titulo quam maxime sit suspectus. Veremur enim sollicitudine plusquam noxia, ne in divinam clementiam injurius sit, qui credulitatem sine obsequio nullam esse contendit ; idque cavendum judicat, ne ignominia afficiatur is, cujus nos profiteamur cultores. Verum ne quid dicam de sanioribus gentilium, quorum non exiguus est numerus, mirum quantum sententia illa & agendi ratio à consuetudine veterum

Chri-

Christianorum discrepat. De illis loquor qui propius aberant ab Apostolorum temporibus, nondum obliti, qualis sub illis credentium vita fuisset, aut semper esse deberet; propterea felices, quod eruditionis arrogantia, & hanc secuta curiositas, ambitio dignitatum, & fallax superstitio minus, quam paullo post fieri cœpit, Ecclesiam infestasset. Apud disertissimum Minucium Felicem confirmat Cæcilio Octavius, Christianos pudorem non facie sed mente præstare; convivia non tantum pudica colere, sed & sobria; neque enim indulgere epulis, aut convivium mero ducere; sed hilaritatem temperare gravitate, casto sermone, castiore corpore. Innocentiam & modestiam, signum esse quo se dignoscant; mutuo amore, id quod gentiles etiam doceant, diligere, quod odisse non noverint; Deum in pectore potius consecrare, quam in delubris, neque aliam offerre hostiam, nisi bonum animum, puram mentem & sinceram conscientiam. Omnino arbitrari illos, qui innocentiam colat, supplicare Domino; qui justitiam, Deo libare; eumque propiciare, qui fraudibus abstinere; & optimam cedere victimam, qui hominem surripiat periculo. Hæc esse Christianorum à Gentilibus admodum diversa sacrificia, hæc Dei sacra; ita ut apud eos Religiosior ille, qui justior. Negat Tertullianus, tantos discipulos invenisse Paganorum dicta, quantos Christianorum facta. Non verbis illos esse Philosophos, ait Cyprianus, sed factis; non sapientiam præferre vestitu, sed veritate; virtutis potius conscios esse, quam jactare illam; nec loqui magna, sed vivere. In congressibus & conventiculis

eorum negat Arnobius audiri quicquam, nisi quod humanos faciat, nisi quod mites, verecundos, pudicos, castos & familiaris rei communicatores. Quanto quis justior, ait auditor illius Lactantius, tanto sublimiorem judicari, & cælesti beneficio ita familiarem Christianis esse hanc virtutem, ut illam non nomine sed re noverint; neque verbis modo, sed etiam exemplis ex vero petitis, vera esse quæ ab illis dicantur, ostendi: divitias vero & opes fraudibus atque injuria parare tam alienum esse eorum moribus, ut nesciant lucrum appetere, sed victus illis sufficiat. Cujus generis plura posterorum memoriæ produnt Scriptores illi, quando adversum gentes Christianam propugnant Religionem. Neque est, cur domesticum testimonium parum hic valere credamus; ipsi gentiles, qui acerrimo odio Christianos prosequerantur, huic rei fidem faciunt. Imperator Alexander Severus adeo dilexit illam sententiam: **Quod tibi non vis fieri, alteri ne feceris**, ut in palatio & in publicis operibus præscribi juberet. Si quis militum de via in alicujus possessiones deflexisset, pro qualitate loci aut fustibus subiciebatur in conspectu ejus, aut virgis, aut condemnationi; aut si hæc omnia transfret dignitas hominis, gravissimis contumeliis, cum diceret: Visne hoc in agro tuo fieri, quod alteri facis? per præconem etiam, cum aliquem emendaret, hæc eadem dici jubebat. Ista vero à Christianis cum audivisse & tenuisse, testis est Ethnicus scriptor Lampridius, qui de vita illius est commentatus. Egregium vero est inprimis C. Plinii

testi-

testimonium, qui cum per literas Trajani Imperatoris consilium expeteret, quid sibi faciendum in cognitionibus de Christianis; hanc summam fuisse scribit vel culpæ eorum vel erroris, quod statò die ante lucem convenire essent soliti, carmenque Christo tanquam Deo secum dicere invicem, & sacramento se obstringere non in scelus aliquod, sed ne furta, ne latrocinia; ne adulteria committerent; ne fidem fallerent, ne depositum appellati abnegarent; idque sibi affirmasse, qui quondam Christiani, defectionem essent testati, imaginem Imperatoris Deorumque simulachra venerando, & Christo maledicendo. Utinam & nostris temporibus magna esset ejusmodi conjuratorum turba: neque enim puto, inde metuendum esse, ne quid Resp. detrimenti capiat. Sed priscorum innocentiam, & quomodo postera secula vel hæreseos, vel superstitionis, vel ambitionis, avaritiæ & improbitatis veneno infecta, ab illa degenerarunt, pluribus persequi nunc nihil attinet; ex illis vero quæ modo dixi, non obscurum esse arbitror, vanas esse excusationes, quas vitæ consuetudini non pauci ex illis, qui nunc vivunt, prætere haud verentur; quasi aliter vita transigi nequeat. Etenim, quis fieri posse negabit, quæ olim facta legimus, & adhuc fiunt ab illis quibus maxima cura est, fidem quam Deo dederunt, pietate, morum & vitæ innocentia præstare, quique ad se pertinere putant, exemplo suo cum alios, tum inprimis ex se natos in via virtutis tenere. Vobis vero, studiosi adolescentes, ad vos enim potissimum hæc spectat oratio: cum non tam illud enitumur, ut ad alios relegato crimine Præceptor

ceptor & Schola à vitiis prorsus abesse existimentur, quam ut ab omnibus salutis & commodis vestris, adeoque universæ hominum societati per vos consulatur: Vobis inquam nihil proderit, quicquid etiam aliis peccatum, ad excusationem negligentiae & improbitatis. Non purgabit vos parentum indulgentia, postquam quæ ab illis fieri debuerunt, pernoscere ceperitis; neque vero ut mores vestri perderentur, illi indulserunt; sed ut molliter tractati obsequio postea rependeretis hanc, quæ talis putatur, benignitatem. Videndum erit, ut amor eorum per errorem plus damni vobis ne attulerit quam commodi; & pudor revocet in viam, quibus exorbitandi potestatem nimia fecit licentia. Ita neque vos in perniciem converteris parentum studia, neque illis dolori erit amor nimium indulgisse; quem quidem omni tempore moderari, haud scio an omnium sit difficillimum. Quod si ab illis aliisque quorum cura aut consuetudine uti contigerit, quædam committantur à virtute & honestate aliena, non quid faciant isti, sed quid fieri debeat, considerandum est. Equidem non dubito, quin cui plures nati sunt filii, illum minus amet, quem maxime omnium à suis moribus dissentire videat. Sicuti enim consensu nihil est firmitus ad benevolentiam inter homines conservandam, ita cultui quem nobis debet, detrahare aliquid judicatur is, qui dissidere audeat; & crimen exprobrare, qui diversam teneat vitæ consuetudinem. Verum neque illud ambigo, filiorum constantia tandem moveri parentes, ubi animadvertant non contumaciæ tribuendam esse morum illam dissimilitudinem & voluntatum discrepantiam,

pantiam, sed pietatis studio. Id quod tanto celerius futurum, quanto magis in aliis rebus obsequendi desiderium ita declarabit filius, ut reliquos longo intervallo post se relinquat. Etenim hoc facto fieri non potest, quin parens non modo falsas succensendi seu minus amandi causas antea habuisse cognoscat, sed etiam in se paulatim damnet, cujus odium in filio tulerit gravius. Et absque hoc futurum, parentum peccata non efficient, ut si eadem faciatis, ubi meliora cum bonorum consuetudine, tum Magistrorum monitis edocti sitis, delicta vestra mercantur veniam. Nonne quæso duplicabitur crimen, si quæ male à majoribus accepistis, turpius carelinquantur posteris? jure aliquando querentur illi; cum quod vitare potestis doctrina adjuti, ita à vobis admittatur, ut illis male vivendi sit exemplum atque auctoritas. Præterea consuetudinem forte prætenditis, quam imitari tutissimum existimetur, neque in devia abduci credatur, qui regiam sequitur viam. Equidem non minus inde peterem veritatis investigandæ rationem, quam honeste vivendi normam, nisi jam dudum juberent optimi quique pro suspectis haberi illa, quæ vulgo placent. Iudicabant enim alienum esse, ab eo postulare virtutis præcepta, qui turpitudinem ne dissimulare quidem velit; & illum agnoscere Magistrum, cujus judicia si probemus, non nisi opinionum inficiamur pravitate. Longe hic alia quam in cæteris itineribus, conditio est: in illis rogati incolæ viam monstrare possunt, neque est cur sine causa viator vel dolum metuat vel incertiam; eo securior, quo minus de indice dubitare opus habeat.

Verum magna hic est diversitas : ut enim celeberrima quæque via est , ita maxime fallit ; non quod illam ingressi minime pergant , qua cæperint ; sed quod vestigiorum multitudine decepti nunquam eo perveniant , quo , cum in bivio essent constituti , tendere præ se ferebant . Quanta est perversitas non judicare quicquid agitur , sed ita credere idem agentibus , ut alienis pereundum sit exemplis ; quasi felicius sit cum plurimis ruere , premente populo , quam cum paucis tueri incolumitatem ! Quanta denique stultitia nostram conscientiam , quam recta ratio , sapientum monita , exempla bonorum , vel quod tutissimum omnium , Servatoris decreta informare possunt , contemnere , & aliorum errantem aucupari opinionem ! Turpe vobis est , adolescentes , non plus aliquanto sapere illis , quibus nunquam in animo fuit , ideo ad Scholas accedere , ut errores fugiant & recte vivendi incant rationes ; ut sese regere discant , vel quod proximum est , admoniti redeant in viam ; ut virtutis imbibant præcepta , ad eamque assuefacti prudentiam adhibeant in rebus gerendis , cum ad suam incolumitatem , tum ad aliorum salutem . Illos sane , quicquid etiam judicare velint , una cum suis judiciis relinquere oportet , tanquam Magistros ad honestatis & virtutis doctrinam nimium ineptos . Contra illud vestrum crit , sedulo dare operam , ne propter vestros mores & improbitatem male audiant optimæ literæ , earumque studia . Vana profecto est eruditio , & fallacia oblectamenta , si nihil quod ad animum perveniat , à studiis liberalibus petatur . Quæ quidem si ita colere libeat , ut omni tempore quid referant illa ,
compu-

computetur; curam morum relinqui omnino erit
 necesse. Solam vero gloriam tanquam vigiliarum
 & laborum ex literis petere mercedem, aut aliis pro
 arbitrio nocendi facultatem, haud scio an omnium
 sit vanissimum & maxime probrosum. Etenim sicuti
 præclaram doctrinam, quam vitæ integritas & mode-
 rata animi constantia decorat, nominis fama ultro se-
 quitur, tanquam umbra corpus suum; ita qui ad glo-
 riam omnia referunt, sua se privant libertate, qua ni-
 hil cuiquam debet esse carius: Animi vero viribus &
 ingenii doctrina sese armare, non ut patriæ salus pro-
 pugnetur, & afflicti inde petant præsidia; sed ut alie-
 na oppugnentur commoda & hominum societatem
 freta ingenio malitia labefactare possit, id vero nihil
 aliud est, quam publice & privatim optinis rebus
 scelerate abuti, & sapientiam in odium adducere &
 invidiam. Non isto animo, adolescentes, literis in-
 cumbere fas est; non lucro parando, aut famæ ca-
 ptandæ, aut nocendi inservire debent libidini; sed
 ut erroribus liberati ad nostram aliorumque sapiamus
 salutem. Quæ si procul habeatur, nihil sanantes lite-
 ræ haud aliud quicquam efficiunt, quam ut orbem
 corrumpant ficto nitore. Nulla sunt vestra studia,
 nisi in eo velit elaborare, ut quotidie aliquid virtu-
 ti accedat: omne illud obsit necesse est, quicquid ita
 prodest studiis, ut morum negligatur cultus & vitæ
 probitas. Quid enim juvat de officiis præcepta tradi,
 si quæ facere deceat, vel nescire velimus, vel omit-
 tere? quæ perversitas quanto major est hac ætate,
 eo minor ad reliquam vitam redundabit inde utilitas.
 Neque vero convenit existimare, pueris esse scripta,

quæcunque in Scholis traduntur; Aliud agebant
 Panætius, Tullius & hos imitatus inter Christianos
 Ambrosius, cum de vivendi ratione præciperent.
 Dolendum est, Viros Rempub. gerentes interdum
 optima consilia ideo existimare ab suis institutis alie-
 na esse, quod adolescentum ingenia illis cognoscen-
 dis occupentur. Quandoquidem nisi à teneris ho-
 nesti amorem imbiberint animi mortalium, serius a-
 liquanto virtutis lumen illis appareat; frustra vero o-
 mnis impendatur opera, si ad primos annos plane
 relegemus hanc doctrinam, tanquam reliqua ætas so-
 li avaritiæ & ambitioni vacare debeat. Nunquam
 neque dives erit sine virtutis detrimento, nisi qui, an-
 tequam parentur opes, quomodo citra honestatis ja-
 cturam utendum sit, didicerit; neque honores legiti-
 me capiet aut è Repub. geret, nisi qui salutariter illis
 fungendi animum induerit. Cæterum quid juvat
 de civilitate morum erudiri, si agrestes & immode-
 stos nos esse malumus? Inanis denique labor est, a-
 dolescentes, Servatoris nostri doctrinam cognoscere,
 aut exemplum intueri, si illi hoc imitari
 recusamus. Fateor multa in illis, quæ illud contini-
 bus, ut ne vita sit otiosa, & in deliciis per-
 bis profitentur; sed non tam recte, ut
 quot & quamvis in illis, non tamquam
 qui vulgari & hominum consuetudine tamen
 propterea, ut in illis, non tamquam
 cunctis in illis, non tamquam
 facit in illis, non tamquam
 curas & co-
 subtrahit vobis
 omnium reverentia
 & alie-

& alienæ conscientiæ metus non mover, cogitate iustissimum iudicem, speculatorem & testem omnium, quem non solum respicere sed etiam iudicare omnia certum est. Non minus ille delinquentibus æterna constituit supplicia, quam probis & officium non negligentibus exspectata præmia. Grave erit aliquando hunc ita illuisse; ut quæ ad ingenium & animum literis ac virtute excolendum pertinent, precibus quidem ab eo petamus quotidie, sed ne eveniant, ipsi contumaciter resistamus. Nulla ætas, quam qua nunc estis, aptior est ad virtutum semina recipienda, & vitiorum evellendas radices; quo neglecto, frustra adhibentur remedia adversus illa mala, quæ longa consuetudine invaluerunt: nisi quis putet frugum maturitatem æque promittere agrum qui alieno, quam qui suo tempore conscribitur. Periculose errant, qui vitæ emendationem in posteros differunt annos, spe futurum, ut temporis longinquitas imperpetuum minuat vires. Cum recenti malo confligimus, antequam robur accipiat, acriterque resistimus, vitiis in mores abeuntibus, & in virilem ætatem, remedio plane locus esse debet. Ut arbor infitionem patitur; si non accipere quidem videtur surculum, neque sibi conjungit, multo magis, dum est in sanguine recentia sunt, non obducta saniem committit, sed ta ferra & scrutantur, dumque quælestia & dolore sanantur. Poribus agere

genter transmissis irritus plerumque labor est, qui postea impenditur. Quod ne vobis eveniat, adolescentes, in re longe maxima, magnopere providendum. Servile quidem judicatis præceptoribus obsequi; at turpissima est servitus, suis cupiditatibus ita indulgere, ut ad veram libertatem intercludatur aditus. Cautum est, ne sævire in vos liceat; non injuria: in quibus enim recte agendi illibata inest voluntas, leges & præscripta non averfantur; si qui aliter sunt affecti, illos decreta regant necesse est. Sed altera potius præcepti pars ad vos pertinet, quæ vestri vos admonet officii; non quæ Magistris, ut prudenter agant; præcipit. Acerrimus Christianæ probitatis vindex Salvianus, Presbyter quondam Massiliensis, de sui sæculi Christianis dicit; quod præcepti illius Salvatoris, quo discipulos suos eadem aliis facere jubet, quæ sibi ab illis fieri velint, alteram partem, quid sibi præstari expectant, optime noverint; alteram vero, quid ipsi aliis debeant præstare, ita prætereant, ac si penitus nesciant. Idem vobis accidere solet; partem sententiæ pro licentia & impunitate vestra diligitis; partem vero, quæ, quid facere debeat, præcipit, omnino præteritis. Ego sane mallet, omnes illos, qui non nisi illiberaliter tractari volunt, quam longissime hinc abesse; tantus enim privatæ utilitatis amor non est. Præstat paucos erudire, quos eruditionis amor excitet, quos objurgatio mordeat, & gloria juvet. Cæteros qui consuetudine sua optima ingenia corrumpunt, neque ad officium ulla vel admonitione vel objurgatione redigi queunt, usque adeo non moramur, ut invitos etiam excedere jubeamus,

mus, ne pars sincera trahatur. Sed meliora de vobis speramus, præcipue illis, qui sedulo cogitant, eo laudabiliorem esse discendi ardorem & obsequium, quo turpior est ignavia & contumax improbitas. Vestrum erit efficere, ne vestra culpa spes illa nos deserat; & laboris nostri illos percipiamus fructus, ut vobis omni tempore ad exactæ ætatis annos erecto & hilari animo respicere contingat.

BENE-

BENEDICTI BAHRII

DISSERTATIO

DE

VIRTUTE PARANDA.

Ad Amplissimum Virum

CHRISTIANUM CASSIUM,

*Episcopi Lubecensis & Holsatiae Ducis**Consiliarium.*

Iſi literarum conſuetudo, Ampliſſime
 Caſſi, deſiderium meum levaret, gra-
 vius aliquanto ferrem, tam diu me à
 vobis abeſſe. Quod quidem illis,
 qui quo animo inter nos fuimus, in-
 tellexerunt, mirum videri non poteſt;
 modo cogitent, agrè divelli, quos infucatus amor
 conjunxerat. Equidem poſt meum à vobis diſceſ-
 ſum toties me tibi præſto eſſe judicavi, quoties tua-
 rum quicquam ad me pervenit, ſive ad te ſcribendi
 fuit occaſio vel cauſſa: neque aliter te affectum eſſe,
 ulla ratione, ut credam, adduci poſſum. Iſta vero
 tecum colloquendi voluptate diutius aliquanto his
 diebus frui animum meum inducebam, ita futurum
 ratus, ſi pluribus ad te ſcriberem, quam epiſtolæ mo-
 dus permetteret. Cumque ad hanc rem nullum ar-
 gumentum commodius, neque ſtudiis meis conve-
 nientius

nientius occurreret, quam quod est de virtute paranda; de hac mihi commentandum esse duxi, quod etiam certo scirem, utrumque nostrum honestam voluptatem capere hinc posse. Sicuti verò à multis fieri consuevit, ut in hoc genere certas personas inducerent, quæ inter se colloquerentur; quarum nomina vel propter auctoritatē gravissimā, vel nescio unde cōficta: ita & ego hīc faciendū putavi. Nenisito dedi partes præcipuas, qui data ab Anchistio & Tagarenno occasione, ea quæ visum fuerit, de Virtute disceret. Te rogo, ut animū à me avertas, & Nenisitum loqui putes: alios vero, ne inutili solitudine nominum, quæ interlocutoribus sunt indita, rationem investigent; ne frustra quærant, quod nunquam invenient.

Vernum erat tempus, cum Nenisitus, ut à seriis rebus & gravioribus studiis animum relaxaret, ad amicos ire constituerat in Elisānum, idque conscio Anchistio, cui illud pridie significaverat. Hunc enim, quæ erat incredibilis inter illos fides & amicitia, nihil suarum rerum celabat. Tagarennus aliquot tum diebus præter morem Nenisitum non viderat, ideoque miratus se inscio eum abesse, facilè annuit Anchistio invitanti, ut secum iret in Elisānum ad communem amicum. Ambo isti postero die iter pedibus faciunt (neque enim xxxii. amplius stadia prædium ab urbe distat) idque non sine multa jucunditate, quam sibi negatam merito dolebat postea Nenisitus. Paullulum enim exuerat Tagarennus solitam sibi austeritatem; quo factō nihil erat illo homine ad suavitatem aptius. Venerunt eo, ubi erat Nenisitus, quem secreto conspicati cum amicis in Coenaculo assiden-

P

tem,

tem, deque gravissimis rebus, casu an consilio, differentem, noluerunt neque illum neque cæteros interturbare. Namque haud a iâ de causâ exierant, quam ut intelligerent, quid in Elisano ageret Nenifitus. Eâ igitur, quâ venerant, viâ regressi, satis celeriter domum redeunt, suumque exspectant Nenifitum. Qui ubi de illis cognoverat in Elisano, moleste ferebat, sibi neque illos convenire, cum adessent, neque unâ ad urbem redire licuisse. Non enim ignorabat, quantum jucunditatis sibi detractum, quod ab itineris societate esset exclusus. Urbis igitur & amicorum urbanorum desiderio incitatus, quâ potuit celeritate domum se recepit. Fortè assident foco uterque, Tagarennus & Anchistius, cum in conclave intrat Nenifitus. Tum Anchistius, Oprato, inquit, Nenifite, nobis ades; Vix enim tempus ullum magis opportunum esse posset ad illa abs te impetranda, quæ dudum ut nobis præstares, contendimus. Ita est, inquit Tagarennus: namque quod petimus, hoc minus nobis denegare poteris, quod tantum itineris tuâ causâ pedibus nos confecisse vides, ut fessi hîc assideamus. Imò, inquit Nenifitus, vel maxime quicquam negandi nunc est causâ, quando uterque vestrum, ut videtur, eam mihi invidit voluptatem, quam ex congressu percipere potuissem. Neque enim vobis est obscurum, quam ægre, cum per graviores causas unâ esse licet, à vobis divelli me patiar. Noli, inquit Anchistius, mi Nenifite, committere, ut optima hæc occasio per te nobis eripatur, quo minus, quod volumus, consequamur. Nisi me fallit animus, inquit Nenifitus, facilè cogito,

to, quodnam sit illud, cujus ita satagitis; fortassis ad illud nemo me ineptior. Et haud scio, an ita existimandum sit, quæcunque à me proficisci possunt, longe apud vos esse meliora & paratiora. Quæso te, inquit Anchisti, ne isto modo desideria nostra morari velis: sæpius te à nobis rogatum, faciliè recordaris, ut de virtute paranda apud nos differeres. Tu quidem, nescio quâ verecundiâ hætenus adductus, illud efficere voluisti, ut vel ob ingenium te non posse, vel propter pertinaciam nolle hoc præstare crederemus: illud frustra prætendis, cum his etiam majora expectare nos jubeat indoles tua; hanc autem, nullam rogandi indignitatem aut molestiam verentes, tandem expugnari posse confidimus. Magna sunt illa, inquit Nenifitus, quæ & tuo & Tagarenni nomine à me postulas, Anchisti, eoque majora, quo difficilius est veram vivendi rationem invenire, & si vel maxime inventa, ad illam in omni vitâ attendere. Mihi quidem nihil esset jucundius, vel ad res meas utilius, quam ea, quæ à me exiguntur, ab alterutro vestrum expectare: quod ipsum ex animo dici dubium vobis esse non potest, si cogitaveritis, quam attente verba vestra, sicubi in hanc sententiam fuit colloquendi occasio, aucupari sum solitus. Accedit & hoc, quod his temporibus penè facilius est rectè agere, quam illud præ se ferre: unde qui de honestate & virtute vel mutire velit, pro ridiculo habeatur; idque in primis, si ad levia quædam descendat, quorum vel maximus usus esse solet. Vide, inquit Tagarennus, quam parum consideratè agas. Etenim bonos esse, qui

optima quæque derident, quis dicet? Simali sunt, quid ad te horum judicia? Non igitur satis fuit causæ, cur ita refugeres ab hoc sermone, & nobis cupientibus atque instantibus sæpissime negares. Age tenemus te, nec ullo modo ante dimittemus, quam nostris studiis sis obsecutus. Video, inquit Nenifitus, nullum amplius esse neque cunctandi locum nec elabendi copiam; quare id à vobis peto, ut si expectatione minora audiveritis, vestram esse culpam agnoscatis, non meam, qui digna vestris auribus à me proferri posse diffidebam. Etiam, inquit Anchistius. Neque vero his opus esse arbitrabar, nisi aliorum morem velles imitari. Tum Nenifitus: Quæcunque oculis nostris videmus, aut animo intelligimus, unumquemque nostrum merito rapere debent in admirationem illius, à quo ista sunt omnia. Idque eo magis, quo diligentius incumbimus contemplationi totius universi. Hujus enim cum videmus motus & conversiones, sidera suis quæque locis in Cœlo affixa, planetas suum tenere cursum, cujus certa definiant spacia; & præcipue in his Solem non tantum splendore orbem illustrare, sed etiam cursu suo ita designare annum, ut in certas partes eum dividat: præterea oculis inde ad terram conversis, camporum planities, montium juga, sylvarum tractus, fluminum dejectus, sparsas per maria insulas, & vinculum illud terrarum oceanum; ipsum vero orbem tanquam in aëre suspensum: Hæc, inquam, cum intuemur, non possumus infinitam conditoris sapientiam & bonitatem non stupere. Cæterum ex his omnibus cum nihil eorum, quæ
creata

creata sunt, majorem capiat utilitatem, quam homine ratione præditus; is non ideo tantum hujus universitatis opifici quam maxime est obligatus, quod suâ quâdam nobilitate excellit; sed etiam quod reliqua omnia ad se unum pertinere videt. Adeoque tot beneficiorum perceptio admonere nos debet, ut solliciti simus de legitimâ ratione tanti Numinis colendi. Illa vero alia esse nequit, nisi ut errore ac vitiis, quantum fieri potest, exuti ea de Deo sentiamus, quæ tanta Majestate sunt digna; vitam vero omnem ita transigamus, sicuti fas est fieri ab illis, quos Deus in terris existere voluit sibi omnium simillimos. Quod tum demum fieri poterit, si intellectus & voluntas, quæ duo à cæteris animantibus potissimum nos discernunt, rectè se habeant; ut quæ falsa sunt, veritatis specie animis nostris sese non insinuent; & quæ bona videntur, nec revera sunt, sui desiderio non magnopere nos alliciant. Etenim cum hoc fit, aliter esse non potest, quin ubi serò nimis resipiscere datur, perperam nos sensisse, vel stultè quicquam expetisse doleamus. Nihil vero difficilius, quam res divinas ingenio nostro assequi; quippe cujus tanta est imbecillitas, ut in plurimis etiam, quæ ante oculos sunt posita, aut in corporibus nostris inesse deprehenduntur, verisimilitudine cogamur esse contenti. Ecquis rerum naturalium causas eo, quo voluit, successu indagavit? Quis explicare poterit, quomodo suis alveis inhiereant maria? cur fluant refluantque? Qui enim post multos ingenii labores sibi in eruendâ veritate hîc videntur feliciores, fortasse non ita prompti sunt ad ea confirmanda, quibus sententia sua nititur.

Animæ vero, ut propius ad nos ipsos accedamus, vias & naturam quis reperiet? quin in corporibus nostris, quæ sit partis cujusque vis & natura, nondum satis cognoscimus; etsi jamdudum, quorum intererat hæc nosse, aperuerint, ut ea viderent. Vtique adeo in illis, quæ conspectum nostrum minime fugiunt,

Mens cæcis obruta membris
Nequit oppressi luminis igne
Rerum tenuis noscere nexus.

Tantum abest, ut ad summi Numinis naturam scrutandam ultrà, quam fas est, adspirare debeamus. Quod si igitur ab hac parte, cum propter perfectissimæ illius essentia sublimitatem, tum propter ingenii hebetudinem, parum habeat animus noster, quod agat; nisi temerè aut frustrà occupatus esse velit; ad alterum illud, quod in verâ vivendi ratione consistit, cogitationes & curas transferre debemus, & omni studio id agere, ut eum imitemur, quem colere volumus videri. Quod in primis recte fiet, si ea cognoverimus de Deo & nobis ipsis, quæ ignorare non convenit. Ad hanc vero cognitionem, quæ est de nobis ipsis, nunc non aliter attendemus, nisi quatenus usus illius esse potest in his, quæ de parandâ virtute & rectè agendi facultate erunt dicenda. Solet enim contingere, ut, nisi cognitum habeamus, quales hoc vel illo momento simus, & quonam in omni vita respiciendum, successu parum felici his rebus operam impendamus. Neque verò est, quod illa omnia,

omnia, quæ cum his conjuncta esse solent, tractare me velle existimetis; aliò enim pertinent, quàm ad illa, de quibus dicturum me recepi. Imo forte, quæ paullo ante sunt dicta, prætermittere potui citra neglecti officii crimen. Video, inquit Anchistius, te ad illud properare, quod initio rogavimus; ego vero quàm vellem pluribus ista persecutus esses, quæ omitti potuisse existimas! Magnâ enim voluptate afficior, quando audire licet vel meditari, quomodo res creatæ etiam, si aliunde illud non constaret, ad colendum Deum nos adigant; idque tum fiat, si quæ tanto Numine digna sunt, de illo sentiamus, eaque faciamus, quæ à nobis fieri velit: hujus vero potissimam curam esse debere, ne frustra in illis de Divinâ naturâ cognoscendis elaboremus, quæ percipi non possunt; cum in terris etiam multa intellectum nostrum fugiant crassis tenebris occultata & circumfusa. At tu, inquit Nenisitus, cogitare debebas, quàm mihi verendum fuit, ne ista mea oratio gravis esset Tagarenni auribus: qui quod illarum rerum est scientissimus, me de illis balbutientem, sine dubio invitus audivit. Non ita est, inquit Tagarennus, tantùm ægrè fero, interpellasse Anchistium; malebam enim continentem orationem. Neque verò, inquit ille, id male te habere debet, Tagarenne, quod meis desideriis obsecutus interpellavi. Id certe operam dabo, ut quod omnium optime abs te fieri posse putat Nenisitus, aliquando de illis, nobis audientibus, sermonem inferas, vel amonēstri, vel precibus adductus. De eo videbimus aliam, inquit Tagarennus; nunc quæso tu pergas, Nenisite,

nifite, ne interlocutione nimia sermo tuus retardetur. Tum Nenifitus: Quicumque eam vitæ rationem inire cogitat, ut omni tempore virtutis ac honestatis ratio habeatur, is oportet illam cognoscat, amet atque exerceat. Quod si cui unum ex his deest, in eo nihil virtutis potest inesse. Etenim quomodo quis amet rem sibi incognitam? quid vero prodest optima quæque à malis dignoscere, nisi eadem ista amemus, & contraria oderimus? Sed neque hoc neque illud conducere quicquam potest, nisi quæ didicimus honesta esse, & propterea cæteris omnibus anteponenda, per omnem vitam sequamur: Id vero ut fiat, diligenti exercitatione opus est; neque enim nisi rectè agendo rectè agere discimus. Nolo autem nunc disquirere, quodnam horum præcedat alterum; amor cognitionem, an hæc illud; exercitatio amorem & cognitionem, an contrà: Illud dubitari non debet, non posse hæc separari ab invicem in eo, qui veræ virtutis studio teneatur. De singulis ita agemus, ut suis locis appareat, quodnam præcipuè tractetur; ita tamen ut quæ ex cæteris interdum propter cognationem prætermitti nequeant, admisceantur. Et primò quidem frustrà ad virtutem & honestatem contendit, qui earum naturam nolit habere perspectam. Quomodo temperanter vivet, qui quid sit temperantia ignorat? justus quomodo erit, qui quæ oportet, de justitia non cognoscit? Multos sanè reperire licet, qui non tam affectibus impediuntur, quò minus optima faciant, quàm imperitiâ inveniendi ea, quæ decet. Virtutem, inquit, magni facimus, cum reipsâ
non

non nisi vitiis sint dediti ; Et hoc malum ideo frequentius est his temporibus, quod vitiis virtutum nomina sunt indita. Aliena largiri liberalitas dicitur, temeritas & malarum rerum audacia fortitudo; ignavus humanarum rerum contemptorem se appellat, iners placidum, adulator amicum. Ita quidem fieri malorum interest ; nemo enim est tam improbus & vitiis immerfus, quin virtutis & probitatis opinionem affectet. Et propterea qui injuste agit, justus vult videri ; qui multa fecit crudeliter, speciem recti sibi induit ; & ne quid flagitii omittatur, sunt qui interdum valdè indignantur, gratias sibi non agi ab his, quibus agrè fecerunt. Quia vero horum non pauci opibus dignitate & gloriâ florent, facile decipiuntur incauti, existimantes, ejusmodi homines verè felices esse, cum nihil illis desit eorum, quæ à plerisque expetuntur. Contrà videmus veram virtutem contemptis nominibus appellari : Innocentia pro fatuitate habetur ; castitas & pudor ludibrio sunt ; Cui mentiri religio est, inutilem dicimus, qui rebus agendis adhibeatur, quod fallere nesciat ; Qui alienis abstinet, cum impunè acquirere possit, ignavus putatur ; Conscientiæ suæ qui paullo est amicior, hunc stultum judicamus. Tanta perversitas cum ubique fere vigeat, quid mirum paucissimos esse, qui discrimen teneant honestorum & turpium ? Si quibus meliori doctrinâ imbutis contingit, ut hos scopulos prætervecti falsis nominibus non capiantur, admodum tamen difficile est dispicere, quid omni tempore & loco deceat vitare, quid sequi ; qualis ubique modestia adhibenda, ita ut singulæ actio-

Q

nes

nes ad honesti rationem sint accommodatæ. In quibus omnibus nisi prudentia succurrat, labi & errare necesse est: unde consequitur, ut si non plane turpiter, stultè tamen aut temerè egisse videamur. Quanquam ferme affirmare non dubitem, omnes nostras actiones, certè plerasque aut turpitudini aut honestati esse vicinas. Quicquid enim decet, honestum est, & quod honestum est, decet: ipsum vero decorum à virtute & honestate cogitatione magis quam re separari potest, ut videtur Romanorum disertissimo. Neque majoris est facilitatis animadvertere, quàm quis personam est indutus. Non loquor nunc de communi illâ, quam omnes sustinemus, unde homines appellamur, quam si tueri velimus, nunquam humanitatis debemus videri immemores. Secus tamen à multis fieri, quis satis mirabitur? Sunt enim qui feritate interdum adscitâ, quam voluptatem existimant turpissimo errore, longissimè recedunt ab humanitate, ac si eos poeniteret nimis diu fuisse homines. Alios videre licet sæpenumerò non tam insanientes quàm furentes, quibus jocus est & ludus, humanum sanguinem profundere, vel ideò belluis inferiores, quod his quodammodo inter se pax est. Sed de communi illâ personâ, ut dixi, nunc non loquor. Alia est, quæ singulis imposita, magnâ admodum naturarum & morum dissimilitudine; quam unumquemque ita gerere oportet, ut nunquam à communi illâ recedat, & nihil quicquam committat, quod propriæ naturæ parum convenire videatur. Huc non pertinent tantum diversæ ætates in uno eodemque homine: ubi diligenter animadvertendum,

tendum, sapè, quæ in nobis laudata cum essemus
adolescentes, vitio dari si adhuc viris adhæreant;
sed etiam deliberatio illa de vitæ genere, quod se-
quamur, summè necessaria: Quæ quò est difficilior
& majoris momenti, cò consideratius institui de-
bet. Omnium autem maximè in eo deligendo na-
turæ & virium, non rarò etiam fortunæ est habenda
ratio. Hùc ubi consilium vitæ est accommodatum,
constantiam adhibere oportet, nisi error fuerit com-
missus: quòd si contigerit, omnis mutatio ita est in-
stituenda, ut nihil temerè, nihil subitò facere videamur.
Ante omnia dispiciendum, cui oneri pares
esse queamus: stultitia est, si quis infirmâ valetudine,
corpus multo labore velit opprimere; si nimium
est verecundus, rebus civilibus se immiscere; si con-
tumacior aliquantò, in aulam se dare. In singulis
hiscè nisi quis constituere possit, quid sequendum,
quid fugiendum; nondum illis instructus est, quæ ad
veram virtutem sunt necessaria. Tantum vero abest,
ut hac prudentiâ carere possit virtutis sectator, ut et-
iam quæ rectè facta videntur, à virtute & honestate
sint aliena, si ab incio sunt facta. Aliunde enim
nonnunquam potius illa proficiunt, quàm à re-
ctâ voluntate. Et qui fieri aliter potest? Actio nam-
que nulla erit recta, nisi voluntas in rebus appetèn-
dis fugiendisquè rectè se habeat: voluntas autem
rectè se habere nequit, nisi habitus animi omnem
vitæ rationem sit complexus; quæ fugienda, teneat,
quæque sequenda; ut sciat quando fieri quid oport-
eat, in quantum, cum quo, & quemadmodum.
Absque hoc est, temeritate ducimur, neque quid

agamus, neque ob quas causas, satis habemus cognitum: Cum frustra laboret appetitus in persequendis illis, quæ videntur profutura; & in fugiendis, quæ nocitura; si ratio, cui appetitus obtemperare debet, vel in judicando erraverit, vel quid cui præferendum dubitet. Si his omnibus opus est, inquit Tagarennus, quota pars hominum ad virtutem est idonea? alios naturalis quædam stupiditas impedit, ut ne sapere quidem possint, etiamsi velint; alios ingenii tenuitas, ut licet stupidorum numero non sint habendi, istam tamen quam tu requiris, judicandi facultatem sibi comparare nequeant; alios eorum consuetudo, qui non nisi male agere didicerunt: quibus quia sese applicant errore ducti vel casu impulsique potius quam sua sponte, certè non video, quomodo vitæ leges percipere queant. Illud velim mihi credas, Tagarenne, inquit Nenifitus, nemini cujuscunque sit sexus aut fortunæ, præclusam esse virtutis viam. Pauperi non obstat egestas, neque diviti opulentia; Regem non impedit sua, quæ valet, dignitas, nec servum vilitas: tantum requiritur ut ipsi velimus, nec falsâ admiratione aut vano metu moveri nos patiamur. Quid enim sibi animus noster promitteret, si penes fortunam esset rectè agendi potestas. Illos tamen excipio, qui propter rationis defectum, sicuti reverâ male agere nequeunt, ita nec boni esse possunt. Consuetudo vero & ingenium neminem excusant, quandoquidem hoc præceptis & boni viri operâ adjuvari potest; ista vero hoc minus veniam meretur, quo major est veritatis, quam consuetudinis habenda ratio. Illa enim patet, modò investigare

gare velimus : quòd autem pergimus , non quâ eundem est , sed quâ itur , & viam æstimamus non per se , sed multorum vestigiis , nostra est culpa : cùm semper nobis suspecta esse debeant , quæ à plurimis fiunt . Ex his igitur nemini obscurum esse arbitror , iudicium esse adhibendum in rebus honestis & turpibus , nec propterea quemquam aditû ad virtutem excludi . Etenim non eam ob causam hæc dicuntur , ut istâ , quæ videri possit , difficultate quis deterreatur ; sed ut excusâ securitate , quâ impediti à virtute multi existimant prope se abesse , qui vitiis adhuc alte sunt immersi , eò magis laborent de inveniendâ officiorum viâ . Iam ad alterum illud de amore virtutis erit accedendum . Minime vero , inquit Tagarennus : neque enim præcipuum illud erat omittendum , quâ ratione , ut honestorum & turpium discrimen in omni vitâ cognoscatur , effici queat . Nimis longum foret , inquit Nenisitus , si omnia illa exsequi vellem , quæ quoquo modo huc pertinent ; nec illud me facturum initio sum pollicitus : tum etiam vereor , si hoc loco id faciam , ne idem mihi præstandum de amore & exercitatione . Illud vero cur recusas , inquit Tagarennus , cum non minus tibi quam nobis iucunditatem quandam afferat ? Iam animadverto , inquit Nenisitus , facilitate meâ factum , ut majora à me postuletis , quam sperabam , aut à me præstari posse , puto . Ne autem refragari quâ in re vobis videar , de his etiam quæ in mentem venerint addam , sed brevibus ; cum jamdudum à veteribus id factitatum : ad quorum similitudinem si vel conari quicquam velim , meo ipsius iudicio insaniam necesse est . Quare etiam

vix melius de quoquam meruisse mihi videor, quam si à me adductus eorum libris legendis capiatur, aut horum, qui illos eruditione & modestiâ imitantur. Præcipua quæ rectâ de bonis malisque sententiâ nos possunt imbuere, sunt præcepta, dogmata & exempla. Inter præcepta & dogmata hoc interest, quòd illa in sententiam conclusa præcipiant, quæ fieri debeat, quæve omitti. Qualia sunt illa :

Qui se habet, nihil perdidit.

Prius oportet te ipsum emēdes, quam alios emendare velis.

Magna pars profectus est, velle proficere.

Fugiens periculofam

Sortem sedis amœnæ,

Humili domum memento

Certus figere saxo.

Et hæc partim nos movent, quia per se sunt manifesta, partim monentis auctoritate, maxime si à verbis non diffidet vita : Alia commendat brevitās vel numerorum venustas, quibus sunt devincta. Dogmata vero sunt, quæ veritatem argumentis colligunt, & faciendum quicquam aut fugiendum ostendunt, quia justum & honestum est. Hoc autem apud omnes tantum valere debere, ut quantum quis inde recedit, tantum ab humanitate recedere credatur. De his inter se non conveniebat veterum quibusdam, alii enim propria cuique personæ præcepta danda esse existimabant : quod incomprehensibile opus videbatur.

Aristo-

Aristonem ; cum si ita fieri necesse esset , alia præcepta danda foeneranti , alia colenti agrum , alia negotianti , alia regum amicitias sequenti , alia pares , alia inferiores amaturis : in matrimonio præcipiendum quomodo quis vivat cum uxore , quam virginem duxerit ; quomodo cum eâ , quæ alicujus matrimonium experta ; quemadmodum cum locuplete , quemadmodum cum indotatâ : quin futurum , ut discrimen inter sterilem & foecundam , inter provectiorem & puellam , inter matrem & novercam præceptorum varietatem flagigaret . Quia vero omnes species complecti non possumus , cum sint infinitæ ; universam præceptorum rationem rejiciebat tanquam supervacuum , & decretis seu dogmatibus tribuebat plurimum . Alii vero , quorum melior videtur sententia , ita præceptis locum relinquunt , ut dogmatibus ea adjuvari velint : his enim opus esse , ut error & inscitia tollatur : quandoquidem frustra præcipimus , nisi mala persuasio ejusque causa animis nostris exempta sit . Sed neque hi negare possunt , tantam interdum esse præceptorum vim , ut mentes hominum etiam sine probatione percellant . Et si autem illa non omnia unâ eademque ætate in vitâ & moribus exprimi possunt , tamen ita sunt tenenda , ut , si quæ occurrant , in quibus eorum usus esse potest , statim sint in promptu . Non secus ac peritus Medicus multa comparat remedia adversus quoscunque morbos , etiam si nunquam ea adhiberi sit necesse . Exemplis quoque bonorum virorum magnam utilitatem adferunt , ut ferme instar legum esse queant , ad quas vita & mores conformen-

formentur. Eligendi proinde sunt quorum vitæ interesse liceat : horum actiones perspicendæ , & omninò quæcumque ab illis fiunt , diligenter observanda ; causâ etiam indaganda , cur ita & non aliter agant. Sed unde certus esse possum , dignus quispiam sit nec ne , cujus vitæ rationibus ita attendatur , ut quæ ab illo fieri video , recta esse persuaderi queam ? Nisi alterius fide & indicio illud nobis innotuerit , ante oportet aliquid cum eo temporis transigamus : aut eâdem in domo , ut à latere ejus discedamus nunquam , aut in illo loco ubi vivit : quod si contingat , diligenti attentione , qualis sit , explorandum est. Si igitur in vitâ conveniens quædam æquabilitas , & constans morum modestia ; si quieto est animo , nullis neque molestiis succumbit , neque timore frangitur ; in adversis animum non demittit , in prosperis non effert ; à fraude & perfidiâ alienissimus , rectè agit etiam ubi spectator abest , solâ conscientiâ contentus ; virtutem non amat propter præmia , sed rectè factorum mercedem putat , quòd fecerit ; nemini indignatur propter damnum aliquod acceptum , nec unquam dolet , nisi propter sua errata vel alterius vitia ; si benefacere ei voluptas est , & summa cura , ne quid perperam faciat , aut si factum est , quamprimum corrigat : hunc illum esse , quem quærimus , minime dubitandum. Illud cavendum , ne omnia illius imitanda putemus , sed ea demum , in quibus nostra persona ab illo non multum differat. Quæ autem per se sunt honesta vel turpia , ita ut nunquam propter ulla loci , temporis , aliarumque rerum circumstantias talia esse desinant ; ea sine omni ambiguitate sequenda

aut

aut fugienda esse, confidere possumus. Neque hinc solum vivendi via nobis erit consideratior, si bonorum actiones ipsimet intueamur: magnam etiam consequimur utilitatem ex illis scriptis, quibus eorum vita exposita, qui vel dudum decesserunt, vel nunquam nobis visi. Imperatorem multà docebit Augusti vita à Suetonio consignata: Aulicum Philo instruet, legentem quæ de Iosepho memoriæ prodidit; si quis privatus nec honores petere nec dignitates gerere velit, ne illum fugiant quæso quæ de Pomponio Attico scripta reliquit Cornelius Nepos: omnia sane quàm egregia, nisi moriendi, ut illis temporibus, consilium inivisset, cum vivere diutius posset. In his & similibus, quisquis est & quamcumque personam tueri velit, multa reperiet ab officio suo non aliena. Sicuti autem hæc eò pertinent, ut optima quæque cognoscamus; ita etiam, quæ parum decent in aliis, animadvertere licet, & quidem multò melius quàm in nobis ipsis. Quod enim in pueris videmus, ut rectius inlelligant deliquisse se, ubi Magister eadem emendandi caussa imitatur; idem & nobis evenire solet, cum quæ vitia in nobis insunt, si in aliis cernimus, multò magis vitia esse cognoscamus. Præterea alienum non est, si quæ incidunt, in quibus utrum sit eligendum, ambigitur; doctorum hominum atque usu peritorum adhibere prudentiam & consilia, ut quid illis videatur, exquiramus. Qui enim tempus expectat, quo per se sciat, quid in vitâ sit factu optimum, interim errabit: & error iste efficiet non tantum ut seriùs recta cognoscat, sed etiam difficillimè corrigat, quæ longâ consuetu-

suetudine jam sunt confirmata. Videndum tamen, ne intellectâ prudentum sententiâ & causâ cur ita sentiant, illis plane acquiescamus: multa namque sunt, in quibus nihilo secius nostrum etiam iudicium accedat oportet. Nunc ad anorem virtutis transeamus, absque quo quicquid agimus, proprie virtutis & honestatis nomine appellari nequit, licet illius mentiatur speciem. Frustrâ discimus quæ sunt optima, nisi cum impetu animi quodammodo ad ea veniamus. Quicquid agimus, aut sponte fit, aut ab invitis, aut neutro sumus habitu. Si ab invitis, quæ laus esse potest eorum, quæ si per nos staret omitteremus? Si neutro sumus habitu, aut languor adest aut temeritas; virtus autem nullâ ratione neque hanc neque illum ferre potest. Unde consequitur, recte factorum gloriam nos amittere, nisi amore ad ea impellamur. Qui beneficio aliquo afficitur, non ad animum dantis convertit oculos, sed ad manum, quàm illa sit larga: Vere autem beneficus esse nequit, qui aliunde quam ab honestate incitatur, ut liberalis videri velit; cum vero talem esse non est dubium, qui sibi detrahit ut aliis largiatur, & ut his bene sit, frugalius coenare non dubitat, idque solâ bene faciendi cupiditate; quæ tanta est in eo, ut nihil pensi habeat, beneficia sua ignorentur nec ne, modo conferre liceat. Alios, qui non nisi fastu, aut vanâ gloriâ, aut stulta emulatione, ne inferiores credantur his, qui eadem fecerunt, aut perfidâ simulatione, quò fidem inveniant apud foeneratores; his causis qui impulsî, ut largos sese præbeant, quis quæso liberales dicat, nisi qui vulgi decretis assentitur? Certe si quicquam in his

in his boni inest, non aliud videtur, quàm quod eo modo indigentium succurritur necessitati. Neque vero sufficit virtutem amare, nisi per se illam amemus. Si Deum ideo diligamus, quòd divitias tribuit, quod opes, dignitates, gloriam, valetudinem, & plura alia, quæ vulgò vehementer experimus, non tam summum illud Numen amamus, quàm reliqua, quæ ab illo eveniunt. Id quod tum intelligi poterit, si his creptis æque erga illud simus affecti, quam cum ista omnia haberemus. Eodem modo honesta, quæcumque talia sunt, ut, si illis non delectemur nisi cum alia bona consequantur, falsus sit eorum amor; neque enim virtus ei inesse potest, quem spes lucri invitat, aut damni metus deterret, quò minus recte agat. Quod si dicamus: quæ inde ad nos utilitas, si ita egerimus? quæ damna poterunt averti? illud cogitandum est, melius quicquam nos consequi non posse, quàm si boni simus; nec majus incommodum declinare, quàm si vel mali non simus vel quamprimùm esse desinamus. Si tamen bona quædam requirere libet, quæ inde sint expectanda, quodnam quæso præstantius, quàm animi illa tranquillitas quæ semper est conjuncta cum recte factorum conscientia? Quod miserius quam perpetua vel ex intervallo recurrens animi perturbatio? à qua liber esse nequit, qui à virtutis studio est remotus: hæc nunquam securos nos esse sinit, etiam cum aliis videmur felicissimi propter rerum abundantiam; animi vero tranquillitas efficit, ut multa facilitate feramus eorum angustiam, quæ in fortunæ posita sunt arbitrio, & si adsint, eo loco habeamus,

quo haberi debent. Vera autem illa bona quò minùs nobis sint carissima, potissimum efficit, quod imperite admodum ea admiremur, quæ nos bonos reddere non possunt, eaque formidemus, quæ neminem nisi qui velit, miserum reddere queunt. Illorum numero habenda sunt generis nobilitas, divitiæ, potentia, gloria, corporis valetudo, pulchritudo, voluptas, senectus, eaque omnia, quæ licet alieni sint arbitrii, tanti tamen à plerisque fiunt, ut quibus adsint, felices judicentur. In his quæ aversamur, numerantur generis obscuritas, paupertas, sortis tenuitas, ignobilitas, corporis imbecillitas aliaque vitia, exsilium, mors, & reliqua omnia quæ felicitatem nostram vel minuere vel profus tollere vulgo creduntur. His ut occurratur, persuasum nobis esse debet, non tam in alterius potestate situm esse, quo minùs simus vere boni, quam in nostra ipsorum; illa vero quibus consuetudo precium posuit, tanti non esse, ut propter eorum possessionem multum gaudeamus, vel propter amissionem doleamus. Illud autem optime omnium fieri poterit, si ad singula quodammodo æstimanda accedamus, ne decipiat nos eorum error, qui nomen quidem virtutis usurpant, ipsa vero quid sit plane ignorant. Majores suos quis extollit, & gloriam, quam illi labore & industria compararunt, ad se pertinere putat? profecto fallitur, nisi sua virtute eam conservare studeat. Etiam si familiæ nomina longo recenseat ordine, dedecus est si splendorem ab iis acceptum suis vitiis obscuret.

Incipit ipsorū contra *illum* stare parētū
Nobi-

Nobilitas, claramque facem præferre pu-
dendis.

Alienum igitur bonum est, quod sibi arrogat, & tum demum illustrat, si à majoribus acceptum de-
cus sua virtute auctum ad posteros transmiserit.
Quod si fiet, eo quod suum est, magis gaudebit,
quam quod ab aliis relictum: sin minus; cur propter
illud superbit, quod sua improbitate & ignavia dede-
corat? Quam vero gloriosum! si majores per il-
lum innotescant, posteri vero & nobilitatis initium
& virtutis ab eo capiant exemplum: ut illos Tragici
versus non injuria semper in ore possit habere:

Nobiles non sunt mihi
Avi; nec altis inclytum titulis genus;
Sed clara virtus. qui genus jactat suum,
Aliena laudat.

Illud certum est, generis splendorem neque dare
bonam mentem neque secum auferre, cum & miser-
rimis contingat & bonos destituat sæpissime. De
divitiis idem, nisi fallor, sentiendum; nisi forte quis
credat bonum esse magis proprium, quando suo la-
bore, parare & ignavia perdere illas potest. Sed cui
hoc persuadebimus, qui cogitet, quot casibus eripi
possint? quod cum fieri videamus, cur quæso rei
fluxæ innitimur, aut tantam operam impendimus?
Multos miseros reddit opum abundantia quam
inopia: & postquam illis modum constituere desit
indigentia humana, ita ut non amplius sufficerent,
R 3 quibus

quibus fames, sitis & frigus pelleretur, omnia mala generi humano inferri sunt coepta. Non quidem ipsae divitiae nocent, aut nummorum copia beatitudinem per se impedit, sed immensa cupiditas. Sicuti infirmus animus est, qui non potest pati divitias; ita vix licet nobis esse tranquillis, qui ultra modum earum desiderio tenemur. Modo nos afficit comparandi sollicitudo, modo torquet perdendi metus, nec raro eripit saeva rapacitas, etiam cum vitae nostrae periculo, quae magno labore erant congesta. Eorum vero qui possident, quotusquisque est, cui vel in vita vel post mortem propterea bene esse contigerit?

Nec cura mordax deserit superstitem,
Defunctūq; leves non comitatur opes.

Contra qui illis est contentus, quae ad vitae necessitates sufficiunt, quo minus ad fortunae injurias est expositus, eo minus habet quod metuat. Dumque vitam ita transigit, haec secum cogitat;

Hic nullo fine beatus

Componit opes gazis inhians,

Et congesto pauper in auro est.

Bene paupertas

Humili tecto contenta latet.

Potentia vero haud scio an plurimis oneri sit potius quam voluptati. A multis quidem timentur, sed & multos metuant necesse est; neque in sua est potestate, quod volunt, sed eorum qui serviunt; absque
horum

horum consensu facile vident, se non posse quod volunt efficere. Certe ejusmodi quicquam hoc omne est, & usque adeo in alterius voluntate positum, ut neque cum habere cupias, neque cum deponere, tuto semper id liceat. Multos fuisse & adhuc esse non dubito, qui postquam ea qua antea florebant Principum gratia exciderunt, Dionysium, si possent, imitati Corinthum aufugerent. Quam lubrica etiam & periculosa fors sit ipsorum Principum, mallem non ita aperte declararent nostra tempora. Quem vero nec dignitas ampla nec titulorum splendor commendat, hiccine præ cæteris ob hoc infelicior credendus? Sane si vir bonus est, aliorum potentiam moderate fert, & tutius existimat subesse quam imperare. Tantum vero abest, ut suam sortem mutari velit, ut etiam Thyestem imitatus sibi de sua humilitate gaudens his versibus oblata imperia repudiet:

O quantum bonum est,
 Obstare nulli, capere securas dapes!
 Humi jacetem scelera non intrat casam,
 Tutusque mensâ capitur angustâ cibus:
 Non vertice alti montis impositâ domû
 Et eminentem civitas humilis tremit.
 Nec fulget altis splendidum tectis ebur,
 Somnosq; non defendit excubitor meos.
 Sed nō timemus; tuta sine telo est domus,
 Rebusque parvis alta præstatur quies.

Glo-

Gloriæ etiam & famæ cupiditas multos impellit, ut quacumque ratione possint, immortalem illam consequi nitantur. Alius magnifica exstruit ædificia, quibus nomen suum inscriptum ab oblivione vindicet: alius bella gerit, ut rerum fortissime gestarum memoriam posteris relinquat: alius ingentia librorum volumina edit, ut ingenii & eruditionis famam consequatur: Et hujus desiderium tam late vagatur, ut vix quisquam sit etiam inter abjectos, qui aliis non velit innotescere. Cæterum multis ea contingit ex aliorum calamitate; aliis ex ejusmodi factis, in quibus ne species quidem inest virtutis: quin & illi famam aliquam sibi promittere possunt, qui non ita dignum quicquam memoria gesserunt; cum nunquam non venalis sit quorundam calamus, qui quod factis deest, egregie verbis supplere possunt. Vera autem gloria, quæ virtutem sequitur, pauci sciunt quid sit aut quomodo petenda: & qui digni sunt, non admodum illa capiuntur, neque nisi raro ante mortem contingere solet. Ecquid vero ad nos pertinent, quæ superstites de nobis prædicant? ad illos quidem non nego inde aliquid utilitatis posse pervenire, dum exemplo defunctorum, qui optime vixerunt, ad præclara incitantur; ipsos tamen eâ res nihil tangit. Qui autem falso vulgi aut adulatorum rumore feruntur, illos merito suarum laudum, quibus digni non sunt, pudere debet. Præter hæc quos terrarum ingentia spacia non capiebant, cum imperii & gloriæ desiderio essent incensi, quid quæso in illorum vita fuit, quod sibi vel parum prudens optaret? quippe quæ erat molestiarum plena & exitus eorum sane quam miser-

miserrimus. Ille vero de quo ne vicini quidem habent quod dicant, numquid propterea infelix iudicandus? O quantus est ille! qui ex animo dicat:

Illi mors gravis incubat,
Qui notus nimis omnibus
Ignotus moritur sibi.

Corporis valetudinem, virium & membrorum integritatem quis non sibi inprimis expetat? Cum nemini dubium esse queat, tanto expeditiorem inde quemvis reddi ad vitæ actiones. Sed nihilo magis, si horum quicquam deficiat, illud ægre est ferendum; aut gravibus querelis amicorum aures onerandæ. Ipsa consuetudo efficit, ut dolores aut minus aut æquiore saltem animo sentiamus; sunt etiam quos corporis imbecillitas in rectam vivendi viam reduxit. Quia enim voluptatibus indulgere non licet, & mortis perpetua cogitatio minus jucunda reddit, quæcumque magni fiunt à cæteris; fieri solet, ut animus de suis bonis prospicere sibi incipiat: quæ parare eo est proclivius, quo minus appetitus rectæ rationi refragari potest, postquam corpus diuturna assuefactione eo redactum, ut suis, quibus delectari solet, voluptatibus haud ægre careat. Hinc gratias etiam debere videmur illis, quæ initio erant acerba; utpote quibus effectum, ut nostram sortem cum aliena minime velimus permutatam. Ideoque licet valetudinis & virium corporis omnino est habenda ratio, tamen ita id fieri debet, ut si infirmitate vel perpetua corpus nostrum est affectum, æquo nihilo minus

animo finis, cum optimarum rerum licet non per se occasio esse possit. Pulchritudinem & formam in utroque sexu præ cæteris spectandam esse jamdiu consuetudo præcipit, ita quidem ut virtus, prudentia, castitas longe inferiores judicentur. At quam fragilis illa res & quantæ mutationi obnoxia! Sæpe pudoris etiam faciunt jacturam, qui huic plus iusto tribuunt, neglectis interim animi virtutibus;

Raro est adeo concordia formæ

Atque pudicitia.

Hinc multoties dolere videmus, qui illius specie ita oculos suos præstringi sunt passi, ut quæ in perpetuum grata esse potuissent, omitterent. Quibus vero illud, quod tanti à multis æstimatur, à natura denegatum est, aut casu aliquo subtractum, his nihil obstat quo minus hanc jacturam virtute & prudentia refarciant, quæ etiam quævis vitia corporis facile obscurare possunt. Voluptatem corporis tantopere amari, eo est turpius, quo magis hominem, qui rationis est particeps, illud dedecet. Cætera omnia quodammodo corporis commoda spectant, ista vero sapissime corpus & animum ita enervat, ut neque sibi neque aliis vivere quis possit; usque adeo in perniciem nata eorum, quos jucunditate afficere videtur, ut Curius & Coruncanius, cum audissent, Athenis esse, qui se sapientem profiteretur, eumque dicere, omnia quæ faceremus, ad voluptatem esse referenda, optarent ut id Samnitibus & Pyrrho hostibus suis persuaderetur; quo facilius vinci possent, cum se voluptatibus dedissent.

Habet

Habet omnis hoc voluptas ;
 Stimulis agit fruenteis ,
 Apiumque par volantum ,
 Ubi grata mella fudit ,
 Fugit , & nimis tenaci
 Ferit ic̃ta corda morfu.

Vita longitudinem multi expetunt , quod natura vivendi desiderium mentibus hominum ingenerasse videatur. Sed quid quæso omnis vita , nisi virtutis & recte factorum memoria eam reddat amabilem ? sola illa efficere possunt , ne vixisse nos pœniteat , si recte velimus judicare. Multi olim potuissent felices videri , nisi tardius aliquanto mors eos abstulisset. Pylus ille Senex valde queritur apud Satyricum , & grave quoddam à se commissum arbitratur , cur in tantam multitudinem anni excrescerent , quo efficeretur , ut tot amicorum funera & calamitates lugeret. Certe his temporibus nihil esse videtur , quod magnopere nos invitet ad vivendum , etiã si ex senili ætate repuerascere liceret. Ita enim omnia sunt turbata , & ad communem , ut videtur , calamitatem destinata , ut cui spes fuerit ad meliora perveniendi minime fallax , bene cum eo agi existimem , si ex hac vita excedere contingat. Optime interea affectus est , qui nec vivere nolit , nec mori : mortem namque qui horret , arroganter facit sine dubio , quia istud recusat , quod omnibus impendet ; hac enim lege nati sumus. Illud potius erat optandum , ut recte moreremur ; quod fieri potest , si bene vixerimus.

Quid verò interest, quamdiu quis vivat, si illud consecutus est, ut non invitus pareat Deo quæcumque imperanti? Exfulare quem cogit dominorum sævitia aut belli rabies; illud fortassis grave est, quod patria careat. At quam multi sunt quorum corpora tegit aliena terra. Nusquam exfulare se putabit, si cogitet, patriam esse, ubi homines incolunt. Casu factum est, ut in ea terra, quæ existimatur patria, mater illum in lucem ederet; quam si fortuna eo transtulisset, ubi nunc exfulat, patria esset, quem exsilii putat locum. Deinde bona Repub. vel aliqua saltem, si bonus est, non migrabit: si vero acerba sunt imperia aut omnia conturbata, quis non ubivis mallet vivere, quam in illa regione, in qua omnia ita conquassari incipiunt, ut ædificiorum quoque cadavera projecta jaceant? Brevibus hæc dixi, si hujus argumenti amplitudo spectetur, sed satis esse arbitror. Eodem modo si rationem in omnibus dijudicandis adhibeamus, non facile fiet, ut præter fas quicquam admiremur aut metuamus. Errore autem sublato, quem major pars hominum nobis instillavit, nihil restare videbimus, quod serio ametur, præter virtutem, & quæ ab illa separari nequit, animi tranquillitatem. Illud inprimis tenendum est, ista omnia quæ non sunt in nostra potestate, ideoque corporis, fortunæ & externa bona vel mala appellari solent, non simpliciter adversari rebus honestis & veris animi bonis. Expetit illa vir bonus; nec injuria, cum vel ad vitam commodius degendam faciant, vel honestæ voluntatis explicandæ uberior materia esse possint. Non parcat labori neque curæ, ut cum sibi, tum illis, quibus.

bus hoc debet, præsto sit unde vivant. Si eligendi datur potestas, mavult divitias quam paupertatem, sed sine cujusquam injuria partas, sine sordidis quæstibus, quibus non nisi malignitas & invidia ingemiscit, sibi negata dolens, quæ alii industria & frugalitate acquisiverunt. Si amplum est matrimonium, & honestis artibus quæsitum, ita gaudet, ut neque gloriatur, neque erubescat: Unde etiam non dubitat domos aperire & cuivis potestatem facere tollendi quæ sua sunt, satis certus, nihil inesse, quod ad alium pertineat. Si vero his carendum, id sine omni dolore atque animi perturbatione fieri debere existimat: ita ut semper habeat virtus quod agat, cum vel temperanda sint gaudia in prosperis, vel in adversis compescendi dolores. Ita plane persuasus est, fugacia esse hæc omnia, & tanquam in diem data, eamque ob causam sine virtutis jactura comparat, sine metu possidet, & sine querela, ac si mutuo sint concessa, repetenti fortunæ non invitus reddit, illud quam maxime decere se arbitratus, ut nunquam propter illa, siue paranda sint siue amittenda, officium suum deserat; semperque ita cogitat,

Sunt alia forte, quæ putes incommoda,
Hæc fugere si qua liceat, haud dissuadeo;
Dum prima maneat cura, sapienter, pie,
Probeq; vitæ currere hoc stadium brevis.

(Sine dubio agnoscis ingenium Anchisti à quo hæc sunt profecta.) Quæ omnia licet eo modo sese habeant, non tamen animi quædam impotentia potius quam

magnitudo judicanda est, si quis ea, quæ magno æstimantur, interdum repudiet; non quod pro malis illa habeat, sed quod vereatur ne se prohibeant eo, quo tendit, pervenire, aut requiem, quam in perenni suo negotio quærit, eripiant. Has enim init consilii sui rationes: pecuniam contemsi, quam paratam habere poteram; metuendi sustuli causas: honores repudiavi, quos ultro oblatos gerere licebat; minus est molestiarum: Opibus & potentia valere possum; sed cur non corpori meo indulgeam, ut tutius illud habitet nobilis hospes? Rideant licet, qui mea culpa neglexisse me putant res vulgo preciosissimas; carere his malo, quam ita abundare, ut securitati meæ detrahant. Neque enim tam vehementer insanire lubet, ut aliorum opinione meam felicitatem metiri velim; quoniam fieri potest, ut illi pro beato me habeant, cum revera sim miserrimus. Hanc animi continentiam quis non admiretur? Modo qui ita sunt affecti, ista non tam fugere videantur, quam præterire, nec tanquam res per se malas, sed quod suis institutis non conveniant. Hæc & alia his consentanea qui accurate consideraverit, is, nisi fallor, ab amore virtutis & honestatis non multum crit sejunctus. Quorum vero animos delicia, languor, publicus error; & prava aut vana sectandi consuetudo ita infecerunt, ut morum ac temporum vitio malint in perpetuo seculi errore versari, quàm perspectâ veritate rebus fortuitis & casui obnoxiiis ea præferre; quæ neque fortunæ temeritas, neque aliorum injuria eripere potest,

Quid

Quid dignum stolidis mentibus imprecer?

Opes, honores ambiant;

Et cum falsa gravi mole paraverint,

Tum vera cognoscant bona.

Reliquum est, ut de exercitio virtutis & honestarum actionum dicamus; hoc enim nisi accedit, supervacaneum est omne discendi studium. Unumquemque videmus expeditius id agere, in quo se diu exercuit: multa fiunt artis beneficio, quæ fieri posse negaremus, nisi exstarent artificia; ecquis vero talia perficeret, nisi manus ad illa efficienda æque esset exercitatione parata, quàm ad excogitanda ingenium usu promptum? Sic etiam diuturna laborum & molestiarum tolerantia facilia reddit, quæ initio cum magnâ difficultate erant conjuncta. Nautæ ut tempestate coortâ in navi discurrant, & in aëre etiam sua quisque obeant officia, non secus ac si interrà degerent, multa efficit navigatio: agrorum cultores ad operas suas indurât in orbem recurrentes labor; qui sæpe in periculis est versatus, ipsâ periclitandi assiduitate hoc consequitur, ut illa contemnat. Tantum roboris accedit omnibus nostris actionibus à consuetudine agendi, ut licet quispiam singula quarumvis artium teneat præcepta, ne clavum quidem cudere satis commodè, aut calceum consuere possit, nisi usu edoctus. Nemo itaque mirabitur, rem non aliter se habere in virtutis & honestatis studio; quod frustra præ se ferunt, quibus persuaderi non potest, recte agendo confirmari quæ didicimus. Quin frequens

quens usus non immerito primas sibi tribui postulat, cum omnium Magistrorum præcepta superet. Etenim nemo melius cognoscit, quid virtus sit & honesta actio, nisi qui in ea exercenda semper est occupatus, quâ ratione etiam efficitur, ut magis sincerè eam diligere incipiamus. Ut à puero ad honestatem animus cujusque inclinetur, optandum potius quàm sperandum videtur, moribus ita corruptis, ut ipsi etiam parentes plerumque de nullâ re liberis suis relinquenda minus laborent; satis illis prospectum existimantes, si aliarum rerum abunde suppetat. Interea quæ prava sunt, quæ cum voluptate conjuncta libidini satisfaciunt, quæque ad utilitates quasdam per dolos & mendacia comparandas accommodata, tantum abest ut inde seriâ castigatione animos & cogitationes eorum abstrahant, ut suo etiam exemplo doceant atque ducant, ac si non satis à naturâ ad pessima quæque essent proclives. Ita trahimur in vitia & quisque sequimur priores, qui & ipsi majorum decepti errore male viam sunt ingressi. Quotusquisque filium ita potest affari?

• Disce puer virtutem ex me verumque laborem.

De his igitur dicendum, qui intellectâ morum perversitate, errantium judicia procul habentes ipsam virtutem suo precio æstimare cœperunt. Certum est, recte agere neminem, nisi qui male agere destitit: illud autem fieri nequit, nisi removeantur vitia, eorumque excindantur quantum fieri potest radices.

dices. Ideoque cupiditates & affectus omnes (præter illos, quorum nomina nil nisi vitium innuunt, hi enim plane excutiendi) ita sunt frenandi, ut à naturâ non recedant. Frustrâ enim cogitatio occupatur in exquirendo officio, si appetitus rationi non obediat, & ad illud agendum impellat, quod honestati adversatur. Præstat igitur primum videre, quinam affectus in nobis imperium teneant; deinde ut illis quàm maximè resistatur, omni studio est elaborandum, neque omittendum quicquam, quod ad illos in ordinem redigendos conducere queat. Nimia cum aliis consuetudo nocet, neque nulla probari debet: Qui enim sæpissime inter homines versari velit, & ad indignationem pronior est aliquanto, non effugiet, quin eorum moribus offensus subinde irascatur aut animo perturbetur: à superbis contemni molestum est, petulantis injuriam & malignitatem ægrè ferimus, offendit contumeliâ dives, & contentioso sermone, quem tenet pertinax vincendi studium. Sed nec planè in solitudinem est secedendum; solent enim animi motus aliquamdiu subsidere quidem, sed eò periculosius postea sese exserunt, quo minus ad eos reprimendos consuetudo nos assuefecit. Si ad timiditatem quis proclivior, ita fugienda est periculorum occasio, ut nihilo secius animo paululum confirmato ea subeat interdum, quò periclitandi consuetudine metus expellatur & fiducia ingeneretur. Egregiè præceperunt, qui jubent ut interdum simulemus ea, quæ metui solent, jam evenisse nobis; & quæ expeti, in perpetuum nos iis carituros: Itadiviti pauperrimos quosque vilissimo cibo ac du-

ra veste interdum imitandos, idque triduo aut quadriduo, ut experiatur potius quam ludat; atque hinc futurum, ut in ipsa securitate ad difficilia assuefactus minus timeat, quæ ferre didicerit. Qui strenui militis nomen obtinere cupit, armorum disciplinam, quotidiano exercitio roborare debet; quæcumque in acie & prælio evenire solent, omnia in campestri meditatione pernoscere, in mediâ etiam pace supervacuo labore lassari, sylvam cædere, onera portare, natâre in flumine, pleno gradu ambulare vel currere, etiam armatus cum sarcinis suis; ut horum usu in pace id consequatur, ut minimè sint difficilia in bello. Eodem modo gerere se convenit virtutis cultorem, humilitatem sibi fingere in honore, ignobilitatem in dignitate, & adversa quæque in ipsa rerum secundarum abundantia. Quemcumque induat fortuna vuln-um; ille non metuet aliquando facere, quod bene se didicisse confidere potest. Præterea & hoc intelliget, quanta sit vanitas eorum, qui indignis modis fortunæ fiunt supplices; cum quæ ad saturitatem sufficiunt, ne irata quidem negare audeat, & quæ sunt superflua, sine salutis jacturâ illis carcere queamus; nihil autem si velimus boni esse, ut mali finis cogere nos possit; ideoque sine causâ tantoperè pleraque appeti aut metui. Qui vero cupiditatem & metum ita coercere didicit, ut quæ, quo minus semper avertere aut consequi possit, alius impedire valet, ea non multum aversetur aut appetat, is quantum effecerit, vix dicere licet: cavendum tamen quotquot hanc proficiendi viam ingressi sumus, ne cui dicamus, ita nos facere, ne quidem amicissimis, nisi quorum egre-

egregiæ voluntati sola obstat imperitia. Etenim videntur plerumque etiam à non malis illa remedia, quæ licet levia appareant, tamen nisi adhibeantur, frustrâ sumus: Nos autem interea perdimus auctoritatem, quam conservare poteramus, & nihilo magis, ut alter ille emendetur, efficiamus. Quod si tamen cuiquam commodare lubet, exemplo uti debemus virorum gravium, qui virtutis opinionem dudum sunt consecuti, eosque dicitare ita vel aliter fecisse, hoc vel illud suasisse aut dissuasisse; hæc enim ratione & nobis consulere poterimus & illi de cuius vitâ & moribus sumus solliciti. Quid enim prodest nobis detrudere, cum alteri, quicquid detrahimus, adjicere nequeamus? Sæpe ita fieri necesse est, ut non tantum videatur, vera sint quæ dicimus nec ne, sed etiam quibus dicimus, an illi veritatem pati possint. Ab animi affectibus ad vitia & virtutes erit transeundum; etsi vero separata est harum consideratio ab illis, quia tamen vitia dediscendo virtutem discimus, non immerito conjunctim, quantum quidem ad nostrum institutum attinet, de illis agatur, servatâ populari ratione, quâ hætenus usi sumus. Id omnino opera danda, ut acrem quisque vitiorum & bonorum suorum judicem se præbeat, nihil apud se dissimulet, neque temporum consuetudinem prætendat, id quod fieri solet, quando nobis boni videamur, si contendamur cum pessimis, & ad ea oculos deflectimus, quæ ab aliis peraguntur, aut ætati & loco culpam tribuimus. Ita nemo suo judicio avarus est, cum videt plurimos rapinis & maleficiis remaugere; nemo ambitiosus, cum & alii suffragia querant;

rant ; nemo lascivus & impudicus , cum adolescentiæ, si quod est, crimen hoc videatur : nemo sumtuosus , cum res urbanæ magnas impensas requirant, nec aliter ut vivatur , Roma permittat. Extra nos quærimus malum nostrum , quod in ipsis visceribus obhæret , tantum oportet inquirere , nec ita faciles esse ad ignoscendum morbo nostro. Quantò rectius fecerit , qui semper sibi à se metuens diligentissimè omnia scrutatur severitate quâdam animadvertendi , ut vitio , dum recens est , occurrat ; siquidem difficilius eruantur , quæ longo tempore radices egerint. Unde apparet eorum perversitas , qui nescio qua vitiorum voluptate fascinati , emendandi studium in aliam ætatem prorogant. Deinde qui vitia sua aliquantum minuere cœpit , omninò cavere debet , ne turbæ facilè se committat : videtur enim medius esse quodammodo inter ægrotum & valentem , ita ut neque paratus esse queat tanquam in bello , neque securus tanquam in pace. Placere jam incipit cœna frugalis & ad necessitatem parata ; fortè ab alio invitatus movetur ferculorum multitudine , ciborum varietate , & ministrantium turba. Placet modica supellex , quam nil præter mundiciem & usum commendat ; ubi ad alios accedit , oculos præstringit alienus splendor , neque parum animus concutitur. Parvo lubet esse contentum ; divitum consuetudo cupiditates irritat : in verbis modestus & in sermone castus est ; facile aliquid affricat lascivorum conversatio. Ita vel nescientibus nobis aliquid commendatur & subrepit , dominiq; redimus pejores , animi habitu nonnihil immutato. Quod si autem propter negotia cum aliis
quoti-

quotidie esse cogimur, non parum conducit eligere virum gravem & probitate conspicuum, qui contra populi mores semper aliquid præcipiat, eique reclamet falsa laudanti aut vana metuenti. Hic sit quasi custos bonæ mentis, qui audaciam reprimat & ignaviam suscite: qui veret illis invidere, quos fasces & purpura illustant; illis irasci qui injuriâ nos afficiunt; illam putare felicitatem, quæ ex alterius calamitate existit; ingentia patrimonia adinirari, cum divitiæ usu sint metiendæ; foris explicare vitia, quæ domi. oderimus: quique jubeat vulgi judicia contemnere, rectæ rationis sequi judicium, quæ perpetua sunt caducis præferre, omnem occultandi spem remove, tanquam nihil, non Deum modo, sed ne homines quidem celare possimus, eamque ob causam conscientiæ potius studere quam famæ, & nihil agere, quod à quoquam nesciri velimus. Ejusmodi amicum qui nactus est, externorum bonorum optimum videtur consecutus: cujus si copia esse nequeat, fingendus est aliquis, quo tanquam spectante omnia faciamus, quique talia dicta assiduè auribus nostris ingerat. Præstat etiam accurate dispicere, cui vitio potissimum simus obnoxii, ut in illo extirpando præ ceteris elaboremus; sed interim nec reliqua sunt negligenda, quantumvis levia putentur. Sicuti vero, ut paullo ante diximus, malorum conversatio plerumque nos reddit peiores, ita etiam dubitari non debet, si cum bonis viris assiduè vivamus, meliores nos futuros. Opera igitur danda, ut ad horum amicitiam & consuetudinem nos applicemus: frequenter illi sunt audiendi, frequenter adspiciendi; gestus

etiam & vultum oportet attendere; neque ullum transmittere verbulum, quod non solertiâ quâdam rimemur. Iôco etiam multa dici existimandum est, quæ nobis sunt utilia; solent enim viri graves inter-
• jocandum nonnunquam proferre, quæ à nobis ignorari nolunt, idque cum vel pudori nostro volunt consulere, vel minus tutum est serio quicquam dixisse videri. Ita vero oculos & animos nostros ad eorum actiones adhibere debemus, ut quemadmodum pictor subinde respicit ad imaginem, quam vult exprimere; sic etiam assidue illos intuentes id agamus, ut illorum imago in vita nostra appareat. Non quidem deprehendimus, quando & quemadmodum nobis conducat ejusmodi contubernium, sed tandem nos multum profecisse animadvertimus. Quia etiam virtus in mediocritate consistit tam affectuum quam actionum nostrarum, in quibus ita medium tenendum, ut nihil excedat, nihil deficiat; illud vero invenire admodum difficile est: ab eo longius recedere decet, quod virtuti magis adversatur. Qui nimio pecuniæ studio ducitur, in contrariam partem ire debet, & frequenti largitione coercere cupiditates, donec ad parsimoniam cum liberalitate conjunctam perveniat. Sapè etiam honesta voluptas aspernanda est, ut libido frena pati discat; satius enim est vel nullâ frui, ut illud obtineatur, ne ad turpitudinem usque ei indulgere sit necesse. Qui fastu turget, longè infra sortem humilis esse studeat, donec accedat ad modestiam: qui linguæ moderari nequit, longum sibi indicat silentium, illatis rarò sermonibus, ut loquendi tempus & rationem servare discat. Ita ubique
si qua

fi quā occurrit medium inveniendi difficultas, in eam partem inclinandum, unde facilior est ad virtutē reditus. Ac ne illud quidem alienū est à recte agendistudio, characteres habere seu notas quasdam virtutum & vitiorum: sæpe enim latent nos vitia nostra, nisi inde prodantur; & ipsa virtus interdum possessori suo non animadvertitur, nisi ex certis quibusdam notis eam cognoscat. Hoc modo justos nos esse intelligimus, si cuique tribuamus quod suum est, cum nemine conscio retinere possimus; parum curantes etiam si nulli hoc innotescat. Ita vanæ gloriæ contemptum in nobis deprehendimus, si æquo animo parimur virtutum nostrarum magnitudinem ignorari ab omnibus, parva autem delicta neminem latere. In hoc Characteristico genere nescio qui factum, ut unicus tantum libellus nobis exstet. Optandum sane esset, ut virtute quispiam & ætate gravis ea quæ hujus generis apud alios dispersa leguntur, collecta in suos quæque ordines redigeret, quæque ipsemet in vitâ edoctus, ea adderet. Opportune forsân generatim & universè hic commemorare licet optima quædam indicia, unde nobis ipsis constare potest, profecisse nos aliquantum in virtutis studio. Talia sunt: si de rebus optimis & ad vitæ honestatem pertinentibus frequentes cogitationes animum subeant, & res vulgò præciosæ in insomniis quoque parum delectent: Si inter legendum illis potissimum nos capi sentiamus, quæ ad emendandos mores faciunt, ut præcipua cura sit, prudentiam inde eruere, quæ in rebus agendis adhibeamur, & hanc consecuti parum pensi habeamus ignorare, quamdiu vixerint Patroclus & Achilles, aut ubi Vlysses

Vlyffes erraverit. Si illi sermones quàm maxime nos delectent, qui sunt de virtute & honestate, & modeste nos geramus ubi cum contentioso est negotium, ei cedentes, etiam si nostra sententia ad veritatem propius accedat. Si æquo animo simus erga amicos, qui nobis ad optima quæque contendenti-
bus ita adversantur, ut quemadmodum fieri solet, æquales prædicent dignitate & opibus florere, nos vero risu & jocis excipiant, quòd agamus tam stultè, ut rebus maximis carere velimus. Si non tam facile animo perturbemur quàm antea, & perturbatio quæque si oriatur celerius cesset. Si commissâ culpâ non ægre feramus reprehendentem, laudes vero, quoties ab aliis tribuuntur, rejiciamus modestè, illud significantes, multò plura esse, quæ nobis ipsis displiceant. Si recte egisse apud nos gaudeamus, nec desideremus magnopere virtutis nostræ spectatorem, nisi cum & alios nostro exemplo excitare vel admonere cupiamus. Si præclara facta non admiremur, tanquam otiosi spectatores, sed ad nos quoque inde aliquid pertinere putemus. alterius fides, justitia, & abstinentia non ideo nobis placeat, quod minus doli & insidiarum ab eo nobis sit metuendum, vel simplicitas ejus tanto latius pateat in fraudes, cum non facile alios suspicetur improbos, cujus animus ab improbitate vacuus; sed quia unaquæque virtus per se laude digna. Si bonos quoscumque amemus, nihil commoti eorum inopia aut calamitate, quâ premuntur. Si deliquisse nos magis doleamus, quàm propter infamiam inde natam; nullum peccatum exiguum putemus, hunc in modum cogitantes: nunc
ita

ita faciamus, aliàs melius. Si quando viro cuiquam illustri subito nobis intervenienti obviam eundum, constanti animo id faciamus & erecto vultu, utpotè quorum conscientia ita est confirmata, ut nullius auctoritate moveamur. Denique si modestiæ & virtutis laudem non vestitus quâdam humilitate affectemus, intus vitia occultantes, sed boni malimus esse, quàm videri. Plura quidem afferri possent, sed hæc sufficiunt sine dubio, cum etiam apud alios reperiantur, qui deditâ operâ de illis tractarunt. Intellegendum est etiam, maximè necessariam esse quotidianam sui excussionem, ut ipsimet in nos inquiremus singulis diebus, numquid à nobis intermissum, quod fieri debuerat, aut factum quod intermittere satius fuisset. Animus igitur in iudicium quasi vocandus est, & actionum exigenda ratio, ita ut ex nobis ipsis quæramus, cui vitio hodie obstiterimus, & quâ parte facti simus meliores. Desinemus paullatim malè agere, si quotidie scimus, ad iudicem esse veniendum; ut rectè agamus summa erit cura, si doloris poenam ante noctem imponat conscientia, ubi officium interdiu fuit neglectum. Agrorum naturam diligenter scrutamur, ut quicquid fertilitatem adjuvet, non omittatur, quicquid impediat, removeatur, & nos ipsos parum observemus? Neque tantum ad unius diei, sed totius vitæ acta respiciendum est, cum optima sint consilia, quæ præteritorum suggerat memoria. Narrat de seipso Seneca, quotidie apud se causam dixisse, sublato è conspectu lumine & conticescere uxore moris jam consciâ; totum diem scrutari, facta ac dicta sua remetiri solitum, nihil sibi abscondisse,

disse, nihil transiisse. Sanctissimum sanè judicium, in quo perfidia & gratia nullum habent locum; in quo actor illius quærit salutem, quem reum peragit; testis ei vult prodesse adversus quem testimonium dicit; reus ita veniam petit, ut actori gratias agat; judex ita ignoscit, ut nihilo secius animadvertat. Quisquis hoc egerit, fieri non potest, quin quotidie errores suos objurgando vitiis aliquid demat & virtuti adliiciat; ac proinde seipso indies fiat melior. Sed quod præcipuum est, preces nostras ad Deum omittere minime fas est: hujus enim nisi adjutus benignitate, non est quod quis existimet bonam mentem & rectè agendi facultatem se consequi posse; quod neque animus noster ab errore ultro liberari, neque voluntas contra fortunam ad honesta erigi possit. Sed cavendum omninò, ne à summis labris vota prodeant, & quæ palam petimus, nolle nos impetrare, vita & actiones nostræ declarent. Quo nihil magis impium esse potest, cum reverà nihil sit aliud, quam verbis illum ludere velle, quem ne cogitationes quidem celare possumus. Hic interpellans Anchistiis, quæ hætenus, inquit, à te sunt disputata, Nenifite, eò fere spectant, ut multorum animi à rebus gerendis abducantur, & nescio in quas solitudines relegentur. Non ita est, inquit Nenifitus: etenim nemini magis indignor, quam qui virtutis studio solitariam vitam amplectendam esse rati, ab aliorum commercio se planè segregant. Certe virtutis non ea est natura, ut unumquemque sibi tantum & suis commodis vacare velit; versatur enim in actione; illa autem, si extra hominum societatem vivere

juvat,

juvat, vel nulla est omnino, vel admodum rara. Unde non satis eos mirari possum, qui res magnas geri & Virtutis simul rationem haberi posse dubitant. Vbi quæso illustrior iustitia, quam in eo, qui impunè quemvis potest injuriâ afficere? ubi illustrior castitas, quàm apud quos libido vitium esse desiit, quia in mores abiit? ubi illustrior sobrietas, quàm apud quos egregiè potare pro fortitudine habetur? Vbi abstinentia illustrior, quàm in illo Magistratu, qui quæ honesta sunt, gratis facere non recusat; quæ contraria, nullo auri atque argenti pondere, ut facere velit, moveri potest? Sed ita vivere non licet, qui Remp. regunt, aut consilio juvant, aut quâcumque ratione rebus gerendis præsumt; quandoquidem multis ad hoc opus est, quæ vix parari possunt, nisi interdum virtus & honestas è conspectu submoveantur. Fateor res non admodum difficiles, quod historiæ testari possunt, peccandi consuetudinem reddidisse difficillimas; sed illud à ratione prorsus est alienum, si ea quæ facere nolumus, propterea fieri posse negamus; quò quia his temporibus nihil est usitatius, & nihilo secius optimarum rerum studiis nobis videmur esse dediti, non est mirandum pro bonis haberi, qui pessimis tantùm sunt meliores. Vtinam depulsis tenebris ita illustrarentur mentes nostræ, ut ad eorum exemplarespiceremus, qui honestatis & innocentie imaginem nobis reliquerunt, longe beatiore haberemus Respub. Tantum enim abest ut qui in illis vivunt, eos virtus à se excludere videri debeat, ut etiam maximas utilitates præstare possint,

Cui pudor, & iustitiæ soror
Incorrupta fides, nudaque veritas.

Si qui tamen propter ingenium aut mores parum aptos à publicis rebus sese abstinere, non quòd virum bonum ad imperia accedere nefas existiment; sed quia sibi non conveniat ejusmodi vita, illi reprehendi non debent; modo quacumque ratione possunt, ad communem utilitatem aliquid afferant. Quod sicuti multis modis fieri potest, ita neminem impedit quicquam, quò minus publicè prodesse queat. Si hæc tua est sententia, inquit Tagarennus, neque ego dissentio, neque hanc Anchistium dissentire puto. Sed vellem & hoc adjecisses, multa esse officia, in quibus virtus per se quidem locum habeat, sed, ut his temporibus, geri non posse, quin vitii locus relinquatur; quædam vero talia esse, ut ipsum nomen aliquid innuat, quod personam nostram dedecet: quæ licet in juventutem & virili ætate spernimus, in ipsa senectute interdum nobis imponi patimur. Quamobrem Senex Mimographus cum à Cæsare invitatus in scenam prodiret, quod antea nemo ab ipso impetraverat, de seipso ita querebatur:

Ego bis tricenis annis actis sine notâ,
Eques Romanus ex lare egressus meo
Domum revertar Mimus: nimirum hoc
die

Vno plus vixi, mihi quàm vivendum fuit.

Tu Nenifite de his plura, si videbitur. Ego vero, inquit

quit Nenifitus, seriò optarem, ut istam orationis partem abfolveres; quæ enim hic dici deberent, multis & in his etiam gravibus viris non plane probantur. Hoc tamen diffimulare non possum, quodcumque munus ita comparatum, ut certè sciamus, dum in eo sumus occupati, delinquendum esse, illud meo quidem iudicio suscipi non debere. Sed de his pluribus differere non est nostri instituti, & facilis est reliqua doctrina illis, qui nihil se esse malant quàm bonos viros, & singulari studio ducuntur cognoscendæ percipiendæque virtutis: à quâ tam longe nos recedere nihil est mirum his temporibus, quæ nec vitia sua ferre possunt, nec remedia pati volunt. Vocabulis enim Sapientiæ potius immoramur, quàm operibus, & rebus cognoscendis maximam impendimus curam, gloriæ quadam cupiditate incensi aut inutili voluptate; ita ut denuo Socrate quodam sit opus, qui studia à rebus occultis, in quibus plerique operam collocant, ad vitam communem revocet, ostendatque, multa, quorum studium arripimus, vel procul esse à nostrâ cognitione, vel si maximè cognosci possint, nihil tamen ad bene vivendum conferre. In voculâ quadam scribendâ vel pronuntiandâ sicubi erratum est, magnum crimen putatur; toties autem in vitâ peccare neminem pudet. De corporis habitu & vestitu ita sumus solliciti, ut si plica extra ordinem jaceat, admoneri rogemus; at quotusquisque amicum convenit, ut exquirat, num virtuti aut vitiis quid accesserit vel decesserit. Itaque postquam ad res levissimas cura nostra transiit, necessestis adhiberi desinit. Si quos legimus aut cognoscimus divitias

contemisse, publica sanctè administrasse, immeritam infamiam animosè tulisse, injuriam vicisse beneficiis, conscientiae majorem habuisse rationem, quàm famæ; hos otiosè admiramur, dedecus putantes eorum imitari exempla. Contrà in eo vigilant curæ & cogitationes nostræ, ut nulla divitias, voluptates, potentiam & honores consequendi prætermittatur occasio; quorum omnium desiderio ita flagramus, ut quo jure quave injuriâ comparentur, nihil interesse arbitremur. Sed nolo his querelis aures vestras obtundere. Illud nemo satis mirari potest, nos, qui Christiani appellamur, adeo immemores esse decretorum, quibus tot ac tantis miraculis fidem fecit Servator noster. Quod nefas tantò majus est, quò minus ille quicquam omisit, ut nos servaret; sane non ita oportebat abuti nominis gloriâ, cui ne in speciem quidè facta respondent. Neq; vero est quod ipsi nos decipiamus falsis persuasionibus, ac si vita & actiones nostræ à cultu divino sint exclusæ. Longè aliâ ad cœlum pervenitur viâ, ideoque dolendum, sicuti in multis aliis compendia quæsitâ non sine damno optimarum rerum, ita & hujus itineris compendium quæri cœptum in ejusmodi fide, quæ in labiis nascitur. Hæc enim qualis esse potest in illis, qui reipsâ declarant, se parum credere Deum nostrum spontè delinquentibus æternas poenas & rectè agentibus æterna præmia constituisse? Profecto nisi nos fallant divina dogmata, (quod vel cogitatu impium) si ista pars cultus divini, quæ in rectitudine actionum & morum probitate consistit, à fide nostrâ abest, quâ Servatori nostro volumus esse conjuncti,

juncti, nil ea nisi mera perfidia videtur. Cum hæc dixisset Nenifitus, intervenit puer, & de morâ ob-
jurgat Anchistium & Nenifitum, quam producebant:
erat enim uterque à communi amico ad cœnam in-
vitatus. Tagarennus igitur solus relinquitur, sed ab
utroque rogatus, ut quæ sub initium sermonis
penè promiserat, de iis præstandis
quamprimum cogitaret.

F I N I S.



The first of these is the
 fact that the system is
 not a simple one, but a
 complex one, involving
 many different factors.
 The second is that the
 system is not a simple one,
 but a complex one, involving
 many different factors.
 The third is that the
 system is not a simple one,
 but a complex one, involving
 many different factors.

2111











